

ማቶሴ ፃፌዳ ሚሺራቸው ቃላ ጌሉዋ

ማቶሴ ፃፌዳ ሚሺራቸው፣ ዩሱሲ ያና ጌቲቲያ ሂደታይ ካሴ ኦዴቲ ኡቴዳ ጳሊያ ጊዲያዎን ያሳይ ካሴ ኤጫ ጫቁዋን ባሪ አሳሲ ኢሜዳ ሂደታ ቃላ ፖሌዳዌ ዩሱሳ ባጋና ጊዲያዎ ኦዲያ ሚሺራቸው ቃላ ኦይቄዳዎ። ሃ ሚሺራቸው ቃላይ ዩሱሲ ኡንቲንቲ ጊደን ዩሌቲዴ ዲጩዳዌ አዩሁዳቲ ፃላላሳ ጊደናን፣ አላሚያ ኡባን ዴዒያ አሳሳ።

ማቶሴ ፃፌዳ ሚሺራቸው ቃላይ ዳር አኬካን ፃፌቲዳ ማፃፋ። ዩሱሳ ዩሌታን ዶሚዴ፣ ኢ ፃማቄቲዳዎን ኢ ፓጩቲዳዎ ኦዲ ሲሚዴ፣ ጋሊላን ኢ ቃላ ኦዴዳዎ፣ ታማሪሴዳዎን ሃርጋንቻቲዎ ፓሌዳዎ ኦዴ። ሄዋፔ ካሊዴ ዩሱሲ ጋሊላፔ ዩሩሳላሚ ቤዳዎን ኢ ሃ አላሚያን ጋሚዔዳ ወርሴላ ሳሚንታን ሃኔዳ ዩዋቲዎ ቆንጩሴ። ሄዋንቲካ ኢ ካቄቶዎ፣ ሃይቄዳዎን ዴንዴዳዎ ኦዲኖ።

ሃ ሚሺራቸው ቃላይ ዩሱሳ፣ ያሳ ሃጊያ ቢሌላ አሚናው ማታይ ዴዒያዎን ያሳ ካወቲላባ ኤሪሲያ ዎልቃማ ታማሪሲያዎ ኦሌዴ ሺሼዳ። አ ቲሚርቲያፔ ዳሪያ ባጋይ፣ ዲማ ዲማ ኦጊያን ጊጌቲዳ ኢቸሹ ሳን ሻኬቲ።

1. ያሳ ካወቲላን ዴዳና አሳ ኤሻ፣ ኦሱዋ፣ ማታኔ ወርሴላ ቃዳ ኦዲያ ዴሪያ ቦላ ቲሚርቲያ (ማት 5:1-7:28)።
2. ታማኔ ላዑ ዩሱሳ ካሊያዎንቲ ሚሺራቸው ቃላ ታማሪሳናው ቤዳ ዎዴ ኡንቲንቲ ኢሜቲዳ ካሌሉዋ (ማት 10)።
3. ያሳ ካወቲላባ ታማሪሲሺን ሺቄዳ ዲማ ዲማ ሌሚሳቲዎ (ማት 13)።
4. ዩሱሳ ካሊያዎንቲባ ቢሊ ኦዲያ ቲሚርቲያ (ማት 18)።
5. ሃዒ ዎዲያ ወርሴላኔ ያሳ ካወቲላ ዩሳ ጌሊያዎን ኢሜቲዳ ቲሚርቲያ (ማት 24-25)።

ሺዎፓቲዎ ኡባቲዎሲ ኢሜቲዳ ቃንሳ ቆፋቲዎ
 ዩሱሲ ኪሪሰቶሳ ጉዬ ዜራላኔ ዩሌታ (1:1-2:23)
 ፃማቄያ ዮሃኒሳ ኦሱዋ (3:1-12)
 ዩሱሲ ፃማቄቶዎን ፓጩቶዎ (3:13-4:11)
 ዩሱሲ ኦሱዋ ጋሊላን ዶዎዎ (4:12-18:35)

ዩሱሲ ጋሊላፔ ዩሩሳሌም ቦዋ (19:1-20:34)
 ዩሩሳሌምኒኔ ኢዚ ዩሹዋን ዩሱሳ ዉርሴላ ሳሚንታ (21:1-27:66)
 ኑ ጎዳ ዩሱሳ ዳንዲዋኔ ቆንጨላ (28:1-20)

ዩሱሲ ኪሪሰቶሳ ዩሌታ ማራ
 (ሉቅ 3:23-38)

1 ሃዌ ዳዊታ ዛሪያኔ ኣብራሃም ዛሬ ገዳዳ ዩሱሲ ኪሪሰቶሳ ዩሌታ ኦዲያ ማፃፋ።

2 ኣብራሃም፡ ዩሳቃ ዩሌዳ፤ ዩሳቂ፡ ያዩቆባ ዩሌዳ፤ ያዩቆቢ፡ ዩሁዳኔ ኣ ኢሻቱዋ ዩሌዳ። 3 ዩሁዳይ ቲዒማሪፔ ፓሪሳኔ ዛራሃ ዩሌዳ፤ ፓሪሴ፡ ሄሂሮና ዩሌዳ፤ ሄሂሮኔ፡ ራማ ዩሌዳ። 4 ራማ ኣሚናዲባ ዩሌዳ፤ ኣሚናዲቤ፡ ናዓሶና ዩሌዳ፤ ናዓሶኔ፡ ሴሊሞና ዩሌዳ። 5 ሴሊሞኔ፡ ራዓቦ ጌቴቲያ ሚሺራቲፔ ቦዔዛ ዩሌዳ፤ ቦዔዚ፡ ኡሩቶ ጌቴቲያ ሚሺራቲፔ ኢዮቤዳ ዩሌዳ፤ ኢዮቤዳ፡ ኢሴይ ዩሌዳ። 6 ኢሴይ ካቲያ ዳዊታ ዩሌዳ።

ካቲያ ዳዊቱ፡ ኦሪያ ማቻቲፔ ሶሎሞና ዩሌዳ። 7 ሶሎሞኔ፡ ሮቢዓማ ዩሌዳ፤ ሮቢዓማ፡ ኣቢያ ዩሌዳ፤ ኣቢያይ፡ ኣሳፋ ዩሌዳ። 8 ኣሳፊ፡ ዮሳፌዓ ዩሌዳ፤ ዮሳፌፃ፡ ኢዮራማ ዩሌዳ፤ ኢዮራማ፡ ኦዚያና ዩሌዳ። 9 ኦዚያኔ፡ ኢዮዓታማ ዩሌዳ፤ ኢዮዓታማ፡ ኣካዛ ዩሌዳ፤ ኣካዜ፡ ሂዘቂያሳ ዩሌዳ። 10 ሂዘቂያሴ ሚናሳ ዩሌዳ፤ ሚናሴ፡ ኣሞፃ ዩሌዳ፤ ኣሞፃ፡ ኢዮሲያሳ ዩሌዳ። 11 ኢሰራዔሊያ ኣሳይ ኦሞዴቲዳ፡ ባቢሎኔ ጋዲያ ቤዳ ዎዳ፡ ኢዮሲያሴ ኢኮኒያናኔ * ኣ ኢሻቱዋ ዩሌዳ።

12 ባቢሎኔ ኦሞዴሞፔ ጉዩያን፡ ኢኮኒያናኔ ሳላቲያላ ዩሌዳ፤ ሳላቲያላ፡ ዜሩባቤላ ዩሌዳ። 13 ዜሩባቤሊ፡ ኣቢዩዳ ዩሌዳ፤ ኣቢዩዳ፡ ኤሊያቄማ ዩሌዳ፤ ኤሊያቄማ፡ ኣዘራ ዩሌዳ። 14 ኣዘራ ሳዶቃ ዩሌዳ፤ ሳዶቄ፡ ኣከማ ዩሌዳ፤ ኣከማ ኤሊዩዳ ዩሌዳ። 15 ኤሊዩዳ፡ ኣለዓዛራ ዩሌዳ፤ ኣለዓዛራ፡ ማታና ዩሌዳ፤ ማታኔ፡ ያዩቆባ ዩሌዳ። 16 ያዩቆቤ፡ ኪሪሰቶሳ ጌቴቲያ ዩሱሳ ዩሌዳ ማሪራሞ ኦቹዳ ዮሴፋ ዩሌዳ።

17 ሲሚ ዩሌታይ ኡባይ ኣብራሃሞፔ ዳዊታ ጋካናው ታማኔ ኦይዱ ዩሌታ፤ ዳዊቱፔ ደሚዳ፡ ኣሳይ ባቢሎኔ ጋዲያ ኦሞዴቲዳ ቤዳ ዎዲያ ጋካናው ታማኔ ኦይዱ ዩሌታ፤ ኣሳይ ባቢሎኔ ጋዲያ

1:5 ኡሩ 4:18-22፤ 1ኡድ 2:13-15 * 1:11 ሃዋ ጉሳይ፡ ዮዓከና ጊያዋ፤ ቃሲ ፓይዲዋ 12 ዳዒያዎካ ቢሌላይ ኢቱዋ። 1:11 2ካት 24:14-15፤ 2ኡድ 36:10፤ ኤርሞ 27:20

አዎዴቲዳ ቤዳ ዎዲያፔ ኪሪሰቶሲ † ዩሌቴዳ ዎዲያ ጋካናው ታማኔ ኦይዲ ዩሌታ።

ዩሱሲ ኪሪሰቶሳ ዩሌታ
(ሉቅ 2:1-7)

18 ዩሱሲ ኪሪሰቶሳ ዩሌታይ ሃዋ ማላ፤ አ ዳያ ማይራማ ዮሴፎ ኦሽታ ቃሽታ ኡታዲ። ሄ ዎዴ ዮሴፎና ጋኬቴናን ዴዓዴ፣ ጌሻ አያናን ሻሃራዲ። 19 ኢዞ ገጊሲ ዎሌዳ ዮሴፎ ያሎ አሳ † ጌዴዳ ዲራው፣ ኢዞ ካዉሻናው ኮዩቤና፤ አባ ቆንጨሴናን ኢዞ አጋናው ቆፔዳ። 20 ሺን ኢ ሄዋ ቆፐሺን፣ ጎዳ ኪታንቻይ አኩሙዋን § አናና ጋኬቴዳ፣ «ዳዊቴ ናዓ ዮሴፎ፣ ማይራማ ጌሻ አያናን ሻሃራዳ ዲራው * ኢዞ አካናው ያዮፓ። 21 ኢዞ አቲማ ናዓ ዩላናዉኑ፤ ኔኒካ፣ ኢ አሳ ናጋራፔ አሺያ ዲራው አ ሱጎላ ዩሱሳ ጋዴ ያሳናሳ» ያጌዳ።

22-23 ቃሲ ጎዳይ ናቢያ ባጋና፣ «ዎደራታ ሻሃራናዉኑ፤ ናዓካ ዩላናዉኑ፤ አ ሱጎላይካ አማኔላ ጌቴታናዋ» ያጌዳዌ ፖሌታና ማላ፣ ሃዌ ኡባይ ሃኔዳ፤ «አማኔላ» ያጊያዌ፣ «ዎሳይ ኑናና ዴዔ» ያጊያዋ።

24 ዮሴፎ ጌሚራሹዋፔ ቤጎቲዳ፣ ጎዳ ኪታንቻይ ባሪና አዛዞዎዳን፣ ማይራዋ ባሪ ጎሌ አፌዳ። 25 ሺን ናዓይ ዩሌታና ጋካናው ዮሴፎ ኢዚኮ ሺቂቤና፤ ቃሲ ናዓካ ዩሱሳ ጌዴ ሱጎሌዳ።

2

አዋይፊ ደሊያ ባጋፔ ዩዳ ያለንቲያ ፓይዲያ አሳቱዋ

1 ዩሱሲ ዩሁዳ ጋዲያን ቤቴሊሄሜ ጌቴቲያ ካታማን ሄሮዲሴ ካዉቲዳ ዴዒያ ዎዴ ዩሌቴዳ፤ ሄዋፔ ጉዩያን፣ ያለንቲያ ፓይዲያ

† **1:17** ኪሪሰቶሳ፣ ጊያዌ ግሪኬ ቃላና ጊዶዴ፣ ሜሲህ ጉሳይ ኢቢራዩሲያ ቃላና ጊዲዳ ላዑዋ ቢላላይካ «ኦኬቴዳዋ» ጉሳ። † **1:19** ዮሴፎ ያሎ አሳ ጊያ ቆፋው ሄዙ ኦጊያን ቢላላይ አሜታና ዳንዳዩ፡ 1. ያሳባው ኡባው ኡና ጊዴ አዛዘቲያ አሳ፤ አማሊያ ሎዎ አሳ። 2. ጋራ (ቃሪታንቻ)። 3. ሎዑዋ። ሄዋ ጉሳይ፣ ኡባ ካላ ሎዎባ ኦሊያ አሳ ጉሳ። § **1:20** አኩሙዋን ጉሳይ፣ ጮካ ጎዳና አኩሙዋ ጊዴናዳን አዩሁዳቱዋ አኩሙዋ ጉሳይ፣ ያሳይ ሊኬ ቆንጨያ ኦጊያ። * **1:20** ጌሻ አያናን ሻሃራዳ ዲራው፣ ጉሳይ ኢዞ ሃዋ ጋካናሺን ዩሌታናዳን ናጊያ ናዓይ፣ ያሳ ጌሻ አያናፔ ዩ ጉሳ። **1:21** ሉቅ 1:31 **1:22-23** ኢሳ 7:14 **1:25** ሉቅ 2:21

አሳይ * አዋይፊ ደሊያ ባጋፔ ዬሩሳላሜ ዪዳ፡ 2 «አዪሁዳ ካቲያ ገዳናው ዬሌቲዳ ናባይ ሃቃን ዳዒ? ኮኒ አዋይፊ ደሊያ ባጋና ከሴዳ አ ያለንቲያ በዬዲዳ፡ አው ጎዪናናው ዬደ» ያገዴ ኦቼዲና፡፡

3 ካቲያ ሄሮዲሴ፡ ሄዋ ሲሲዳ ዳጋሜዳ፤ ዬሩሳላሜን ዳዒያ አሳይ ኡባይካ ዋዛና ባዬዲና፡፡ 4 ሄሮዲሴ ቄሳቱዋ ካፓቱዋ ኡባቱዋኔ ሙሴ ሂጊያ ታማሪሲያዋንታ ጃሲዳ፡ «ከሪሰቶሲ ሃቃን ዬሌታንዳሻ?» ያገዴ ኦቼዳ፡፡

5-6 ኡንቱንቱ ዛሪዳ፡ «ዪሁዳ ጋዲያን በቴሊሄሜ ካታማን ዬሌታናዋ፡፡ ናቢ፡

«ዪሁዳ ጋዲያን ዳዒያ በቴሊሄሜ፡ ኮኒ ዪሁዳ ጋዲያን ዳዒያ ዋሊቃማ ካታማቱዋፔ ላፋካ፡ አሰራዔሊያ ሞዲያዌ ኔፔ ከሳናዋ)

ገዴ ፃፊዳ» ያገዴዲና፡፡

7 ሄዋፔ ካላ፡ ሄሮዲሴ አዋይፊ ደሊያ ባጋፔ ዬዳ አሳቱዋ ጌማን ጃሲዳ፡ ያለንቲ ኡንቱንቶ በቴዳ ዋዲያ ኡንቱንቱፔ ጌሺዳ ኤሪዳ፡፡ 8 ያቲዳ በቴሊሄሜ ኡንቱንታ ዬዲዳ፡ «ቢዳ ናባ ሎይሊ ኮዩቲ፤ አ ዳሜዳ ዋዳ ታኒካ ባዴ አው ጎዪናናዳን፡ ታናካ ኤሪሰቲ» ያገዴ፡፡

9 ኡንቱንቱ ካቲ ጌዳዋ ሲሲ በዳ ኦጊያን አዋይፊ ደሊያ ባጋና ኡንቱንቱ ካሴ በዔዳ ያለንቲያ በዔዲና፤ ናባይ ዳዒያሳ ጋኪዳ ኤቃና ጋካናው፡ ያለንቲ ኡንቱንታ ካሌሌዳ፡፡ 10 ኡንቱንቱ ሄ ያለንቲያ በዔዳ ዋዳ፡ ዛዋይ ባይና ዳሮ ናሺቻ ናሺቲዲና፡፡ 11 ጎሌ ጌሊዳ፡ ናባይ ባሬ ዳዪ ማይራሚና ዳዒያዋ በዔዲና፤ ጉልባቲዳ አው ጎዪኔዲና፤ ሄዋፔ ካላ፡ ባሬንቱ ሳዒኒያ ደዪዳ፡ ዋርቃ፡ ኢፃና ካዋራ † አው ኢሞታ ሺሺዲና፡፡

12 ኡንቱንቱ ሄሮዲሳኮ ሲሜና ማላ፡ ያሳይ አኩሙዋን ኡንቱንታ፡ «ሂንቴና ኤሪቲ» ገና ሃራ ኦጊያና ባሬንቱ ጋዴ ሲሜዲና፡፡

ገብፄ በቱሳ

13 ኡንቱንቱ በዳዋፔ ጉዪያን፡ ጎዳ ኪታንቻይ አኩሙዋን ዮሴፎ በቲዳ፡ «ሄሮዲሴ ናባ ዋቋናው ኮዩያ ዲራው፡ ዴንዳዴ ናባኔ አ ዳዮ አካዴ ገብፄ ጋዲያ በታ፤ ታኒ ኔው ኦዳና ጋካናው፡ ያኒ ዳዓሻ» ያገዴ፡፡

* 2:1 ያለንቲያ ፓይዲያ አሳ ጉሳይ፡ ኤሪቲዳ ማራ በሌላን ኤሪንቻ አሳቱዋ ጉሳ፡፡
2:5-6 ሚክ 5:2 † 2:11 ኢፃና ካዋራ፡ ኢፃናይ፡ ማዲያ ጁሊያ ገዲዳ፡ ታማን ዬጊያ ዋዳ ሳዋናሳ፤ ካዋራይካ ሳዋ ማዲያ ጁሊያ ገዲዳ ሺቱዋዳን ማዳ፡፡

14-15 የሱፎ ቃማ ዴንዲዳ፣ ናባኔ አ ዳዮ አኪዳ፣ ገብፄ ጋዲያ ቤዳ፤ ጎዳይ ናቢያ ባጋና፣ «ታኒ ታ ናባ ገብፄ ጋዲያ፤ ፄሳዲ» ያገዳዌ ፖሊታና ማላ፣ ሄሮዲሴ ሃይቃና ጋካናው ኢ ያኒ ዴዔዳ።

ሄሮዲሴ ቄሪ ናና ዎጲሴዳ

16 ሄዋፔ ጉዪያን፣ ሄሮዲሴ አዋይፊ ዶሊያ ባጋፔ ዬዳዋንቱ ባሪና ጨሜዳዎ ኤራዳ ዎዴ፣ ዳሮ ሃንቁቲዳ፣ ያሊንቲ ካሴ ቤቲዳ ዎዲያ ኡንቱንቱፔ ሲሴዳዎዳን፣ ዎታዳራቱዎ ዬዲዳ፣ ቤቲሊሃሚኒኔ የሹዋን ዴዒያ ላዑ ላይላ አቱማ ናናኔ ላዑ ላይላ፤ ጋርሳና ዴዒያ አቱማ ናና ኡባ ዎጲሴዳ።

17-18 ናቢያ ኤርሚያሱ፣
«ዬኩኔ ዘላሳይ ራማ ጌቲቲያ ካታማን ሲሴቲዳ፤
ራሄላ ባሪ ናናው ዬካው።
ኡንቱንቱ ሃይቁዲሳ ዲራው፣
ኣጋ ገና፣ ኣጌናን ኢዳዲ»
ገዴ ኦዴዳዌ ፖሊቲዳ።

ገብፄ፤ ሲማ

19 ሄሮዲሴ ሃይቁዳዎፔ ጉዪያን፣ ጎዳ ኪታንቻይ ገብፄን የሱፎ አኩሙዋን ቤቲዳ 20 አ፣ «ዴንዳ፤ ናባኔ አ ዳዮ አካዳ፣ ኢሰራዔሊያ ጋዲያ ሲማ። ናባ ዎጲናው ኮዪያዎንቱ ሃይቁዲጌዲኖ» ያገዳ። 21 የሱፎ ዴንዲዳ፣ ናባኔ አ ዳዮ አኪዳ፣ ኢሰራዔሊያ ሲሜዳ።

22 ሺን የሱፎ አርኬላዎሲ ባሪ አዉዎ ሄሮዲሳ ኦይዲያን ዪሁዳ ጋዲያን ካዉቲዳዎ ሲሴዳ ዎዴ፣ ያ ባናው ያዬዳ፤ ያሳይ አው አኩሙዋን ሂንቲና ኤሪቲ ገና፣ ጋሊላ ጋዲያ ቤዳ። 23 ናባቱ፣ «አሳይ አ፣ ናዚራቲያ አሳ) † ገዴ ፄሳና» ያገዳዌ ፖሊታና ማላ፣ ናዚራቲ ጌቲቲያ ካታማ ቢዴ ዴዔዳ።

3

ፃማቂያ የሃኒሲ ቃላ ኦዴዳ

(ማር 1:1-8፤ ሉቅ 3:1-18፤ የህ 1:19-28)

1-2 ሄ ዎዴ ፃማቂያ የሃኒሲ አሳ፣ «ሳሉዎ ካዉቲላይ ማታቲዳ ዲራው፣ ሂንቲ ናጋራፔ ሲሚቲ» ያገዴ፣ ዪሁዳ ሜላ ቢታን ኦዲዴ ዬዳ። 3 አዪሲ ጎፔ፣ ናቢያ ኢሲያሴ፣ የሃኒሳባ ኦዲዳ፣

2:14-15 ሆሰ 11:1 2:17-18 ኤርሞ 31:15 † 2:23 ሃዎ ጌዳዌ ኦኔንቶ ኤራቲና። 2:23 ማር 1:24፤ ሉቅ 2:39፤ የህ 1:45 3:1-2 ማጉ 4:17፤ ማር 1:15

«ኢቱ ማላ ቢታን ባሬ ቃላ ቶቄ ኡዲዳ፡
 ሳዳ ኦጊያ ገገሲቱ።
 ኢ ሄሜታና ሎሱዋካ
 እው ሲቲ ኡዲቱ። ጌዳ»

ያጌዳ።

4 የሃኒሳው ጋሉዋ ኢስኪያን ዳዴቲዳ ማዩ ዳዴ፤ ቃሲ ባሬ
 ያሳን ዳፋዋ ዳንጨዳ፤ ኢ ሚያ ቁማይካ ቦሊያን ባዙዋ ኤሳ።
 5 አሳይ ሄ ዎዴ ዩሩሳላሜ፤ ዩሁዳ ጋዲያ ኡባ ሳፔን ዮርዳኖሳ
 ሻፋ ሄራን ዳዴያ ጋዲያ ኡባ፤ አኮ ዩኖ። 6 ባሬንቱ ናጋራ ፓዲና፡
 ዮርዳኖሳ ሻፋን አሳ ፃማቄዳ።

7 ሺን የሃኒሲ ዳር ፓሪሳዋቱ * ሳዲቃዋናቱ † ፃማቄታናው
 ባሬኮ ዩያዋንታ ቤዲዳ፡ «ሃ ሾሻቶ፡ ያሳ ሃንቁ ያና ሃኒያዋፔ አታና
 ስላ፡ ሂንቱው እኔ ኦዳዳዎ? 8 ሲሚ ሂንቱ፡ ሂንቱንቱ ናጋራፔ
 ሰሜዳዋ ኤሪሲያ ኦሱዋ፡ አሊቱ። 9 ሂንቱ ሂንቱንቱ ዎዳናን፡
 ሳብራሃሜ ኦ አባ) ገዴ ቆፒያዋ ሂንቱው ማላቶ። አዩሲ ሳፔ፡
 ታኒ ሂንቱንቱሲ ኦዳይ፤ ያሳይ ሃ ሹቻቱዋፔ አብራሃሞሲ ናና ኡዲ
 ዴንፋናው ዳንዳዬ። 10 ቤዲ ሚላ ፃጵዋን ቃንፃናው ገገ ኡቲዳ፤
 ሎዎ አይፊና አይፊና ሚላ ኡባይ ቃንፃቲዳ፡ ታማን ዩጌታና።

11 «ሂንቱ ሂንቱንቱ ናጋራፔ ሲሚያዋ ቤሳናው፡ ታኒ ሂንቱና
 ሃላን ፃማቃይ፤ ሺን ታፔ ጉዩና ዩያዎ፡ ሂንቱንታ ጌሻ አያናኒኔ
 ታማን ፃማቃና። ‡ ኢ ታፔ ዳር ሚኔ፤ አ ጫማ ቶካናዉካ ታኒ
 ቤሲያ አሳ ገዲከ። 12 አ ኩሺያን ካላ ሴዲያ ላይዳይ ዳዴ።
 ኡዲማን ዳዴያ ካላ ሎይሊ ጌሼ፤ ባሬ ዛርጋ ዲዩያን ቆላና፤
 ሺን ዳላ ቶዴና ታማን ጉዳና» ያጌዳ።

ዩሱሲ ፃማቄቲዳ
 (ማር 1:9-11፤ ሉቅ 3:21-22)

13 ዩሱሲ ሄ ዎዴ የሃኒሳን ፃማቄታናው፡ ጋሊላፔ ዮርዳኖሳ
 ጌቲቲያ ሻፋ አኮ ቤዳ። 14 ሺን የሃኒሲ፡ «ታኒ ኔናን ፃማቄታናው
 ቤሲያ ዎዴ፡ ኔኒ ታኮ ያይ?» ያጌዳ፡ አ ዲጋናው ኮዬዳ።

3:3 አሳ 40:3 3:4 1ካት 1:8 * 3:7 ፓሪሳዋቱዋ፡ ጉሳይ አዩሁዳ
 አሳቱዋ ካሊሊያ አሳቱዋ ገደፔ ገዲዳ ጌሻ ቃላን ካሴ ኤጫ ጫቁዋ ገደን ዳዴያ
 ቃላ ዎጋ ኡባን አማኒያዋንታ። † 3:7 ሳዲቃዋናቱዋ፡ ጉሳይ አዩሁዳ አሳቱዋ
 ካሊሊያ አሳቱዋ ገደፔ ገዲዳ ጌሻ ቃላን ካሴ ኤጫ ጫቁዋ ገደን ዳዴያ ቃላ ዎጋፔ
 ሙሴ ዎፊዳ ኮይር አቼሹ ማፃፋቱዋ ገደን ዳዴያ ዎጋቱዋ ያላላን አማኒያዋንታ።
 ‡ 3:11 ጌሻ አያናኒኔ ታማን ፃማቃና፡ ጉሳይ ዩሱሲ ዩዴ አሳ ጋርሳ አያና አሳቲላ
 ላሚያዋ ታማሪሲያዋ።

15 ሺን ዩሱሲ ዛሪዳ አ፡ «ኑኒ ዒሎቴላ ኦሱዋ ኡባ ሃዋዲን ፖላናው ቤሲያ ዲራው፡ ሃሲ ታው ኤኖ ጋ» ያጌዳ። ዮሃንሲካ አው ኤኖ ጌዳ።

16 ዩሱሲ ፃጣቆቶዋፕ ጉዩያን፡ ኤሌካ ሃላፕ ኬሴዳ፤ ሳሉ ደዩተና፡ ያሳ አያናይ ሃራጲያዳን ሳሉዋፕ ዋጂዳ ባሬ ቦላ ዪያ ዋዳ ቤዔዳ፤ 17 ቃሲ ሳሉዋፕ፡ «ታኒ ሲቂያ፡ ታና ናሽቲያ፡ ታና ናዳይ ሃዋ» ያጌያ ቃላይ ዩዳ።

4

ዩሱሲ ፓጩቴዳ

(ማር 1:12-13፤ ሉቅ 4:1-13)

1 ሃዋፕ ጉዩያን፡ ፃላሂያን ፓጩታና ማላ፡ ጌሻ አያናይ አሳይ ዳዔና ሳዓ ዩሱሳ አፊዳ። 2 ዩሱሲ ኦይታው ጋላሳኔ ኦይታው ቃማ ያዋዋፕ ጉዩያን ኮሻቴዳ። 3 ፃላሂ ዪዳ አ፡ «ኑኒ ያሳ ናዓ ጊደፕ፡ አኔ ሃ ሹቻቱዋ ኡኪላ ጊደና ማላ ጋ» ያጌዳ።

4 ሺን ዩሱሲ ዛሪዳ፡ «ያሳ ማፃፋን፡ ሐሳይ ያሳይ ሃሳዪያ ቃላ ኡባን ዳዓናፕ ኦቲን፡ ኡኪላ ፃላላን ዳዔና) ያጌቲ ፃፊቴዳ» ያጌዳ።

5 ሃዋፕ ጉዩያን፡ ፃላሂ ዩሱሳ ጌሻ ካታማ አፊ ጌሻ ጎሊያ ዪራን ኤሲዳ፡ 6 «ኑኒ ያሳ ናዓ ጊደፕ፡ አኔ ዱጌ ኩንዳ። አዪሲ ጎፕ፡ ያሳ ማፃፋን፡

የሳይ ባሬ ኪታንቻቱዋ ኔው አዛዛናዋ)

ቃሲ ሐንቲንቱ ኔ ጌዱ ሹቻን ቆቤቴና ማላ፡

ባሬንቱ ኩሺያን ኔና ዳንላናዋንታ)

ያጌቲ ፃፊቴዳ» ያጌዳ።

7 ዩሱሲ ዛሪዳ አ፡ «ቃሲካ ያሳ ማፃፋን፡ ሐዳ ኔ ያሳ ፓጩፓ) ያጌቲ ፃፊቴዳ» ያጌዳ።

8 ቃሲ ፃላሂ ዩሱሳ ኢቲ ደር ዋልቃማ ዳሪያ ዪራ ኬሲዳ፡ ሃ አላሚያን ዳዒያ ካዉቴላ ኡባኔ ኡንቲንቱ ቦንቹዋ 9 ቤሲዳ አ፡ «ኑኒ ታው ጉልባታዳ ጎዪኖፕ፡ ታኒ ሃዋ ኡባ ኔው አሚና» ያጌዳ።

10 ሄ ዋዳ ዩሱሲ ዛሪዳ አ፡ «ላ ሃ ሴፃናው ሃካ፤ አዪሲ ጎፕ፡ ያሳ ማፃፋን፡ ሐዳው፡ ኔ ያሳው ጎዪና፤ አ ፃላላ ጎሽታ) ጌቲቴ ፃፊቴዳ» ያጌዳ።

3:17 ደዋ 22:2፤ ማዝ 2:7፤ ኢሳ 42:1፤ ማት 12:18፤ 17:5፤ ማር 1:11፤ ሉቅ 9:35 4:4 ዛር 8:3 4:6 ማዝ 91:11-12 4:7 ዛር 6:16 4:10 ዛር 6:13

11 ህዋፔ ጉዲያን፣ ፃላሂ ዩሱሳ አገና፣ ኪታንቻቱ ዪዴ፣ አው ኦሌዲኖ።

ዩሱሱ ባሬ ታማሪሲያ ኦሱዋ ጋሊላን ደሜዳ
(ማር 1:14-15፤ ሉቅ 4:14-15)

12 ዮሃንሲ ቃሽቲዳዋ ዩሱሱ ሲሴዳ ዋዴ፣ ጋሊላ ጌቲቲያ ጋዲያ ቤዳ። 13 ናዚሬቲፔ ከሲዴ፣ ቂፊሪናሆማ ካታማ ቢዴ፣ ያኒ ዴዔዳ፤ ቂፊሪናሆማ ዛቢሎናኒኔ ኒፍታሌማ ጋዲያን ዴዔያ ጋሊላ አባ ማታን ዴዔ። 14 ሃዌ ሃኔዳዌ ናቢያ ኢሲያሲ።

15 «ዛቢሎኔ ጋዲያኒኔ ኒፍታሌማ ጋዲያን፣
አባ ኦጊያን ዮርዳኖሳ ሻፋፔ ሄፊንሳ ባጋን፣
አዪሁዳ ጊዴና አሳይ ዴዔያ ጋሊላን፣

16 ጳማኒ ዴዔያ አሳይ
ዋለቃማ ፖዑዋ ቤዔዳ።
ቃሲ ሃይቁዋ ኩዋይ ዴዔያ ጋዲያን
ኡቴዳዋንቶ ፖዑ ከሴዳ»
ያጌዳዌ ፖሌታና ማላሳ።

17 ህ ዋዲያፔ ደሚዴ ዩሱሱ፣
«ሂንቲ ናጋራ ፓዊቲ፤ አዪሲ ጎፔ፣
ሳሉዋ ካዉቲላይ ማታቲዳ ዲራሳ»
ጊዴ ቃላ ኦዲዋ ደሚዳ።

ዩሱሱ ባሬና ካሊያ ኦይዳቲዋ ፃጌዳ
(ማር 1:16-20፤ ሉቅ 5:1-11)

18 ዩሱሱ ጋሊላ አባ ማታና አዲዴ፣ ላዑ አሻቲ ጳዊርሳ ጌቲቲያ ሲሞኒኔ አ አሻ ኢንዲራሲ፣ ሞሊያ ኦይቁያዋንታ ጊደ ዲራው፣ ዳባ * አባን ዩጊያዋንታ ቤዔዳ። 19 ኡንቲንታ፣ «ታና ካለቲ፤ ታኒ ሂንቲና ሞሊያ ኦይቁያዋዳን አሳ ታኮ አሂያ ኦጊያ ታማሪሳና» ያጌዳ። 20 ኡንቲንቲ ኤሌካ ባሬንቲ ዳባ አጊዴ፣ ዩሱሳ ካሌዲኖ።

21 ዩሱሱ ህዋፔ ሲንሳኮ ቢዴ፣ ሃራ ላዑ አሻቲዋ፣ ዛቢዲዮሳ ናና ያዪቆባኔ አ አሻ ዮሃንሳ ቤዔዳ፤ ኡንቲንቲ ባሬንቲ አዉዋ ዛቢዲዮሳና ሃላ ቦላን ቢያ ዋንጊሪያ ጊደን ባሬንቲ ዳባ ጊጊሲያዋንታ ቤዔዳ፣ ጳሴዳ። 22 ኡንቲንቲ ኤሌካ ሃላን ቢያ ዋንጊሪያኔ ባሬንቲ አዉዋ አጊዴ፣ ዩሱሳ ካሌዲኖ።

ዩሱሱ ጮራ አሳ ታማሪሴዳኔ ፓሌዳ
(ሉቅ 6:17-19)

4:16 እሳ 9:1-2 * 4:18 ዳባ፣ ሃዋ ጉሳይ ሞሊያ ጲራናው ዋይ ኦይቃናው ሃላን ዩጊያ አማራጭን ማራቢያ ጊያዋ።

23 ዩሱሲ አዩሁዳ ዎሳ ጎሌቱዋን ታማሪሲዴ፣ ካወቱላ ሚሺራቸዋ ቃላ ኦዲዲኔ ቃሲ ሃርጊያ ኡባፔኔ ሳኩዋ ኡባፔ ኦሳ ፓሌዴ፣ ጋሊላ ጋዲያ ኡባን ዩዩዳ። 24 ኦ ዋሪ ሶሪያ ጋዲያ ኡባ ጋኬዳ፤ ዲማ ዲማ ሃርጊያን ኦይቄቲዴ ሃርጊዳ ኦሳ ኡባ፣ ፃላሃቱዋን ኦይቄቲዳዋንታ፣ ዩጩዋ ሳኩ ዴዲያዋንታ፣ ቃሲ ጉንዴድዳዋንታ ኦሳይ ዩሱሳኩ ኦሃዳ፤ ኢ ኡንቱንታ ፓሌዳ። 25 ጮራ ኦሳይ ጋሊላፔ፣ ታሙ ካታማቱዋፔ፣ ዩፈሳላሜፔ፣ ዩሁዳፔኔ ዮርዳኖሳፔ ሄሬንላን ዴዲያ ጋዲያፔ ዩሱሳ ካሌዲኖ።

5

ዩሱሲ ዴሪያ ቦላን ጊዲዴ ታማሪሴዳ ቲሚርቲያ
(ማት 5:1-7:29)

1 ዩሱሲ ጮራ ኦሳ ቤዲዴ፣ ፑዴ ዴሪያ ኬሲዴ ኡቲዳ። ኦ ካሊያዋንቱ ኦኩ ሺቄዲኖ። 2 ኡንቱንታ ሃዋዲን ያጊ ታማሪሱዋ ደሚዳ።

ቱሙ ኦንጁዋ ኦኪያ ኦሳቱዋ
(ሉቅ 6:20-23)

3 «ባሪንቱ ኦያና ዴዑዋን ሂዩሳ ጊዴዳዋ ኤሪያዋንቱ ኦንጁቲዳዋንታ፤
ኦዩሲ ጎፔ፣ ሳሉዋ ካወቱላይ ኡንቱንቱሳ።

4 ካዮቲያዋንቱ ኦንጁቲዳዋንታ፤
ኦዩሲ ጎፔ፣ ያሳይ ኡንቱንታ ሚኒሳና።

5 ኦሺኬ ጊዴዳዋንቱ ኦንጁቲዳዋንታ፤
ኦዩሲ ጎፔ፣
ኡንቱንቱ ሳዓ ላታና።

6 ዲሎቱላ ኮሻቲያዋንቱኔ ሳሜቲያዋንቱ *
ኦንጁቲዳዋንታ፤
ኦዩሲ ጎፔ፣ ያሳይ ኡንቱንታ ካሊሳና።

7 ማሪያዋንቱ ኦንጁቲዳዋንታ፤
ኦዩሲ ጎፔ፣
ያሳይ ኡንቱንታ ማራና።

8 ዎዛና ጌሻቱ ኦንጁቲዳዋንታ፤
ኦዩሲ ጎፔ፣
ኡንቱንቱ ያሳ ቤዓና።

5:4 ኦሳ 61:2 5:5 ማዝ 37:11 * 5:6 ሃዋ ቢላላይ ያሳው ኤኖ ጊያዋንታ ዎይ ሎዶባ ዎይ ቱዋባ ኦሊያዋንታ ጉሳ።

9 አሳ ሲጌሌያዎንቱ አንጃቴዳዎንታ፤
አዪሲ ጎፔ፣ ያሳይ ኡንቱንታ፡፡

ባሬ ናና ጊዴ ፃሳና፡፡

10 ዲሎቴላ ዲራው
ዬዴርሴቴያዎንቱ አንጃቴዳዎንታ፤

አዪሲ ጎፔ፣ ሳሉዋ ካወቴላይ ኡንቱንቱሳ፡፡ †

11 «ሂንቴ ታና ካሊያ ዲራው፣ አሳይ ሂንቴና ቦሪያ ዎዴኔ ዎዪሲያ ዎዴ፣ ቃሲ ሂንቴ ቦላ ኢታባ ኡባ ዎርዲዎን ሃሳዪያ ዎዴ፣ ሂንቴ አንጃቴዳዎንታ፡፡ 12 ሂንቴው ሳሉዋን ዎልቃማ ዎይታይ ዴዲያ ዲራው፣ ናሹቴቴ፤ ሃሹ ጊቴ፤ አዪሲ ጎፔ፣ አሳይ ሂንቴቴ ካሴ ዴዴዳ ናባቱዋ ሄዎዳን ዬዴርሴዲኖ፡፡

ማዲኒያኔ ፖዑዋ ለሚሱዋ
(ማር 9:50፤ ሉቅ 14:34-35)

13 «አሳ ኡባሲ ሂንቴ ማዲኒ ማላ፤ ሺን ማዲኒ ማልዳና ቆዮፔ፣ ዛሪዴ አ ዎቲ ማልዴላኔ? ካሬ ኦሊና፣ አሳይ አ ዬዲ ሃሜታናፔ ኦቲን፣ ሲንላው አይኔ ማዴና፡፡

14 «ሃ አላሚው ሂንቴ ፖ፣ ዴሪያ ሁጺያን ከፀቴዳ ካታማይ ጌማና ዳንዳዬና፣ 15 ያምፒያ ያምፒዴ፣ ሶዪን ዴዲያ አሳ ኡባው ፖዳና ማላ፣ ቶቂያ ሳን ዎሴፔ ኦቲን፣ ካሚያ ሚሻ ጊዲን ቁምዲ ዎሌያ አሳይ ኦኒኔ ባዎ፡፡ 16 ሄዎዳንካ፣ አሳይ ሂንቴ ኦሌያ ሎዎ ኦሱዋ ቤዲዴ፣ ሳሉዋን ዴዲያ ሂንቴ አወዋ ቦንቻና ማላ፣ ሂንቴ ፖዑ አሳ ሲንላን ፖ፡፡

ሙሴ ሂጊያባ

17 «ታኒ ሙሴ ሂጊያኔ ናባቱ ታማሪሲያዋ ‡ ቆዪሳናው ዬዳዎ ሂንቴው ማላቶፖ፤ ታኒ ፖላናው ዬዳዎፔ ኦቲን፣ ቆዪሳናው ያቤይኩ፡፡ 18 አዪሲ ጎፔ፣ ታኒ ሂንቴው ቱሙዋ ኦዳይ፤ ሳሉኔ ሳዳይ አቆና ጋካናው፣ ቃሲ ኡባባይካ ፖሌታና ጋካናው፣ § ሂጊያፔ ኢቲ ጫቻይካ ዎይ ቁሪ ፒዶሊካ አዴና፡፡ 19 ሄዎ ዲራው፣ ሃ አዛዙዋ ኡባፔ ጉዲያ ኢቲ አዛዙዋ ሜንሊያ ኡራይ ኦኒኔ፣ ቃሲ ሃራቱካ ባሬዎዳን ሃናናዳን ታማሪሲያ ኡራይ ኦኒኔ፣ ሳሉዋ ካወቴላን ኡባፔ ጉላ ጊዳና፤ ሺን አዛዙዋ ኦሌያዌኔ ሃራንቱካ ኦላናዳን ታማሪሲያዌ ኦኒኔ ሳሉዋ ካወቴላን ቶቃ ጊዳና፡፡ 20 አዪሲ

† 5:10 ሳሉዋ ካወቴላይ ኡንቱንቱሳ፡ ጉሳይ ሄ አሳቱ ሳሉዋ ካወቴላ ላታናው ዳንዳዪያዎንታ ጊዲያዎ ቤሴ፡፡ ‡ 5:17 ሙሴ ሂጊያኔ ናባቱ ታማሪሲያዋ፡ ጉሳይ አዪሁዲያ ገሻ ማፃፋ፤ ሃዌኔካ ኤጫ ጫቁዎ፡፡ § 5:18 ኡባባይካ ፖሌታና ጋካናው፡ ጉሳይ ቃላይ ታማሪሲያ ኡባይ ቱማቴላን ቆንጫና ጋካናው፡፡

ጎጥ፡ ሂንቴ ዓሎቴላይ ሙሴ ሂጊያ ታማሪሲያዋንቱ ዓሎቴላፔኔ ፓሪሳዋቱዋ ዓሎቴላፔ ዳራና ቆዮፔ፡ ሳሉዋ ካወቴላ ሂንቴ ሙሉ ጌሌናዋ ታኒ ኦዲይ።

21 «በኒ አሳው፡ ላሳ ዋዶፓ፤ አሳ ዋዶዳ ኦኒኔ ፐርዳታና) ጌዳዋ ሲሴዲታ። 22 ሺን ታኒ ሂንቴው ኦዲይ፤ ባሬ ኢሻ ሂንቴቲያ ኡባይ ፐርዳታና፤ ባሬ ኢሻ ቦሪያ ኡባይ ሻንጉዋ ፐርዳው ሺቃና፤ ቃሲ ባሬ ኢሻ፡ (ዱሎዌ) ጊያ ኡባይ ጋናሚያ ታማ ፐርዳው ሺቃና። 23 ሄዋ ዲራው፡ ኔኒ ያርሺያሳን ያርሺሺን፡ ኔ ኢሻ ናቄዳባይ ኔው ሄዋን ሃሳዬቶ፤ 24 ኔ ያርሹዋ ሄዋን አጋዴ ባ፤ ካሴታዳ ኔ ኢሻና ሲጌታ ዲጋ፤ ሄዋፔ ካላ ያዴ፡ ኔ ያርሹዋ ያርሻ።

25 «ኔና ሞቲያዋና ዋዲ ዳዲሺን ኤሌ አናና ሲጌታ ዲጋ፤ ሄዋ ቆዮ፤ ኢ ኔና ዳና ሲንሳ አሳና፤ ቃሲ ዳናይ ኔና ፖሊሴው አሉ አሚና፡ ፖሊሴ ኔና ቃሾ ጎሌን ዬጋና። 26 ታኒ ኔው ቱሙዋ ኦዲይ፤ ኔኒ ኢቲ ሳንቲሚ አቴና፡ ኔ ማጋጩዋ ዉርሳዴ ጨጋና ጋካናው፡ ሙሉካ ቃሾ ጎሌፔ ኬሳካ።

ዋሹማባው ኢሜቶ ቲሚርቲያ

27 « (ዋሹዋፓ) ጌዳዋ ሲሴዲታ። 28 ሺን ታኒ ሂንቴው ያጋይ፤ (ማጫዉኖ ዓሊዴ አሞቲያ ኡባይ፡ ባሬ ዋዛና ጊዶን ሄ ዋዴ አናና ዋሹሜዳ።) 29 ኔ ኡሼቻ አይፊ ኔና ናጋራ ኦሲሶፔ፡ ኔፔ ዋጫዴ ኦላ አጋ፤ አዪሲ ጎፔ፡ ኔ ቦላይ ሙሉካ ጋናሚያ ታማን ኦሌቲያዋ፤ አፔ ኢቱ ፓጩንቶ ኔው ሎዳ። 30 ቃሲ ኔ ኡሼቻ ኩሺ ኔና ናጋራ ኦሲሶፔ፡ ኔፔ ቃንዓዴ ኦላ አጋ፤ አዪሲ ጎፔ፡ ኔ ቦላይ ሙሉካ ጋናሚያ ታማን ኦሌቲያዋ፤ አፔ ኢቱ ፓጩንቶ ኔው ሎዳ።

ማቺያ ዬዴናዳን ኢሜቶ ቲሚርቲያ

(ማት 19:9፤ ማር 10:11-12፤ ሉቅ 16:18)

31 « (ቃሲ ባሬ ማቻቶ ዬዲያ ኦኒኔ ኢዞ ዬዲያ ፓራማ ኢሞ) ጌቴቲዳ። 32 ሺን ታኒ ሂንቴው ያጋይ፤ (ባሬ ማቻታ ዋሹሜናን ዳዲሺን ዬዲያ ኦኒኔ ኢዞ ዋሹማ ኬሴ፤ ቃሲ አሲናይ ዬዳዳ ሚሺራቶ አኪያዌ ኦኒኔ ዋሹሜ።)

ጫቄናዳን ኢሜቶ ቲሚርቲያ

5:21 ኬሰ 20:13፤ ዛር 5:17 5:27 ኬሰ 20:14፤ ዛር 5:18 5:29 ማት 18:9፤ ማር 9:47 5:31 ዛር 24:1-4፤ ማት 19:7፤ ማር 10:4 5:32 ማት 19:9፤ ማር 10:11-12፤ ሉቅ 16:18፤ 1ቆር 7:10-11

33 «ቃሲ ቤኒ አሳው፡ (ዎርዲዎን ጫቆፓ፤ ሺን ኔ ጎዳው ጫቂዳዎ ፖላ) ጌዳዎ ሲሴዲታ። 34 ሺን ታኒ ሂንቴው ያጋይ፤ (ኡባካ ጫቆፒቴ)፤ ሳሉ ያሳ ካዉቴላ ኦይዲያ ጊዲያ ዲራው፡ (ሳሉዎን ጫቆፒቴ) 35 ቃሲ ሳዓይ ኣ ጌዲ ዩዲያሳ ጊዲያ ዲራው፡ (ሳዓን ጫቆፒቴ)፤ ቃሲካ፡ ዩሩሳላሜ ዎልቃማ ካቲያ ካታማ ጊዲያ ዲራው፡ (ዩሩሳላሜኒካ ጫቆፒቴ) 36 ኔኒ እቲ ቢናናካ ቦላ ዎይ ካሬላ ኬሳናው ዳንዳዬና ዲራው፡ (ኔ ሁጲያንካ ጫቆፓ።) 37 ሺን ሂንቴ፡ (ኤ) ዎይ፡ (ጊዴና) ጌቴ፤ ሃዎንቴፕ ሃራይ ሴፃናፔ ዩ።

ኢታ ኢታን ዛሬናዳን ኢሜቶ ቲሚርቲያ
(ሉቅ 6:29-30)

38 « (አዪፊያ ዲራው አዪፊያ፤ አቻ ዲራው አቻ) ጌዳዎ ሲሴዲታ። 39 ሺን ታኒ ሂንቴው ያጋይ፤ (ሂንቴው ኢታባ ኦሊያ ኡራው ኢታን ዛርፒቴ፤ ኦኒኔ ኔ ኡሼቻ ባጋ ሻዪያ ባቆፔ፡ ኔ ሃዲርሳ ባጋ ሻዪያካ ኣ ቤሳ፤ 40 ኔ ሻሚጨያ አካናው እቲ ኡራይ ኔና ሞቶፔ፡ ሄ ኡራው ኔ ኮቲያካ ጉጃ አማ። 41 ኦኒኔ ኔና እቲ ሳቲያ ኦጊያ ባሬናና ባናዳን ዎልቃንላፔ፡ አናና ላዑ ሳቲያ ኦጊያ ባ። 42 ኔና ዎሲያ ኡራው አማ፤ ቃሲ ኔፔ ታልዓና ኮዪያ ኡራዉካ ዲሳፓ።)»

ሞርኪያ ሲቃና ማላ ኢሜቶ ቲሚርቲያ
(ሉቅ 6:27-36)

43 « (ኔ ለጌላቱዎ ሲቃ፤ ኔ ሞርኪያ ሞርካ) ጌዳዎ ሲሴዲታ። 44-45 ሺን ታኒ ሂንቴው ያጋይ፤ ሳሉዎን ዴዒያ ሂንቴ አዉዎሲ ናና ጊዳና ማላ፡ ሂንቴ ሞርኬቱዎ ሲቂቴ፤ ሂንቴና ሼቂያዎንታ ኣንጂቴ፤ ሂንቴና ኢዲያዎንቶ ሎዖባ ኡዲቴ፤ ሂንቴና ዩዳርሲያዎንቶ፡ ያሳ ዎሲቴ፤ አዪሲ ጎፔ፡ ኢታ አሳዉካ ሎዖ አሳዉካ ያሳይ ባሬ አዎ አዎዲሴ፤ ቃሲ ዒላቱዎሲካ ናጋራንቻቱዎሲካ ባሬ ኢራ ቡኪሴ። 46 ሂንቴ ሂንቴና ሲቂያዎንቱ ፃላላ ሲቆፔ፡ ሂንቴው አይ ዎይታይ ዴዒ? ሃራይ አቶ፡ ናጋራንቻቱካ ሃዎዳን ኡዲና። 47 ሂንቴ ሂንቴንቱ ኢሻቱዎ ፃላላ ሳርቶፔ፡ ሃራቱ ኡዲያዎፔ ኣዲያባ ኣያ ኡዴዲቴ? ሃራይ አቶ፡ አዪሁዴ ጊዴና አሳይካ ሃዎዳን ኡዴ። 48 ሃዎ ዲራው፡ ሳሉዎን ዴዒያ ሂንቴ አዉ ፖሎ ጊደዎዳን፡ ሂንቴካ ፖሎ ጊዲቴ።

5:33 ዎግ 19:12፤ ፓይ 30:2፤ ዛር 23:21 5:35 ኢሳ 66:1፤ ማዝ 48:2
5:38 ኬስ 21:24፤ ዎግ 24:20፤ ዛር 19:21 5:43 ኬስ 19:18 5:48
ኬስ 19:2፤ ዛር 18:13

6

ሂዬሳው አሚያ ማራ ታማሪሱዋ

1 «ሂንቲ ሎዖ ኦሱዋ አሳ ቤሳናው አሳ ሲንላን ኦፊና ማላ ናገቲቲ፤ ሄዌ ቆዮ፤ ሳሉዋን ዳዒያ ሂንቲ አዉ ሂንቲው ጋቲያ አሚና።

2 «ሄዋ ዲራው፡ ሂንቲ አዉዴኔ ሂዬሳው አሚያ ዎዴ፡ ሎዓ ማላቲያ ኢታቲ ባሬንታ ቦንቸሳናው፡ አዪሁዳ ዎሳ ጎሌኒኔ ኦጊያን ሃራኒ ቤዔታናው ኡዲያዎዳን ኡዶፒቲ፤ ታኒ ሂንቲው ቱሙዋ ኦዳይ፤ ኡንቱንቲ ባሬንቲ ጋቲያ አኪዲጌዲና። 3-4 * ሺን ኔኒ ሂዬሳው አሚያ ዎዴ፡ ጌማን አማናዳን፡ ኔ ኡሼቻ ኩሺ ኦሊያዎ ሃዲርሳ ኩሺ ኤሮፖ። ጌማን ኦፊዳዎ ቤዒያ ኔ አቡ፡ ኔ ሎዖ ኦሱዋ ጋቲያ ዛራናዎ።

ዎሳሳ

(ሉቅ 11:2-4)

5 «ዎሳ ዎሲዴ፡ ሎዓ ማላቲያ ኢታቲዎዳን ሃኖፒቲ፤ አዪሲ ጎፔ፡ ባሬንታ አሳይ ቤዓና ማላ፡ አዪሁዳ ዎሳ ጎሌኒኔ ኦጊያ ዶናን ኤቂዴ፡ ዎሳ ዎሲያዎ ዶሲና፤ ታኒ ሂንቲው ቱሙዋ ኦዳይ፤ ኡንቱንቲ ባሬንቲ ጋቲያ ኡባካ አኬዲና። 6 ሺን ኔኒ ዎሳ ዎሲያ ዎዴ፡ ኔ ጎሌ ጌላ፤ እፒሳ ቃቻዴ፡ ቤቴና ኔ አዉዎ ዎሳ፤ ጌማን ኦሴቶዎ ቤዒያ ኔ አቡ ኔው አማናዎ።

7 «ዎሳ ሂንቲ ዎሲያ ዎዴ፡ ዎሳ አማኔና አሳዳን፡ ጮ ማላ ዛሬሉዎ ዳሪሶፒቲ፤ ኡንቱንቲ ሃሳያ ዳራዎን ሲሴቴ ጊዴ ቆፒና። 8 ሄዋ ዲራው፡ ሄ አሳዳን ሃኖፒቲ፤ አዪሲ ጎፔ፡ ሂንቲ አቡ ሂንቲና ኩሺያዎ ሂንቲንቲ ዎሳናፔ ካሴቲዴ ኤሬ። 9 ሲሚ ሂንቲንቲ ሃዎ ማላ ዎሳ ዎሲቲ፤

ሳሉዋን ዳዒያ ኦ አቦ፡

ኔ ጌሻ ሱንላይ አንጃቶ።

10 ኔ ካዉቴላይ ዮ፤

ኔ ሼኒ ሳሉዋን ሃኔዳዎዳን፡

ሳዓንካ ሃኖ።

11 ጋላሳን ጋላሳን ኩሺያ ቁማ

ኡሲ ሃቺ አማ።

12 ኦኒ ኦና ናቆዎንቲሲ

አቶ ያጊያዎዳን፡

ኔኒካ ኦ ናቆዎ አቶ ጋ።

* 6:3-4 ኡሼቻ ኩሺ ኦፊዳዎ ሃዲርሳ ኩሺካ ኤሮፖ፡ ጉሳይ ያሳፔ አቲን፡ ኦኒኔ ኤሮፖ ጉሳ።

13 ኑና ኢታባፔ አሻፔ አቲን፡
 ፓጨያን ጌሊሶፓ።
 ካወቱላይ፥ ዎልቃይኔ ቦንቹ
 ሜዲናወካ ኔሳ።

አሜንግጋ)

14 «ሂንቴንቱ ሂንቴና ናቄዳ ሃራ አሳ ናቄዎ አቶ ጎፔ፥ ሳሉዋን ደዒያ ሂንቴንቱ አወካ ሂንቴው አቶ ጋና።

15 «ሺን ሂንቴንቱ ሂንቴና ናቄዳ ሃራ አሳ ናቄዎ አቶ ጋና ቆዮፔ፥ ሂንቴንቱ አወካ ሂንቴ ናቄዎ አቶ ጌና።

ጾማባ

16 «ቃሲ ሂንቴንቱ ጾሚያ ዎዴ፥ ሎዓ ማላቲያ ኢታቱዋዳን፥ ካዮቲያዎ ማላቶፔቴ፤ አዪሲ ጎፔ፥ ኡንቴንቱ ጾሚያዎ አሳይ ቤዓና ማላ፥ ባሬንቱ ሶምዒያ ቡላሊሲኖ፤ ታኒ ሂንቴንቶ ቱሙዎ ኦዳይ፤ ኡንቴንቱ ባሬንቱ ጋቲያ አኬዲኖ።

17-18 «ሺን ሂንቴንቱ ጾሚያ ዎዴ፥ ሂንቴንቱ አቡ ሂንቴ ጾሚያዎ ኤሮፔ አቲን፥ አሳይ ኤሬና ማላ፥ ሂንቴ ሶምዒያ ሜጨቴቴ፤ ሂንቴ ሁጲያካ ኦኬቲቴ፤ ያቶፔ፥ ቤቴና ሂንቴ አዉ ሂንቴንቱ ኦሊያዎ ጌማን ቤዒዴ፥ ሂንቴ ጋቲያ ኢማናዎ።

ሳሉዋን ደዒያ ሚሻባ
(ሉቅ 12:33-34)

19 «ሚሻ ቢልዓይ ሚያሳኒኔ ቢራታይ ሺዒዴ ባዪዚያሳን፥ ካዪሱካ ቦኪዴ ዉዒያሳን፥ ሃ ሳዓን ሂንቴንቱ ሁጲያሲ ዳጋዮፔቴ። 20 ሺን ቢልዓይ ሜናሳኒኔ ሺዒና ሳን፥ ካዪሱካ ቦኪዴ ዉዒና ሳን ሂንቴንቱ ሁጲያሲ ሳሉዋን ሚሻ ዳጋዪቴ። 21 አዪሲ ጎፔ፥ ኔ ዎዛናይ ኔ ሚሻይ ደዒያሳን ደዓና።

ቦላ ፖዑዋባ
(ሉቅ 11:34-36)

22 «ቦላ ፖዑ አይፊያ፤ ሄዎ ዲራው፥ ኔ አይፊ ፓፃ ጊደፔ፥ ኔ ቦላ ኡባይ ፖፃ ጊደና። 23 ሺን ኔ አይፊ ፓፃ ጊደና ቆዮፔ፥ ኔ ቦላ ኡባይ ቆማና፤ ሲሚ ኔናን ደዒያ ፖዑ ቆሞፔ፥ ቆማይ አይ ከና ዳራኔ!

ዴዑዋሲ ሂርጋናው ቤሴና
(ሉቅ 16:13፤ 12:22-31)

24 «ለዐ ጎዳቱዋሲ ሞዳታናው ዳንዳዪያዌ ኦኒኔ ባዋ፤ አዩሲ ጎፔ፣ ኢቱዋ ኢዲዳ፣ ዮኩዋ ሰቄ፤ ዋይ ኢቱዋ ቦንቸዳ፣ ዮኩዋ ካዴ፤ ኢቲ አሳይ ያሳሲኔ ሻሉዋሲ ሞዳታናው ዳንዳዪና።

25 «ሄዋ ዲራው፣ ታኒ ሂንቴንቶ ኦዳይ፤ ሂንቴ ዳዖ ማናባውኔ ኡሻናባው፣ ዋይ ሂንቴ ቦላው ማያናባው ሂርጎፕቴ፤ ሽምቸ ቁማፔ አዴኔ? ቃሲ ቦላይ ማዩዋፔ አዴኔ? 26 ፓሊያ ካፋቱዋ ያለቴ፤ ኡንቴንቱ ዜሪኪና፤ ጫኪኪና፤ ዲዪያንካ ቆሊኪና፤ ሺን ሳሉዋን ዳዒያ ሂንቴንቱ አዉ ኡንቴንታ ሚዜ፤ ሂንቴንቱ ኡንቴንቱፔ ሎይሊ ዳርኪቱ? 27 ሂንቴንቱ ጊዶን ዳሪሲ ሂርጊዳ፣ ባሬ ጌሳ ቦላ ኢቲ ዋቆ ጉጃናው ዳንዳዪያዌ ኦኒ?

28 «አዩሲ ማዩዋሲ ሂርጊቱ? ዳምባን ዳዒያ ጨሻቱ ዋቲ ዲጨሮንቶ፣ አከኪ ያለቴ፤ ኡንቴንቱ ዳቡሪኪና ዋይ ፑቱዋ ሱቱኪና። 29 ሺን ታኒ ሂንቴንቶ ኦዳይ፤ ሃራይ አቶ፣ ሶሎሞኔ ሄዋ ከና ቦንቸቱዳዋ ጊዲዳ፣ ሄ ጨሻቱዋፔ ኢቱዋ ማላካ ማዪቤና።

30 ሺን ለፋ አማኑ ዳዒያዋንቶ፣ ያሳይ፣ ሃቼ ዳዒዳ፣ ዋንቲ ታማን ኤዲያ ዳምባ ማታ ማዪዚያዌ፣ ሂንቴና ኡንቴዋፔ አሊዳ ዋቲ ማዪዜኔ? 31 ሲሚ፣ ሱኒ አያ ማኔ? ዋይ አያ ኡሻኔ? ዋይ አያ ማያኔ?» ያጊዳ ሂርጎፕቴ። 32 አዩሲ ጎፔ፣ ሄ ኡባባ ያሳ አማኔናዋንቱ ዳሪሲዳ ኮዩና፤ ሄ ኡባይ ሂንቴና ኮሺያዋ ሳሉዋን ዳዒያ ሂንቴንቱ አዉ ኤሬ። 33 ሺን ካሴቲዳ፣ ያሳ ካዉቱላኔ አ ዲሎቴላ ኮዩቲ፤ ኢ ሂንቴንቶ ሄ ኡባባ ኢማና። 34 ሄዋ ዲራው፣ ዋንቲባሲ ሂርጎፕቴ፤ አዩሲ ጎፔ፣ ዋንቲ ጋላሳይ ባሬው ሂርጋና፤ ጋላሳ ኡባዉካ አ ሁጴው ጊዲያ ዋዪ ዳዔ።

7

ሃራ አሳ ቦላ ፐርዳናው ኮሼና (ሉቅ 6:37-42)

1 «ያሳይ ሂንቴንቱ ቦላ ፐርዳና ማላ፣ ሂንቴካ ሃራቱዋ ቦላ ፐርዶፕቴ። 2 አዩሲ ጎፔ፣ ሂንቴንቱ ሃራቱዋ ቦላ ፐርዲያዋዳን፣ ያሳይ ሂንቴንቱ ቦላ ፐርዳና፤ ቃሲ ሂንቴንቱ ሃራቱዋሲ ኢማናው ማኪያባን ኢ ሂንቴው ማካና። 3 ኔ አይፊያን ዳዒያ ቱሳ ቤዓካ፤ ሺን ኔ አሻ አይፊያን ዳዒያ ሱላ አዩሲ ያለይ? 4 ዋይ ኔ አይፊያን ቱሳይ ዳዒሺን፣ ኔኒ ኔ አሻ፣ ሐታኒ ኔ አይፊያፔ ሱላ ከሶ) ዋናዳ ጋናው ዳንዳያይ? 5 ላ ሃ ሎዑዋ ማላቲያ ኢታው!

6:28 1ካት 10:4-7፤ 2ኦድ 9:3-6

ካሴታዳ ኔ አይፊያፔ ቱሳ ከሳዲጋ፤ ሄዋፔ ጉዩያን፣ ኔ አሻ አይፊያፔ ሱላ ከሳናው ገሻዴ ያላናው ዳንዳያ።

6 «ገሻባ ካናቱዋሲ አሞፕቴ፤ ኡንቱንቱ ጉዩ ሰሚዳ፣ ሂንቱና ሳሳና። ቃሲ ኢንቁዋ ጌቱቲያ ሂንቱንቱ አልፎ ሹቻ ጉዳንጎቱዋ ሲንጎን ኦሎፕቴ፤ ኡንቱንቱ ባሪንቱ ጌዲያን ዩዳና።

ዋሲቱ፣ ኮዩቱ፣ ካሪያኮ ዩዳ ያሲቲ
(ሉቅ 11:9-13)

7 «ዋሲቱ፤ ሂንቱ አካና። ኮዩቱ፤ ሂንቱ ዳማና። ካሪያኮ ዩዳ ያሲቱ፤ ሂንቱው ፔንጊ ዶዬታና። 8 አዩሲ ጎፔ፣ ዋሲያ ኡባይ አካና፤ ኮዩያ ኡራይ ዳማና፤ ቃሲ ካሪያኮ ዩዳ ያሲያ ኡራው ፔንጊ ዶዬታና። 9 ዋይ ሂንቱንቱ ጊዶን ባሪ ናዓይ፣ «ኡኪላ አማ» ጎፔ፣ ሹቻ አሚያ አዉ ዳዒ? 10 ቃሲ፣ «ሞሊያ አማ» ጎፔ፣ አው ሸሻ አማናዋ? 11 ሂንቱንቱ ኢታ ጊዲዳ፣ ሂንቱንቱ ናናቱዋሲ ሎፖ አሚያዋ ኤሮፔ፣ ያቲና፣ ሳሎዋን ዳዒያ ሂንቱንቱ አዉ ባሪና ዋሲያዋንቱሲ ሎፖ ዋቲ ዳሪሲ አሜኔ!

12 «ሃዋ ዲራው፣ ሃራ አሳይ ሂንቱው አላናው ኮዩያ ኡባባ ሂንቱካ አሳው አሊቱ፤ አዩሲ ጎፔ፣ ሙሴ ሂጊያ ቢሌላይኔ ናባቱ ታማሪሲያዌ ሃዋ።

ኡንዓ ፔንጊያባ
(ሉቅ 13:24)

13 «ኡንዓ ፔንጊያና ጌሊቱ። አዩሲ ጎፔ፣ ባዬላው አፊያ ፔንጊ አኩዋ፤ ኦጊካ ዋጋ። ሄዋና ጌሊያ አሳይካ ጮራ።

14 «ሺን፣ ዴፖ አፊያ ፔንጊ ኡንዓ፤ ኦጊካ ፀንላ። ቃሲ ሄዋ ዴሚያዋንቱካ ጉላ።

ሚላይ ባሪ አይፊያን ኤሬቲ
(ሉቅ 6:43-44)

15 «ቦላ ባጋና ዶርሳ ማላቲዳ፣ ሂንቱኮ ዩያ ዋርዶ ናባቱዋፔ ናጌቱቱ፤ ሺን ኡንቱንቱ ጋርሳ ባጋና ዋላቱዋ ማላ። 16 ኡንቱንቱ አይፊያ አይፊያዋን ሂንቱ ኡንቱንታ ኤራና፤ አገንላይ ዋዴንላ አይፊያ አይፊና፤ ጎሚያሪካ ኮኪያ አይፊያ አይፊና። 17 ሄዋዳንካ፣ ሎፖ ሚላ ኡባይ ሎፖ አይፊያ አይፊ፤ ሺን ኢታ ሚላይ ኢታ አይፊያ አይፊ። 18 ሎፖ ሚላይ ኢታ አይፊያ አይፋናው ዳንዳዬና፤ ቃሲ ኢታ ሚላይካ ሎፖ አይፊያ አይፋናው ዳንዳዬና። 19 ሎፖ አይፊያ አይፊና ሚላ ኡባይ ቃንጻቲዳ፣ ታማን ዩጌታና። 20 ሄዋ ዲራው፣ ሂንቱ ኡንቱንቱ አይፊያ አይፊያዋን ኡንቱንታ ኤራኒታ።

21 «ሳሉዋን ደዲያ ታ ኣቡ ጌዳዋ ኦሊያ ኡራይ ሳሉዋ ካዉቲል ጌላናፔ ኣቲን፣ ሳዳው፣ ጎዳው፣ ጌያ ኡባይ ጌሌና። 22 ፒርዳ ጋላሲ ዳር ኣሳይ ታና፣ ሳዳው፣ ጎዳው፣ ኦኒ ኔ ሱንላን ያሳይ ከቶዋ ኦዲቤይኮ? ኔ ሱንላን ያላሃቱዋ ከሲቤይኮ? ቃሲ ኦኒ ያሳይ ኦሊያ ማላሊሲያባ ኔ ሱንላን ኦሊቤይኮ?» ያጋናዋንታ።
 23 ታኒ ሄ ዋዴ ኡንቲንታ፣ ታኒ ሂንቴና ኡባካ ኤሪኬ፤ ኢታባ ኦሊያዋንቲ ሂንቴ ታ ማታፔ ሃኪቴ» ያጋና።

ላዑ ማላ ጎላቱዋ
 (ሉቅ 6:47-49)

24 «ሃዋ ዲራው፣ ሃዋ ታ ቃላ ሲሲዴ ኦሊያ ኡባይ ሚና ዛላ ቦላ ባሬ ጎሊያ ከፃዳ ዋዛናማ ኣሳ ማላ። 25 ኡራይ ቡኪዴ፣ ዲዑ ዲዔዴ፤ ጫርኩካ ጫርኪዴ፣ ሄ ጎሊያ ሱጌዳ። ሺን ጎሊ ሚና ዛላ ቦላ ከፃቴዳ ዲራው፣ ኩንዲቤና።

26 «ሃዋ ታ ቃላ ሲሲዴ ኦሊና ኣሳይ ኡባይ፣ ባሬ ጎሊያ ሻፊያ ቦላ ከፃዳ ቦዛ ኣሳ ማላ። 27 ኡራይ ቡኪዴ፣ ዲዑ ዲዔዴ፤ ጫርኩካ ጫርኪዴ፣ ሄ ጎሊያ ሱጌና፣ ጎሊ ኤሌካ ኩንዴዳ። ሄ ጎሊ ዋልቃማ ኩንዴዳ ኩንዴዳ።»

28 ዩሱሲ ባሬ ሃሳዩያዋ ዉርሴዳ ዋዴ፣ ኣሳይ ኢ ታማሪሲያዋን ማላሌቲዲና። 29 ኣዩሲ ጎፔ፣ ኢ ኡንቲንታ ታማሪሲዴ፣ ሙሴ ሂጊያ ታማሪሲያዋንቲዳን ጊዴናን፣ ማታይ ደዲያ ኣሳዳን ታማሪሲ ዲራሳ።

8

ዩሱሲ ኦሉ ኦይቄዳ ቢታኒያ ፓሌዳ
 (ማር 1:40-45፤ ሉቅ 5:12-16)

1 ዩሱሲ ዳሪያፔ ዋዴዳ ዋዴ፣ ጮራ ኣሳይ ኣ ካሌዳ። 2 ሄ ዋዴ ኦሉ * ኦይቄዳ ኢቲ ቢታኒ ዩሱሳኮ ዩ ኣ ሲንላን ጉልባቲዴ፣ «ጎዳው፣ ኔ ሺኔ ጊደፔ፣ ታና ፓላዴ ጌሻናው ዳንዳያ» ያጌዳ።

3 ዩሱሲ ባሬ ኩሺያ ዩዲ ኣ ቦቺዴ፣ «ታኒ ኮያይ፤ ፓዓዴ ጌያ!» ያጌዳ። ኤሌካ ኦሉ ቢታኒያ ዩዲ ኣጌዳ። 4 ዩሱሲ ኣ፣ «ሲሚ ሃዋ ኦሲኔ ኦደፓ፤ ሺን ቄሳኮ ባዴ ኔ ፓዓዴ ጌዩዳዋ ኣ ቤሳ፤ ኔ ፓዓዴ ጌዩዳዋ ኣሳ ኤሪሳናው ሙሴ ኣዛዜዳ ያርሹዋ ያሳው ያርሻ» ያጌዳ።

7:23 ማዘ 6:8 * 8:2 ኦሉ ኦይቄዳ ኣሳ ቦላይ ቦፃ። ሃዩ ሳኪያ ኣሳይ ሄዋዴ ዴዑዋን ኣሳና ደዲያ ዋጋ ኡባፔ ሻኬቲዴ ደዴ። ቃይካ ጌሻ ጊዴና ጌቲቲዴ ሃራ ኣሳን ፃሴቲ። 8:4 ዋግ 14:1-32

**ዩሱሲ ጭቅዋ ካፑዋ ቆማ ፓሌዳ
(ሉቅ 7:1-10)**

5-6 ዩሱሲ ቁፊሪናሆማ ካታማ ጌሌዳ ዎዴ፡ ኢቲ ሮማ ጋዴ ጭቅዋ ካፑ ኣኮ ዩዴ፡ «ታ ጎዳው፡ ታ ቆማ ቦላይ ጉንዲና፡ ዳሮ ሳኬቲዳ፡ ሶዩን ጊሴዳ፤ ሃያጎዶ ታው ፓላሪኪ» ያጊ ዎሴዳ።

7 ዩሱሲ፡ «ታኒ ባዴ ኣ ፓላና» ያጌዳ።

8 ሺን ጭቅዋ ካፑ ዛሪዴ፡ «ታ ጎዳው፡ ኔና ታ ሶይ ጌሊሳናው ታው ቤሴና፤ ሺን ኔኒ ቃላ ፃላላ ሃሳያ፤ ታ ቆማይ ፓፃናዎ።

9 ኣዩሲ ጎፔ፡ ታኒ ታፔ ቦላና ዴዲያዎንቶ ኤና ጊያ ኣሳ፤ ቃሲ ታፔ ጋርሳና ዎታዳራቲ ዴዲና። ታኒ ኢቲዎ፡ «ባ!» ጎፔ ቤ፤ ቃሲ ዮኩዎ፡ «ሃያ!» ጎፔ ዩ፤ ታ ቆማ፡ «ሃዎ ኦላ!» ጎፔ ኦሌ» ያጌዳ።

10 ዩሱሲ ሄዎ ሲሴዳ ዎዴ ማላሌቲዳ፡ ባሪና ካሊያ ኣሳ፡ «ታኒ ሂንቲው ቱሙዎ ኦዳይ፤ ታኒ ሃዎ ማላ ኣማኑዎ ሃራይ ኣቶ፡ ኢሰራዔሊያ ጋዲያንካ ቤዓቤይኬ። 11 ጮራ ኣሳይ ኣዎይፊ ዶሊያ ባጋፔኔ ዉሊያ ባጋፔ ዩዴ፡ ኣብራሃሞና፡ ዩሳቃናኔ ያዩቆባና ሳሉዎ ካዉቲላ ጋዩታን ኢቲፔ ኡታናዎንታ ያጋይ። 12 ሺን ካዉቲላን ዴዳናው ቤሲያ ኣሳይ ዎልቃማ ቆማ ጋርሳ ካሬ ኦሌታና፤ ሄዎን ኡንቲንቲ ዩካናኔ ባሬንቲ ኣቻ ቆቃናዎንታ» ያጌዳ።

13 ሄዎፔ ካላ ዩሱሲ ጭቅዋ ካፑዎ፡ «ኔ ሶይ ባ፤ ኔኒ ኣማኔዳዎዳን ኔው ሃና» ያጌዳ፤ ጭቅዋ ካፑዎ ቆማይ ሄ ሳቲያንካ ፓዲ ኣጌዳ።

**ዩሱሲ ጮራ ኣሳቲዎ ኡንቲንቲ ሃርጊያፔ ፓሌዳ
(ማር 1:29-34፤ ሉቅ 4:38-41)**

14 ዩሱሲ ጳዲሮሳ ሶይ ቢዴ፡ ኣ ቦሎታታ ቆፀዎ ሃርጋዴ ጊሴዳዉኖ ቤዔዳ። 15 ኢዚ ኩሺያ ዩሱሲ ቦቺና፡ ቆፀ ኢዞ ባሺ ኣጌዳ፤ ኢዞካ ዴንዳዴ ኣው ሚያባ ጊሊሳዲ።

16-17 ሳዓይ ኦማርሴዳ ዎዴ፡ ኣሳይ ኢታ ኣያናቲ ኦይቄዳ ጮራ ኣሳ ዩሱሳኮ ኣሄዳ፤ ናቢያ ኢሲያሲ፡ «ኢ ኑ ዳቡራ ባሬው ኣኬዳ፤ ቃሲ ኑ ሃርጊያካ ቶኬዳ» ያጌዳዌ ፖሌታና ማላ፡ ዩሱሲ ኢታ ኣያናቲዎ ባሬ ቃላን ኬሲዴ፡ ሃርጌዳ ኣሳ ኡባካ ፓሌዳ።

**ዩሱሳ ካሊያዎንታ ጋኪያ ማቲዎ
(ሉቅ 9:57-62)**

18 ዩሱሲ ጮራ ኣሳይ ባሬ ዩሹዎን ዴዲያዎንታ ቤዔዴ፡ ኣባፔ ሄሬንላ ፒናና ማላ፡ ባሬና ካሊያዎንታ ኣዛዜዳ። 19 ሄዎፔ ጉዩያን

ሙሴ ሂጊያ ታማሪሲያ ኢቱ ኣኮ ዪዳ፥ «ታማሪሲያዎ፥ ኔኒ ቢያሳ ኡባ ታኒ ኔና ካላና» ያጌዳ።

20 ዬሱሲ ኣ፥ «ዎራካናቱዋሲ ኦላይ ዳዔ፤ ካፋቱዋሲካ ከላይ ዳዔ፤ ሺን ታው፥ ኣሳ ናዓው፥ ሸምፓ ኣኪያሳይካ ባዋ» ያጌዳ።

21 ቃሲ ካሊያዋንቱፍ ኢቱ ዬሱሳ፥ «ጎዳው፥ ታኒ ሲንሳታ ባዳ ታ ኣባ ሞጋናው ባ ያጋሪኪ» ያጌዳ።

22 ሺን ዬሱሲ ኣ፥ «ኔኒ ታና ካላ፤ ሃይቄዳዋንቱ ባሬንቱ ኣጋ ሞጊኖ» ያጌዳ።

ዬሱሲ ጎቱዋኔ ቤታ ጮው ኦሌዳ

(ማር 4:35-41፤ ሉቅ 8:22-25)

23 ዬሱሲ ዋንጊሪያን ጌሎዳ፥ ኣ ካሊያዋንቱ ኣናና ቤዲኖ።

24 ቤታይ ዋንጊሪያ ሚታና ጋካናው፥ ኣባን ዋልቃማ ሆቢ ዴንዳዳ፤ ሺን ዬሱሲ ጌሚዒሼዳ። 25 ኣ ካሊያዋንቱ ኣኮ ቢዳ፥ ጌሚዒሹዋፍ ዴንፊዲኖ፤ ሃዋፍ ሲሚዳ ኣ፥ «ጎዳው፥ ኮኒ ጳዬቶ፤ ኮና ኣሻሪኪ» ያጌዲኖ።

26 ዬሱሲ ኡንቱንታ፥ «ሃ ኣማኑ ፓጩዳዋንቶ፥ ኣዪሲ ያዩቱ?» ያጌዳ። ሃዋፍ ጌዩያን ዴንዲዳ፥ ጎቱዋኔ ቤታ ኣገቱ ገና፥ ጎቱኔ ቤታይ ጮው ጌዳ።

27 ኣሳይ ማላላቲዳ፥ «ሃዋ ላ ሃራይ ኣቶ፥ ጎቱኔ ቤታይ ኣዛዘቲያዌ ኣይባ ኣሴ?» ያጌዲኖ።

ዬሱሲ ኢታ ኣያናይ ኦይቄዳ ላው ኣሳቱዋ ፓሌዳ

(ማር 5:1-20፤ ሉቅ 8:26-39)

28 ዬሱሲ ጋሊላ ኣባፍ ሄሬንሳን ዳዒያ ገርጌሴናና ጌቲቲያ ጋዲያ ፒኔዳ፤ ኢታ ኣያናቱ ኦይቄዳ ላው ኣሳቱ ሄ ጋዲያን ዳዒያዋንቱ ዲፋዋፍ ከሲዳ፥ ኣናና ጋከቲዲኖ። ኡንቱንቱ ዳር ኢታ ጊዲያ ዲራው፥ ኦኒኔ ሄ ኦጊያና ኣቆናው ዳንዳዪቤና።

29 ኡንቱንቱ ባሬንቱ ቃላ ጳቄ ኦሊዳ፥ «ዳሳ ናዓው፥ ኮናና ኔው ኣዪ ኣላሊ ዳዒ? ዋዲ ጋከናን ኮና ሙራናው ያዲ?» ያጌዲኖ።

30 ኡንቱንቱ ላፋ ሃኪያሳን ጉዲንሳ ዉዲ ሃሚቱ። 31 ኢታ ኣያናቱ ዬሱሳ፥ «ኔኒ ኮና ከሲያዋ ገዶፍ፥ ሂኒ ጉዲንሳ ዉዲያ ገዶ ዬዳርኪ» ያጌዳ ዋሴዲኖ።

32 ዬሱሲ ኡንቱንታ፥ «ቢቲ!» ገና ኡንቱንቱ ቢታናቱዋፍ ከሲ ቢዳ፥ ጉዲንሳቱዋን ጌሌዲኖ። ጉዲንሳ ዉዲ ኡባይ ካካ ላንቄያና ካጆቲዳ፥ ኣባን ጌሊዳ፥ ሚቲቲ ኣጌዲኖ።

33 ጉዲንሳ ዉዲያ ሂሚያዋንቱ ባቃቲዳ ካታማ ቢ ኣጌዲኖ፤ ቤዳሳን ኢታ ኣያናቱ ኦይቄዳ ኣሳቱ ሃኔዳባ ኡባ ኦዳዲኖ። 34 ሃዋ

ሲሴዳ ካታማን ዴዲያ አሳይ ኡባይ ዩሱሳና ጋኬታናው ከሴዲኖ፤ ኣ ቤዔዳ ዋዴ፤ ባሪንቱ ጋዲያፕ ባና ማላ ዋሴዲኖ።

9

ዩሱሲ ቦላይ ጉንዳዳ ቢታኒያ ፓሌዳ

(ማር 2:1-12፤ ሉቅ 5:17-26)

1 ሃዋፔ ካላ ዩሱሲ ዋንጊሪያን ጌሊዴ፤ አባ ፒኒዴ፤ ባሪ ካታማ ዩዳ። 2 አማራዳ አሳይ ቦላይ ጉንዳዳዳ ኢቲ ቢታኒያ ሻንቻማን ቶኪዴ፤ ዩሱሳኮ ኣሄዲኖ፤ ዩሱሲ ኡንቱንቱ አማኑዋ ቤዒዴ፤ ቦላይ ጉንዳዳዳ ቢታኒያ፤ «ታ ናዓው፤ ያዮፓ፤ ኔ ናጋራይ አቶ ጌቱቲዳ» ያጌዳ።

3 ሂጊያ ታማሪሲያዋንቱፔ ኢቱ ኢቱ ባሪንቱ ዋዛና፤ «ላ ሃ ቢታኒ ያሳ ቦላ ኢታባ ሃሳዬፔ!» ያጌ ቆፕዲኖ።

4 ዩሱሲ ኡንቱንቱ ቆፋ ኤሪዴ፤ ኡንቱንታ ሃዋዳን ያጌዳ፤ «ሂንቱንቱ ሂንቱ ዋዛናን ሃዋ ማላ ኢታባ አዩሲ ቆፕቲ? 5 ሳ ናጋራይ አቶ ጌቱቲዳ) ያጊያዌ ማቲዬ? ዋይ፤ ሎንዳ ኤቃዴ ሃማታ) ያጊያዌ ማቲ? 6 ሺን ሳዓ ቦላን ናጋራ አቶ ጋናው ታው፤ አሳ ናዓው፤ ማታይ ዴዲያዋ ታኒ ሂንቲና ኤሪሳና» ያጌዴ፤ ሄዋፔ ጉዬ ኢ ሄ ቦላይ ጉንዳዳ ቢታኒያ፤ «ዴንዳ ኤቃ፤ ያታዴ ኔ ሻንቻማ ቶካዴ፤ ኔ ጎሌ ባ» ያጌዳ።

7 ጉንዳዳ ቢታኒካ ዴንዲ ኤቂዴ፤ ባሪ ጎሌ ቤዳ። 8 ሺን ዳር አሳይ ሄዋ ቤዒዴ ያዩዲኖ፤ አሳው ሃዋ ማላ ማታ ኢሜዳ ያሳ ጋላቲዲኖ።

ዩሱሲ ለዊያ ማቶሳ ያሴዳ

(ማር 2:13-17፤ ሉቅ 5:27-32)

9 ዩሱሲ ሄዋና አዲዴ፤ ማቶሳ ያጊያዌ ቃራፃ ቃንዲያ ሳን ኡቴዳዋ ዴሚዴ አ፤ «ታና ካላ» ያጌዳ።

ማቶሲካ ዴንዲ ኤቂዴ፤ አ ካሌዳ።

10 ዩሱሲ ማቶሳ ጎሌን ቁማ ማናው ኡቲ ዴዒሺን፤ ቃራፃ አኪያ ጮራ አሳይኔ ናጋራንቻቱ ዩዴ፤ አናናኔ አ ካሊያዋንቱና ኢቲፔ ጋዩታን ኡቴዲኖ። 11 ኢቲ ኢቲ ፓሪሳዋቱ ሄዋ ቤዒዴ፤ ዩሱሳ ካሊያዋንታ፤ «ሂንቲና ታማሪሲያዌ ቃራፃ ቃንዲያዋንቱና ናጋራንቻቱዋና ቁማ አዩሲ ኢቲፔ ሚ?» ያጌዲኖ።

12 ሺን ዩሱሲ ኡንቱንቱ ያጊያዋ ሲሲዴ፤ «ሃርጋንቻቱዋሳፔ አቲን፤ ፓፃቱዋሲ አኪሚ ኮሺና። 13 ሺን ሂንቱንቱ ቢዴ፤ ያሳ ማፃፋይ፤ ታኒ ማርቴሳ ኮያይፔ አቲን፤ ያርሹዋ ኮዩኬ) ያጊያዌ

ዋጊያዊንቶ ኤሪቴ፤ አዩሲ ጎፔ፣ ታኒ ናጋራንቻቱዋ ያሳናው ዩዳዋፔ አቲን፣ ዲላቱዋ ያሳናው ያቤይኬ» ያጌዳ።

ያማባ ኦቼዳ ኦሻ
(ማር 2:18-22፤ ሉቅ 5:33-39)

14 ሄ ዎዴ ዮሃንሳ ካሊያዋንቱ ዩሱሳኮ ዩዳ፣ «ኮኒኔ ፓሪሳዋቱ ኡባ ዎዴ ያሜቶ፤ ሺን ኔና ካሊያዋንቱ አዩሲ ያሚከኖ?» ያጌዴ ኦ ኦቼዲኖ።

15 ዩሱሲ ኡንቱንታ፣ «ቡላቻ ዩዳ አሳይ ማቻቶ አኪያዋ ባሬንቱና ዴዒሺን፣ ካዮታናው ዳንዳዩኖ? ዳንዳዩኪኖ፤ ሺን ማቻቶ አኪያዋ ኡንቱንቱ ማታፔ አፋና ዎዲ ያና፤ ኡንቱንቱ ሄ ዎዴ ያማናዋንታ» ያጌዳ።

16 «ኤጫ ማዩዋ ቦላ ኦራላ ዴፊያ ዎሊዴ ሲኪያ አሳይ ባዋ፤ አዩሲ ጎፔ፣ ኦራላ ዴፊ ኤጫ ማዩዋ ፔዴሬላና፤ ፔዴላይካ ካሲዎፔ ዳራናዎ። 17 ሆዎ ዎዩኒያ ኤሳ ኤጫ ኦጎሩዋን ናዒያ አሳይ ባዎ። ሺን ናዮፔ፣ ሄ ዎዩኒያ ኤሳይ ኦጎሩዋ ዳካና፤ ባሬዉካ ዎፊታና፤ ኦጎሩካ ባያናዎ። ሺን፣ ሆዎ ዎዩኒያ ኤሳ ኦራላ ኦጎሩዋን ናናናው ቤሴ፤ ላዑካ ባይከኖ» ያጌዳ።

ያዒሮሳ ናቲባኔ ዩሱሳ ማዩዋ ቦቼዳ ሚሺራቲባ
(ማር 5:21-43፤ ሉቅ 8:40-56)

18 ዩሱሲ ኡንቱንቶ ሄዎ ኦዲሺን፣ አዩሁዴ ዎሳ ጎሌ ካፓቱዋፔ አቱ አኮ ዩ አ ሲንላን ጉልባቲዴ፣ «ታ ናታ ሃዒ ሃይቃዲ፤ ሺን ኔኒ ያዴ ኔ ኩሺያ ኢዚ ቦላ ዎላሪኪ፤ ኢዛ ዴዑዋን ዴናናዉኑ» ያጌዳ።

19 ዩሱሲ ዴንዲዴ፣ ባሬና ካሊያዋንቱና አቲፔ ቢታኒያ ካሊዴ ቤዳ። 20 ሄ ዎዴ ታማኔ ላዑ ላይላ ኩሜንላ፣ ኢዚ ቦላፔ ሱላይ ጎጊያ አቲ ሚሺራታ ጉዩና ሺቃዴ፣ ዩሱሳ ማዩዋ ማጫራ ቦቻዲ። 21 ሃዎ ኢዛ ኡዶዎ፣ ኢዛ ባሬ ዎዛናን፣ «ታኒ ኦ ማዩዋ ዓላላ ቦቻንቶ ፓዓና» ያጋዴ ቆፓዲ።

22 ሺን ዩሱሲ ዩዩ ኢዛ ያሊዴ፣ «ታ ናቱ፣ ያዮፓ፤ ኔና ኔ አማኑ ፓሌዳ» ያጌዳ። ሄ ማንዒያንካ ሚሺራታ ፓዓ አጋዲ።

23 ዩሱሲ አዩሁዳ ዎሳ ጎሌ ካፑዋ ሰይ ጋኬዳ ዎዴ፣ ዩኩዋን ዲንካ ፑኒያ አሳኔ ዩኪያ አሳ ቤዒዴ፣ 24 «ካሬ ኬሲቲ፤ ጉላ ናታ ጌሚዒሻዲፔ አቲን፣ ሃይቃቤይኩ» ያጌዳ። ሃዎፔ ጉዩያን አሳይ ኦ ቦላ ዴሪ ሚጮዳ። 25 ሺን ጮራ አሳ ካሬ ኢ ኬሴዳዋፔ ጉዩያን፣ ጎሌ ጌሊዴ፣ ናቲ ኩሺያ ኦይቄዴ፤ ናታካ ዴንዳ አጋዲ። 26 ሄ ዎሪ፣ ሄ ማንዒያንካ ሄ ጋዲያን ኡባን ሲሴቲዳ።

ዩሱሲ ላዑ ቆቃቱዋ ፓሌዳ

27 ዩሱሲ ሄዋና አዲዳ ቢያ ዋዳ፣ ላዑ ቆቃቱ ባሬንቱ ቃላ ቆቆ ኡዲዳ፣ «ዳዊቱ ናዓው፣ ኑና ማራሪኪ» ያገደ ኣ ካሌዲኖ።

28 ዩሱሲ ጎሌ ጌሌዳ ዋዳ፣ ቆቃቱ ኣኮ ዩዲኖ፤ ዩሱሲ ኡንቱንታ፣ «ታኒ ሃዋ ኦላናው ዳንዳዪያዋ ኣማኒቲ?» ያገደ።

ኡንቱንታ፣ «ኤ ጎዳው» ያገ ዛሬዲኖ።

29 ሄዋፕ ጉዪያን፣ ዩሱሲ ኡንቱንታ ኣይፊያ ባሬ ኩሺያን ቦቲዳ ኡንቱንታ፣ «ሂንቲው ሂንቲንቲ ኣማኑዋዳን ሃኖ» ያገደ።

30 ኡንቱንታ ኣይፊ ዶዬቲ ኣጌዳ፤ ዩሱሲ ኡንቱንታ፣ «ሃዋ ኦሲኔ ኦዶፕቲ» ያገደ ማኒሲዳ ኦዳዳ። 31 ሺን ኡንቱንታ ቢዳ፣ ሄ ጋዲያ ኡባን ዩሱሳባ ኦዳዲኖ።

ዩሱሲ ኢቲ ዲዲያ ፓሌዳ

32 ኡንቱንታ ኬሲዳ ቢያ ዋዳ፣ ኣማራዳ ኣሳይ ኢታ ኣያናይ ኦይቂና ዲዳዳ ቢታኒያ ዩሱሳኮ ኣሄዲኖ። 33 ዩሱሲ ኢታ ኣያና ኬሴዳዋፕ ጉዪያን፣ ዲዳ ቢታኒ ሃሳዬዳ። ኣሳይ፣ «ሃዋ ኦራላባ፤ ሃዋ ማላባይ ኢሰራዔሊያ ጋዲያን ኡባካ ሃኒቤና» ያገ ማላሌቲዲኖ።

34 ሺን ፓሪሳዋቲ፣ «ኢ ኢታ ኣያናቱዋ ካፑዋ ዋልቃን ፃላሃቱዋ ኬሴ» ያገደዲኖ።

ዩሱሲ ኣሳሲ ቃሬቲዳ

35 ዩሱሲ ኡንቱንታ ኣዪሁዳ ዋሳ ጎሌቱዋን ታማሪሲዳ ካወቲላ ዋንጋላ ሚሺራቹዋ ኦዲዳ፣ ቃሲ ሃርጊያ ኡባፕኔ ሳኩዋ ኡባፕ ኣሳ ፓሊዳ፣ ዋጋ ካታማቱዋኒኔ ቄሪ ካታማቱዋ ኡባን ዩዬዳ። 36 ጮራ ኣሳ ቤዒዳ፣ ሄሚያ ኣሳይ ባይና ዶርሳዳን ኣሳይ ሃርጌቲያ ዲራወኔ ኣሳ ማዲያባይ ባይና ዲራው፣ ኣሳው ቃሬቲዳ። 37 ያቲዳ ባሬና ካሊያዋንታ፣ «ቆይቻው ጋካ ካላይ ዲራ፤ ሺን ጫኪያ ኣሳይ ጉላ። 38 ሲሚ ካላ ጎዳይ ካላ ጫካናው ኦሳንቻቱዋ ዩዳና ማላ፣ ኣ ዋሲቲ» ያገደ።

10

ዩሱሲ ኪቲዳ ታማኔ ላዑ ኣሳቱዋባ
(ማር 3:13-19፤ ሉቅ 6:12-16)

9:34 10:25፤ 12:24፤ ማር 3:22፤ ሉቅ 11:15 9:35 ማት 4:23፤ ማር 1:39፤ ሉቅ 4:44 9:36 ፓይ 27:17፤ 1ካት 22:17፤ 2ኡድ 18:16፤ ሂዝ 34:5፤ ማር 6:34

1 ዩሱሲ ባሬ ታማኔ ላዑ ካሊያዋንታ ያሲዳ፣ ኡንቴንቱ ኢታ ኣያና ኬሳና ማላ፣ ቃሲ ሃርጊያ ኡባኔ ሳኩዋ ኡባ ፓላና ማላ፣ ኡንቴንቶ ማታ ኢሜዳ። 2 ዩሱሲ ኪቴዳ ታማኔ ላዓቱዋ ሱንጎይ፣ ኮይሮዌ ጳዒሮሳ ጌቴቲያ ሲሞና ኣ ኣሻ ኢንዲራሳ፣ ዛቢዲዮሳ ናና፣ ያዪቆባኔ ዮሃኒሳ፣ 3 ፒሊጶሳ፣ ባርታላሞሳ፣ ቶማሳ፣ ቃራፃ ኣኪያ ማቶሳ፣ ኢልፒዮሳ ናዓ ያዪቆባኔ ታዶሳ፤ 4 ባሬ ጋዴው ቃሬቲያ ሲሞናኔ ዩሱሳ ኣሉ ኢሜዳ ኣሰቆሮቱ ዪሁዳ።

ዩሱሲ ኪቴዳ ታማኔ ላዓቱ ታማሪሳናው ኪቴቴዲኖ
(ማር 6:7-13፤ ሉቅ 9:1-6)

5 ዩሱሲ ሃ ታማኔ ላዓቱዋ ሃዋዳን ያጊዳ ኪቴዳ፤ «ኣዪሁዳ ጊዳና ኣሳ ጋዲያ ቦፒቲ፤ ቃሲ ሳማራቱዋ ካታማካ ጌሎፒቲ፤ 6 ሃዋ ዲራ ባዬዳ ደርሳኮ፣ ኢስራዔሊያ ኣሳኮ 7 ቢዳ፣ ሳሉዋ ካወቲላይ ማቴዳ) ያጊዳ ኣዲቲ። 8 ሃርጋንቻቱዋ ፓሊቲ፤ ኣጎ ሃይቁዋፕ ዳንሊቲ፤ ኦሉ ኦይቁዳዋንታ ፓሊቲ፤ ኢታ ኣያናቱዋካ ኬሲቲ። ሂንቴንቱ ጮ ኣኬዲታ፤ ጮ ኢሚቲ። 9 ዋርቃ ዋይ ቢራ ዋይ ሳንቲሚያ ሂንቴንቱ ኪሲያን ኦይቆፒቲ፤ 10 ዋይ ኦጌው ቃርጨቲያ፣ ዋይ ላዔሊያ ማዩዋ፣ ዋይ ጫማ ዋይ ፃዎዓ ኦይቆፒቲ። ኣዪሲ ጎፔ፣ ኦሳንቻው ኮሺያባይ ቁማ።

11 «ሂንቴንቱ ጌሊያ ካታማን ዋይ ቄር ካታማ ኡባን ሂንቴና ሞካናው ናሽቲያዌ ኦኔንቶ ኣኬካን ያሞሲቲ፤ ሂንቴንቱ ሃዋፔ ኬሳና ጋካናው፣ ሃዋን ኡቲቲ። 12 ቃሲ ጎሌ ጌሊዳ ሳርቲቲ። 13 ሄ ጎሌን ዳዒያ ኣሳይ ሂንቴና ሞኮፔ፣ ሂንቴንቱ ሳርቲዳ ሳርታይ ኡንቴንታ ጋኮ። ሺን ኡንቴንቱ ሂንቴና ሞኬናን ኢያፔ፣ ሂንቴንቱ ሳርቲዳ ሳርታይ ሂንቴው ጉዬ ሲሞ። 14 ቃሲ ኢቲ ኢቲ ጎሊ ዋይ ካታማይ ሂንቴና ሞኬናን ዋይ ሂንቴንቱ ኦዲያዋ ሲሴናን ኢያፔ፣ ሄ ጎሊፔ ዋይ ሄ ካታማፔ ኬሲዳ፣ ሂንቴንቱ ጌዲያፔ ባና ሾጨቲ። 15 ታኒ ሂንቴው ቱሙዋ ኦዲይ፤ ያሳይ ፒርዲያ ጋላሲ ሄ ካታማ ኣሳፔ፣ ሶዶማ ካታማ ኣሳዉኔ ጋሞራ ካታማ ኣሳው ፒርዳ ካዉሺሳና።

ጎዳይ ያናፔ ካሴቲዳ፣ ዩዳርሱኔ ሜቱ ሃናና
(ማር 13:9-13፤ ሉቅ 21:12-17)

16 «ቤዒቲ! ታኒ ሂንቴና ደርሳ ዋላቱዋ ጊዶ ዩዲያዋዳን ዩዳይ። ሃዋ ዲራው፣ ሾሻዳን ጨንጫ ጊዲቲ፤ ቃሲ ሃራጲያዳን፣ ኣሺኬ ጊዲቲ። 17 ሺን ኣሳፔ ናጌቲቲ። ኣዪሲ ጎፔ፣ ኣሳይ ሂንቴና

ፐርዳ ጎሌው አሊዳ አማና፤ ቃሲ ባሬ አዩሁዳ ዋሳ ጎሌቱዋረካ ሂንቴና ሊሱዋን ፔዳና። 18 ጋዲያ አዩሲያዋንቱ ሲንፋኒኔ ካታቱዋ ሲንፋን ታ ዲራው ሂንቴንቱ ኤቂዳ፡ ኡንቴንቱሲኔ አዩሁዳ ጊዳና አሳ ሲንፋን ታው ማርካ ጊዳኒታ። 19 ሺን ኡንቴንቱ ሂንቴና ፐርዳው አሊያ ዋዳ፡ ሂንቴንቱ ሃሳያናባ ሄ ሳቲያን ያሳይ ሂንቴው አሚያ ዲራው፡ ሂንቴንቱ ጋናባወኔ ዋይ ዋጊዳ ሃሳያኔንቶኔ ሂርጎፕቱ። 20 አዩሲ ጎፔ፡ ሂንቴንቱን አቂዳ ሃሳዩያዋ ሂንቴንቱ አወዋ ጌሻ አያናፔ አቲን፡ ሃሳዩያዋንቱ ሂንቴንታ ጊዳኪታ።

21 «ኢሻይ ባሬ ኢሻ፡ አወ ባሬ ናባ ቦላ ዴንዳና፤ ናናይ ባሬንቱ አቲኔ አወዋ ቦላ ዴንዳዳ፡ ኡንቴንታ ዋዲሳና። 22 ቃሲ አሳይ ኡባይ ሂንቴንታ ታ ሱንፋ ዲራው ኢዳና፤ ሺን ወርሴፋይ ጋካናው ጌንጪያዋ አታናዋ። 23 ኡንቴንቱ ሂንቴና አቲ ካታማፔ ዬዳርሶፔ፡ ሃራ ካታማ ቤቱ፡ አዩሲ ጎፔ፡ ታኒ ሂንቴው ቱሙዋ ጋይ፤ ታኒ፡ አሳ ናባይ፡ ያና ጋካናው፡ ሂንቴንቱ ሂንቴ ኦሱዋ ኢሰራዴሊያ ካታማ ኡባን ኦሊዳ ወርሴኪታ።

24 «ታማሪያዋ ባሬና ታማሪሲያዋፔ ዳሬና፤ ቆማይካ ባሬ ጎዳፔ ዳሬና። 25 ታማሪያዋ ባሬና ታማሪሲያዋ ከና ጊዲያዋ፡ ቆማይካ ባሬ ጎዳ ከና ጊዲያዋ አው ጊዳና፤ ኡንቴንቱ ጎሌ ጎዳ ቢዔል-ዜቡላ ጊዳ ያሶፔ፡ አ ጎሌ አሳ ዋጊ ያሳኔሻ!

ኦሲ ያናው ቤሲንቶ
(ሉቅ 12:2-7)

26 «ሲሚ አሳሲ ያዮፕቱ፤ አዩሲ ጎፔ፡ ጌንፊ ዋሌዳባይ ቆንጪያ ከሴናን አቲና፤ ቆሴዳባይካ ኤሬቴናን አቲና። 27 ታኒ ሂንቴንቶ ዱማኒ ኦዲያባ ፖውዋን ሃሳዩ፤ ሂንቴው ሃይፋን ሳሱኪዳ ኦዳዳዋ፡ ዶቃ ሳን አዋዩ። 28 አሹዋ ዋዲያዋንቶ ያዮፕቱ፤ ኡንቴንቱ፡ ሺምፑዋ ዋዳናው ዳንዳይኪና። ሺን ሺምፑዋኔ አሹዋ ጋናሚያን ዳዩሳናው ዳንዳዩያ ያሳሲ ያዩ። 29 ላው ሱኒያ ካፋቱ ሳንቲሚያን ዘለዔቲኪና? ሂንቴንቱ አወዋ ሺኒያ ጊዳና ዳዮፔ፡ ሄ ሱኒያ ካፋቱዋፔ አቲናካ ሳባን ዋዳዳ ባዩኩ። 30 ሺን ሃራይ አቶ፡ ሂንቴንቱ ሁጲያን ዴዲያ ቢናናይ ኡባይካ ፓይዲዋን ዴዔ። 31 ሲሚ ያዮፕቱ፤ ዳር ሱኒያ ካፋቱዋፔ ሂንቴንቱ አዲታ።

ከሪሰቶሳባ ማርካታናው ቤሴ
(ሉቅ 12:8-9)

10:17 ማር 13:9-11፤ ሉቅ 12:11-12፤ 21:12-15

32 «ሄዎ ዲራው፡ አሳ ሲንላን ታባ ማርካቲያ ኦሲ ጊደፔኔ፡ ታኒካ ሳሉዋን ዳዒያ ታ ኣቡ ሲንላን ማርካታና፤ 33 ሺን አሳ ሲንላን ታና ካዲያ ኦናኔ ታኒካ ቃሲ ሳሉዋን ዳዒያ ታ ኣቡ ሲንላን ኣ ካዲና፡

34 «ታኒ ሳዒሲ ሳርቴላ ኣሃናው ዩዳዋ ሂንቴሲ ማላቶፖ፤ ታኒ ቶራ ኣሃናው ዩዳዋፔ ኣቲን፡ ሳርቴላ ኣሃናው ያቤይኬ። 35 ኣዪሲ ጎፔ፡ ታኒ ናዓ ኣ ኣቡፔ፡ ናቶ ኢዚ ዳዪፔ፡ ናዓ ማቻቶካ ኢዚ ቦሎታቲፔ ሻካናው ያዲ፤ 36 ኣሳሲ ሞርኬቱ ኣ ጎሌ ኣሳቱዋ ጊዳናዋንታ።

37 «ባሬ ኣባ ዎይ ባሬ ዳዮ ታፔ ኣሲዳ ሲቂያዌ ታዋ ጊዳናው ቤሴና፤ ባሬ ኣቱማ ናዓ ዎይ ባሬ ማጫ ናቶ ታፔ ኣሲዳ ሲቂያዌ ታዋ ጊዳናው ቤሴና። 38 ባሬ ማስቃሊያ ቶኪዳ፡ ታ ጌዱዋ ካሌናዌ ታዋ ጊዳናው ቤሴና። 39 ባሬ ሺምፑዋ ኣሺያዌ ባዪዛናዋ፤ ሺን ታ ዲራው ባሬ ሺምፑዋ ባዪዚያዌ ኣሻናዋ።

40 «ሂንቴንታ ሞኪያዌ ታና ሞኬ፤ ቃሲ ታና ሞኪያዌ ታና ከቴዳዋ ሞኬ። 41 ናቢያ፡ ናቢያ ሱንላን ሞኪያዌ፡ ናቢያ ጋቲያ ኣናና ጊሼታናዋ፤ ቃሲ ዪሉዋ፡ ዪሉዋ ሱንላን ሞኪያዌ፡ ዪሉዋ ጋቲያ ኣናና ጊሼታናዋ። 42 ኦኒኔ ሃ ታና ካሊያዋንቱፔ ጉዲያ ኢቶ፡ ሃራይ ኣቶ ቡሊያ ሃላ ፃላላ ኡሻናው ኣምፔካ፡ ታኒ ሂንቴንቶ ቱሙዋ ጋይ፤ ኢ ባሬ ጋቲያ ኣካና» ያጌዳ።

11

ፃማቂያ ዮሃንሳፔ ዩሱሳኮ ኪቴቴዳ ኣሳቱዋ (ሉቅ 7:18-35)

1 ዩሱሲ ባሬ ታማኔ ላዑ ካሊያዋንታ ኣዛዚያዋ ፖሌዳ ዎዳ፡ ሄዋፔ ዳንዲዳ፡ ካታማቱዋን ታማሪሳናዉኔ ኢዳናው ቤዳ።

2 ፃማቂያ ዮሃንሲ ቃሽ ጎሌን ዳዒዳ፡ ዩሱሲ ኦሴዳዋ ሲሲዳ፡ ባሬና ካሊያዋንታ ኣኮ ኪቴዳ፡ 3 «ያናዌ ኔኔዬ? ዎይ ሃራ ናጋኔ?» ያጊ ኣቻናዳን ኡዳዳ።

4 ዩሱሲ ዛሪዳ፡ ኡንቴንቶ ሃዋዳን ያጌዳ፤ «ቢዳ ሂንቴንቱ ቤዒያዎኔ ሲሲያዋ ዮሃንሳው ኦዲቴ፤ 5 ቆቃቱ ዪሊኖ፤ ዎባቱ ሃማቲኖ፤ ኦሉ ኦይቂዳዋንቱ ፓዲዳ ጌዪኖ፤ * ቱላቱ ሲሲኖ፤

10:33 2ፃዎ 2:12 10:35 ሚክ 7:6 * 11:5 ፓዲዳ ጌዪኖ ጊያዋ ሎይላ ኣኪካናው 8:2 ፃደና ዳዒያ ቢሊላን ፃፊቴዳዋ ቤዓና ዳንዳዬቴ።

ሃይቄዳዋንቱ ዳንዲኖ፤ ሂዬሳቱ ዋንጋላ ሚሺራቸዋ ሲሲኖ።

6 ታባ ሲጾና ኡራይ አንጃቴዳዋ» ያጌዳ።

7 የሃሂሳ ካሊያዋንቱ ሲሚ ቤዳ ዎዳ፣ ዬሱሲ የሃሂሳባ ሸቄዳ አሳሲ ሃዋዳን ያጌ ሃሳዬዳ፤ «አያ ቤዓናው አሳይ ዳዔና ማላ ቢታ ኬሴዲቱ? ጫርኩ ቃሊያ ማቃ ቤዓናው ኬሴዲቱ? 8 ያቲና፣ አያ ቤዓናው ኬሴዲቱ? ሎዒያ ማዩዋ ማዬዳ ቢታኒያ ቤዓናው ኬሴዲቱ? ሎዒያ ማዩዋ ማዬዳዋንቱ ካታቱዋ ሳሊን ዳዒኖ። 9 ያቲና፣ አያ ቤዓናው ኬሴዲቱ? ናቢያ ቤዓናው ኬሴዲቱ? ኤ፣ ታኒ ሂንቴው ኦዳይ፤ ናቢያፕካ አጲያዋ ቤዔዲታ። 10 አዪሲ ጎፔ፣ ያሳ ማፃፋን።

የሳይ፣ «ቤዓ፣ ታኒ ከቲያዋ

ኔፔ ሲንላው ዬዳና።

ኢ ኔው ኦሊያ ገገሳናዋ» ያጌዳ።

ጌቲቲዳ የሃሂሳባይ ያፊቲዳ። 11 ታኒ ሂንቴንቶ ቱሙዋ ኦዳይ፤ አቲ ኡሉዋፔ ዬሌቲዳ አሳ ኡባን ፃማቄያ የሃሂሳፔ አጲያዎ ኦኒኔ ዳንዲቤና፤ ሺን ሳሉዋ ካዉቲላን ኡባፔ ላፊያዎ አፔ አቆና። 12 ፃማቄያ የሃሂሳ ዎዲያፔ ዶሚዳ፣ ሃቹ ጋካናው፣ ሳሉዋ ካዉቲላታ ዳር ናቄታው፤ ሚኒ ባፃቲያዋንቱ ኢዘ ዳሚኖ። 13 አዪሲ ጎፔ፣ ናባቱ ኡባቲኔ ሙሴ ሂጊ የሃሂሳ ዎዲ ጋካናው፣ ቲሞቢቲያ ሃሳዬዲኖ፤ 14 ሲሚ ሂንቴንቱ ኡንቴንቱ ሃሳዮዋ አማናናዋ ጊዶፔ፣ ያናዋ ጌቲቲዳ ኤላሰ ሃ የሃሂሳ። 15 ሲሲያ ሃይላይ ዳዒያዎ ሲሶ!

16 «ሺን ታኒ ሃ ዎዲያ አሳ አያና ለሚሶ? ኡንቴንቱ ቆጫን ኡቲያ ናና ማላቲኖ፤ ኡንቴንቱ ባሬንቱ ላጌላቱዋ ፃሲዳ። 17 ኩኒ ሂንቴንቶ ሂፃፃያ ፑኔዶ፤ ሺን ዱሪቤይኪታ፤ ዬኩዋ ዬላካ ኬሴዶ፤ ሺን ዬኪቤይኪታ» ያጌና። 18 አዪሲ ጎፔ፣ የሃሂሲ ያሚዲኔ ዎዪያ ኤሳ ኡሺናን ዪና ኡንቴንቱ፣ ኩ ቦላ ኢታ አያናይ ዳዔ። ያጌዲኖ። 19 ታኒ፣ አሳ ናዓይ፣ ማዳኔ ኡሻዳ ዪና፣ ኡንቴንቱ ታና፣ ነሃ ናፊሳማኔ ዎዪያ ኤሳ ኡሺያዋ ቤዒቲ፤ ቃራፃ ቃንፃያዋንቱናኔ ናጋራንቻቱዋና ሲቄቲ» ያጌኖ፤ ሺን ያሳ አቆዳ ኤራቴላይ ባሬ ኡሱዋን ቱማ ጊዲዳ ቤቲ» ያጌዳ።

አማኔናን ኢፃዳ ዲራው ቶሼኔዳ ካታማቱዋ

(ሉቅ 10:13-15)

20 ሃዋፔ ጉዪያን፣ ዬሱሲ ባሬ ማላታፔ ዳሪያ ባጋ ኦሌዳ ካታማቱዋን ዳዒያ አሳይ ባሬንቱ ናጋራፔ ሲሚቤና ዲራው።

11:5 ኢሳ 35:5-6፤ 61:1 11:10 ሚል 3:1 11:14 ሚል 4:5፤ ማጥ 17:10-13፤ ማር 9:11-13

ኢንቴንታ ሃዋዳን ያገደ። ቶሺያ ደሜዳ፤ 21 «ኮራዚኔ ካታማው፡ ኔው አዩር፤ ቤቴሳይዳ ካታማው፡ ኔውካ አዩር፤ አዪሲ ጎፔ፡ ሂንቴንቱ ቦላ ያሳይ ኦሎዳ ማላታይ ዲሮሳ ካታማኒኔ ሲደና ካታማን ኦሎቶዋ ጊዲንቶ፡ ኢንቴንቱ ማቂያ ማዪዳ፡ ቢዲንላ ኦኬቲዳ፡ ቤኒ ባሬንቱ ናጋራፔ ሲማናዋንታሺን። 22 ታኒ ሂንቴው ኦዲይ፤ ፒርዳ ጋላሲ ያሳይ ሂንቴፔ ዲሮሳ ካታማውኒ ሲደና ካታማው ፒርዳ ካዉሸሳና። 23 ቃሲ ቁፊሪናሆማ ካታማው፡ ኔኒ ሳሉዋ ፑዴ ቶቁ ጋናው ኮያዲ? ኔኒ ሲዶሊያ ዲጌ ዩጌታና፤ አዪሲ ጎፔ፡ ኔ ቦላ ያሳይ ኦሎዳ ማላታይ ሶደማ ካታማን ኦሎቶዋ ጊዲንቶ፡ ሶደማ ካታማይ ሃቼ ጋካናሲካ ዴናናዋሺን። 24 ታኒ ሂንቴው ኦዲይ፤ ፒርዳ ጋላሲ ያሳይ ኔፔ ሶደማው ፒርዳ ካዉሸሳና» ያገደ።

ዩሱሳን ሽምፑዋ ዳሚያዋ
(ሉቅ 10:21-22)

25 ዩሱሲ ሄ ዎዴ ዛሪዳ፡ ሃዋዳን ያገደ፤ «ታ አቦ፡ ሳሉዋ ሳዓ ጎዳው፡ ኔኒ ሃዋ አዴዳ ኤራንቻቱዋፔኔ አኬካንቻቱዋፔ ጌንላዳ፡ ኤሪና ናናቱዋሲ ቆንጩሴዳ ዲራው፡ ኔና ጋላታይ፤ 26 ኤ ታ አቦ፡ አዪሲ ጎፔ፡ ሃዌ ኔ ሽኒያዳን ኦሎቴዳ።

27 «ታ አቡ ታው ኡባባ ኢሜዳ፤ አዉዋፔ ሃራይ ናዓ ኤሪና፤ ናዓፔኔ ናዓይ አዉዋ ቆንጩሳናው ኮዪያ አሳፔ አቲን፡ ሃራይ አዉዋ ኤሪና።

28 «ዳቡራንቻቶ፡ ዳፀዋ ቶኮዋንቶ ኡባቶ፡ ታኮ ሃ ዪቴ፤ ታኒ ሂንቴንታ ሽምፐሳና። 29 ታኒ ጋራኔ ታ ዎዛናን አሺኬ ጊደ ዲራው፡ ታ ሞርጌ ሚላን ዋዳቲቴ፤ ታፔ ታማራቴ፤ ሂንቴንቱ ሽምፐዋሲካ ሂንቴ ሽምፐዋ ዳማና። 30 አዪሲ ጎፔ፡ ታ ሞርጌ ሚላይ ጊጋ፤ ቃሲ ታኒ ሂንቴንታ ቶሴዳዌካ ካዉሻ» ያገደ።

12

ሳምባታባሲ ሽቄዳ አሻ
(ማር 2:23-28፤ ሉቅ 6:1-5)

1 ዩሱሲ ሄ ዎዴ ሳምባታ ጋላሲ፡ ቲሻ ባንጋ ጊደና አዲሺን አ ካሊያዋንቱ ኮሻቲዳ፡ ቲሻ ባንጋ ዲሊዳ፡ ሙሳ ደሜዲኖ።

11:21 ኢሳ 23:1-18፤ ሂዝ 26:1-28:26፤ ኢዩ 3:4-8፤ አዎ 1:9-10፤ ዛክ 9:2-4
 11:23 ኢሳ 14:13-15፤ ደም 19:24-28 11:29 ኤርም 6:16

2 ሺን ፓሪሳዎቹ ሄዋ ቤዲዳ ዩሱሳ፡ «ቤዳ፡ ኔና ካሊያዎንቱ ሳምባታ ጋላሲ ኦሳናው ዎጋ ጊዳናባ ኦሊኖ» ያጌዲኖ።

3 ሺን ዩሱሲ ኡንቱንቱሲ ሃዋዲን ያጌዲ፤ «ዳዊቴ ኦናና ዳዊያዎንቱ ኮሻቴዳ ዎዴ፡ ዳዊቴ ኦሊዳዎ ናባቢቤይኪቴ?

4 ዳዊቴ ያሳ ጎሌ ጌሊዴ፡ ቁሳቱዎ ፃላላይ ማናፔ ኦቲን፡ ኢኔ ኦናና ዳዊያዎንቱ ማናው ዎጋ ጊዳና ያሳሲ ያርሹዳ ቁማ ሜዳ።

5 ዎይ ሳምባታ ኡባን ጌሻ ጎሊያን ዳዊያ ቁሳቱ ሳምባታ ዎጋ ሜንሊያዎ፡ ቃሲ ኡንቱንቱሲ ሄዌ ባዪዘ ጊዳናዎ ሙሴ ሂጊያን ናባቢቤይኪቴ? 6 ሺን ታኒ ሂንቱው ኦዲይ፤ ጌሻ ጎሊያፔ ኦሊያዌ ሃዋን ዳዴ። 7 ያሳ ማፃፋይ፡ «ታኒ ማርቴላ ኮያይፔ ኦቲን፡ ያርሹዎ ኮዪኬ» ያጊያዌ ዋጊያዌንቶ ሂንቱንቱ ኤሪቴንቶ፡ ባዪዘ ባይና ኦሳ ቦላ ፐርዲኪታ። 8 ኦዪሲ ጎፔ፡ ታኒ፡ ኦሳ ናዳይ፡ ሳምባታ ጎዳ» ያጌዲ።

ዩሱሲ ኩሺ ጉንዴዳ ቢታኒያ ፓሌዳ
(ማር 3:1-6፤ ሉቅ 6:6-11)

9 ዩሱሲ ሄዋፔ ዴንዲዴ፡ ኦዪሁዳ ዎሳ ጎሌ ቤዳ። 10 ሄዋን ኩሺ ጉንዴዳ ኢቲ ቢታኒ ዳዴ፤ ዩሱሳ ዎታናው ጋሱዎ ኮዪያ ኦሳቱ፡ «ሳምባታን፡ ሃርጋንቻ ፓሊያዌ ዎጌ?» ያጊዴ ኦ ኦቹዲኖ።

11 ዩሱሲ ኡንቱንታ፡ «ሂንቱንቱ ጊዳን ኢቲ ዶርሳይ ዳዊያ ኡሪይ፡ ሄ ዶርሳይ ሳምባታ ጋላሲ ኦላን ኩንዶፔ፡ ኦይቁዴ ኬሴናዌ ኦኔ? 12 ያቲና፡ ኦሳይ ዶርሳፔ ዎቲ ሎይሊዴ ዳሬኔ! ሄዎ ዲራው፡ ሳምባታ ጋላሲ ሎዎባ ኦሊያዌ ዎጋ» ያጌዲ።

13 ሄዋፔ ጉዪያን ቢታኒያ፡ «ኔ ኩሺያ ፒዲ ኦላ» ያጊና ቢታኒ ፒዲ ኦላዎፔ ጉዪያን፡ ኦ ኩሺ ዮኮ ኩሺያዎዲንካ ፓዪ ኦጌዳ።

14 ሺን ፓሪሳዎቹ ካሬ ኬሲዴ፡ ዩሱሳ ዎቲ ዎዳኔንቶ ማቁቴዲኖ።

ያሳይ ዶራዳ ኦዪሊያ

15 ሺን ዩሱሲ ኡንቱንቱ ዘሬታ ኤሪዴ፡ ሄዋፔ ኦጊዴ ቢያ ዎዴ፡ ዳር ኦሳይ ኦ ካሌዳ፤ ሃርጌዳ ኡባ ፓሌዳ። 16-17 ያሳይ ናቢያ ኢሲያሳ ባጋና ኦዳዳዌ ፖሌታና ማላ፡ ዩሱሲ ኦሳቱዎሲ፡ «ታባ ሃራ ኦሳሲ ኦዶፐፔ» ያጌዲ። 18 ያሳይ ኢሲያሳ ባጋና ሃዋዲን ያጌዲ፤

«ታኒ ዶራዳ ታ ኦዪሊ፡

ታኒ ሲቁያ፡ ታና ናሹቸያዌ ሃዌኩ።

ታኒ ታ ኦያና ኦ ቦላ ዎሳና።

12:1 ዛር 23:25 12:3 1ሳዎ 21:1-6 12:4 ዎግ 24:9 12:5 ፓይ 28:9-10 12:7 ማት 9:13፤ ሆስ 6:6

ኢ ሱሬ ፒርዳ አሳው ኡባው ኦዳናዎ።

19 ኢ ፓሉሜቲና፤ ዎይ ዋሴና።

ባሬ ቃላካ ኦጊያን ሲሴና።

20 ሱሬ ፒርዳይ ያኒ ኬሳና ጋካናው።

ቲንጨቴዳ ማቃ ሜንጤና *

ቃሲ ጨዋቲያ ሙቃዳ ቁንጨቴያካ ኢ ቶዩሴና።

21 እዩሁዳ ጊዴና አሳይ ኡባይ አቦላ ባሬንቱ ሂዶታ ዋላና» ያጌዳ።

ዩሱሳባኔ ቢዔል-ዜቡላባ

(ማር 3:20-30፤ ሉቅ 11:14-23)

22 ሄዋፔ ጉዩያን፣ አማሬዳ አሳቱ ኢታ አያናይ ኦይቂና ዱዳዳ ኢቲ ቆቃ ቢታኒያ ዩሱሳቦ አሄዲኖ፤ ዩሱሲ ሄ ዱዳ ቢታኒያ ፓሌዳ፤ ቢታኒካ ሃሳያኔ ፃላ ደሜዳ። 23 አሳይ ኡባይ ማለሌቲዳ። «ላ ሃዌ ዳዊቱ ናሳ ጊዳንዴሻ?» ያጌዳና።

24 ሺን ፓሪሳዎቱ ሄዋ ሲሲዳ። «ሃ ቢታኒ ኢታ አያናቱዋ ካፕ (ቢዔል-ዜቡላ) ባሬው ዋልቃ አሚና፣ ፃላሃቱዋ ኬሴ» ያጌዳና።

25 ሺን ዩሱሲ ኡንቱንቱ ቆፋ ኤሬዳ። ኡንቱንታ ሃዋዳን ያጌዳ፤ «ባሬ ጊዳን ሻኬቲያ ካዉቲላይ ኡባይ ጳያና፤ ቃሲ ባሬ ጊዳን ሻኬቲያ ካታማይ ዎይ ጎሌን ዴዒያ አሳይካ ሚኔና። 26 ቃሲ ሴፃናይ ሴፃና ኬሲያዋ ጊዶፔ፣ ባሬ ጊዳን ሻኬቲ፤ ያቲና፣ አ ካዉቲላይ ዋኒዴ ሚኒ ኤቃናዌ? 27 ታው ቢዔል-ዜቡላ ዋልቃ አሚና፣ ታኒ ፃላሃቱዋ ኬሲያዋ ጊዶፔ፣ ሂንቲንቱ አሳው ዋልቃ ኦኒ አሚና ፃላሃቱዋ ኬሳኔ? ሄዋ ዲራው፣ ኡንቱንቱ ሂንቲ ቦላ ፒርዳና። 28 ሺን ያሳ ጌሻ አያናይ ታው ዋልቃ አሚና፣ ታኒ ፃላሃቱዋ ኬሲያዋ ጊዶፔ፣ ሲሚ ያሳ ካዉቲላይ ሂንቲ ቦላ ዩዲጌዳ።

29 «ዎይ አሳይ ካሴቲዳ፣ ዋልቃማ አሳ ቃቼናን ዴዒዳ፣ አ ጎሌ ጌሊዳ፣ አ ሚሻ ቦንቃናው ዋኒዴ ዳንዳዩ? ቃቼዳዎፔ ጉዩያን፣ አ ሚሻ ቦንቃናው ዳንዳዩ።

30 «ታ ባጋ ጊዴና ኡራይ ታዋ ኢፃ፤ ቃሲ ታናና ኢቲፔ ሺሸናዌ ላሌ። 31 ሄዋ ዲራው፣ ታኒ ሂንቲው ኦዳይ፤ ያሳይ አሳው አይ ናጋራ ጊዲናካ፣ ቃሲ አይ ቦሬ ጊዲናካ አቶ ጋና፤ ሺን ጌሻ አያና ቦሬያዋ አቶ ጌና። 32 ታ ቦላ፣ አሳ ናሳ ቦላ፣ ኢታባ ሃሳዩያ ኦ

12:18 እሳ 42:1-4 * 12:20 አ. ቲንጨቴዳ ማቃ ሜንጤና፤ ሃዋ ጉሳይ፣ ማዲ ባይናዋንቲሴኔ ዳቡራንቻቱዋሲ ዩሱሲ ኬካኔ ጋራ ጉሳ። ብ. ጨዋቲያ ሙቃዳ ቁንጨቴያካ ኢ ቶዩሴና ጉሳይ፣ ዩሱሲ ዳቡራንቻቱዋሲ ጉዙማ ጊዴናዳን ኬካ ጉሳ።

ናጋራኔ ፆሳይ አቶ ጋና፤ ሺን ጌሻ አያና ቦላ ኢታባ ሃሳዪያ ኦ ናጋራኔ ሳዓን ጊዲና፣ ሳሉቀንካ ፆሳይ አቶ ጌና።

ሎፆ ሚላይ ባሬ አይፊያን ኤሬቴ
(ሉቅ 6:43-45)

33 «ሎፆ አይፊያ ዳማናው ሎፆ ሚላ ዲቻናው ቤሴ፤ ኢታ ሚላ ሂንቴንቴ ዲቻ፣ ኢታ አይፊያ ዳማኒታ፤ አዪሲ ጎ፣ ሚላይ ኤሬቴያዌ ባሬ አይፊያ አይፊያዋና። 34 ሸሻቶ፣ ሂንቴንቴ ኢታ ጊዲዴ፣ ዋቲ ሎፆባ ሃሳያናው ዳንዳዪቴ? አዪሲ ጎ፣ ዶናይ ዋዛና ጊደን ኩሜዳዋ ሃሳዬ። 35 ሎፆ አሳይ ባሬ ሎፆ ሚንጃዋ፣ ሎፆባ ኬሴ፤ ቃሲ ኢታ አሳይ ባሬ ኢታ ሚንጃዋ፣ ኢታባ ኬሴ። 36 ታኒ ሂንቴንቶ ኦዲይ፤ አሳይ ባሬ ሃሳዬዳ ማዳና ሃሳያ ኡባው ፐርዳ ጋላሲ ዛሩዋ ኢማናዋ። 37 አዪሲ ጎ፣ ኔ ሃሳያይ ኔና ያሊሳና፤ ዋይ ኔ ሃሳያይ ኔ ቦላ ፐርዲሳና» ያጌዳ።

ማላታ ቤዓናው ሺቄዳ ኦሻ
(ማር 8:11-12፤ ሉቅ 11:29-32)

38 ሄዋ፣ ጉዪያን፣ ሂጊያ ታማሪሲያ ኢቲ ኢቲ አሳይኔ ፓሪሳዋቱ ዛሪዴ ዬሱሳ፣ «ታማሪሲያዎ፣ ኔኒ ማላታ ኦላሺን፣ ኔኒ ቤዓናው ኮዬቶ» ያጌዲኖ።

39 ሺን ኢ ዛሪዴ፣ ኡንቴንቶ ሃዋዳን ያጌዳ፤ «ሃ ዋዲያ አሳይ ኢታኔ ፆሳ አማኔና ዲራው፣ ማላታ ኮዬ፤ ናቢያ ዮናሳ ማላታ፣ ኦቲን፣ ሃራ ማላታይ ኢማቴና። 40 ዮናሲ ዋጋ ሞሊያ ኡሉቀን ሄዙ ጋላሳኔ ሄዙ ቃማ ዳዔዳዋዳን፣ አሳ ናዓይካ፣ ቢታ ጊደን ሄዙ ጋላሳኔ ሄዙ ቃማ ዳዓናዋ። 41 ኔኔዌ አሳይ ዮናሲ ኦዳዳዋን ባሬንቴ ናጋራ፣ ሲሜዳ ዲራው፣ ፐርዳ ጋላሲ ዳንዲዴ፣ ሂንቴንታ ሞታናዋንታ፤ ቤይቴ፣ ዮናሳ፣ አዲያዌ ሃዋን ዳዔ። 42 ዲጌ ባጋ ጋዲያ ካታታ ሱሎሞኔው ዳዒያ አጼ ኤራቴላ ሲሳናው ሳዓ ጋፀ፣ ዬዳ ዲራው፣ ፐርዳ ጋላሲ ዳንዲዴ፣ ሂንቴንታ ሞታናዊኑ፤ ቤይቴ፣ ሱሎሞኔ፣ አዲያዌ ሃዋን ዳዔ።

ኢታ አያናይ አሳ ጋርሳ ሲሚዳ ጌሊያዋ
(ሉቅ 11:24-26)

43 «ኢታ አያናይ አሳ፣ ኬሴዳ ዋዳ፣ ባሬው ሸሞፐያሳ ኮዪዳ፣ ሃላይ ባይና ሜላሳና ዩዬ፤ ሺን ዳሜና። 44 ሄ ዋዳ፣ ታኒ አጋዴ ዬዳ ታ ጎሌ ሲማና» ያጌ፤ ሲሚዳ ዩያ ዋዳ፣ ጎሊ ሚላ ዳዒያዋኔ ፐቴቴ ጌዪዳ፣ ጊሊ ኡቴዳዋ ዳሜ። 45 ሄዋ፣ ጉዪያን፣ ቢዳ

ባሬፔ ኢቲያ ላፑ ሃራ አያናቱዋ አኪዴ ዬ፤ ሄ አያናቱ ጌሊዴ፤ ሄዋን ዳዒኖ። ሄ ቢታኒያ ዳዑ ካሴዋፔ ዳሪ ኢቲ። ሃ ዋዲያ ኢታ አሳጧካ ቃሲ ሄዋዲን ሃናና» ያጌዳ።

ዬሱሳ ዳዮኔ አ ኢሻቱዋ
(ማር 3:31-35፤ ሉቅ 8:19-21)

46 ዬሱሲ ዳር አሳው ሃሳዪሺን፤ አ ዳያኔ አ ኢሻቱ አናና ሃሳያናው ኮዪዴ፤ ካሬን ኤቁዲኖ። 47 ሄዋን ዳዒያ አሳፔ ኢቲ አ፤ «ኔ ዳያኔ ኔ ኢሻቱ ኔናና ሃሳያናው ኮዪዴ፤ ካሬን ኤቁዲኖ» ያጌዳ። †

48 ሺን ዬሱሲ ዛሪዴ፤ «ታ ዳያ ኦኔ? ታ ኢሻቱ ኦኔ?» ያጌዳ። 49 ባሬ ኩሺያን ባሬና ካሊያዋንቱኮ ፆርሲዴ፤ «ቤይቲ፤ ታ ዳያኔ ታ ኢሻቱ ሃዋንቱሺ። 50 አዪሲ ጎፔ፤ ሳሉዋን ዳዒያ ታ አቡ ሼኒያ ኦሊያ ኡባይ፤ ታ ኢሻ፤ ታ ሚቻቶኔ ታ ዳዮ» ያጌዳ።

13

ዜሪያዋ ለሚሱዋ
(ማር 4:1-9፤ ሉቅ 8:4-8)

1 ዬሱሲ ሄ ጋላሲ ሶዪፔ ኬሲዴ፤ አባ ጋፃን ኡቲዳ። 2 ዳር ጮራ አሳይ ባሬ ዩሹዋን ዩዪ አዲዴ ሸቂና፤ ዋንጊሪያ ጌዶ ጌሊዴ ኡቲዳ፤ አሳይ ኡባይ አባ ጋፃን ኤቁዳ። 3 አሳሲ ለሚሱዋን ዳርባ ሃዋዲን ያጌዴ ኦዴዳ፤ «ኢቲ ቢታኒ ዜሬላ ዜራናው ኬሴዳ። 4 ኢ ዜሪሺን፤ ኢቲ ኢቲ ዜሬላይ ኦጊያ ዶናን ዋዴዳ፤ ያቲና ካፋ ዩዴ ሜዳ። 5 ቃሲ ኢቲ ኢቲ ዜሬላይ አንጮ ጊዴዳ ቢታ ቦላ ዋዴዳ፤ ዳር ቢታይ ባይና ዲራው፤ ሄ ዜሬላይ ኤሌካ ዶሌዳ። 6 ሺን አዋይ ኬሴዳ ዋዴ ጫርሻይ ሹሌዳ፤ አዲሳ ፃጶዋ ዬዲቤና ዲራው ሜሊ አጌዳ። 7 ኢቲ ኢቲ ዜሬላይ አጉንላ ጊዶን ዋዴዳ፤ ሄዋን ዶሌዳዋ አጉንላይ ዲጨዴ ጨሌዳ። 8 ኢቲ ኢቲ ዜሬላይ ቱዔ ቢታን ዋዴዴ ዶሌዳ፤ ኢቲ ያቲ አይፊያ፤ ኢቲ ኡሱቱን ታሙዋ፤ ኢቲ ሃታሙዋ አይፊዳ። 9 ሲሲያ ሃይላይ ዳዒያ ኡራይ ሲሶ!» ያጌዳ።

ዬሱሲ ለሚሱዋን ኦዶ ጋሱዋ
(ማር 4:10-12፤ ሉቅ 8:9-10)

10 ዬሱሳ ካሊያዋንቱ አኮ ሸቂዴ፤ «ኔኒ አዪሲ አሳሲ ለሚሱዋን ኦዶይ?» ያጌዲኖ።

† 12:47 ኢቲ ኢቲ ጌሻ ማፃፋ ቢሌላን ሃ ፓይዱ ባዋ።

11 ዩሱሲ ዛሪዴ፡ ኡንቲንቲሲ ሃዋዲን ያጌዳ፤ «ሂንቲንቲሲ ሳሉዋ ካወቲፋ ፀራ ኤሩሳይ ኢሚቲዳ፤ ሺን ኡንቲንቲሲ ኢሚቲቤና። 12 አዪሲ ጎፔ፡ ዳዒያዎ ጉጂታና፤ አው ዳራናዋ፤ ሺን ባይናዋፔ ሃራይ አቶ፡ ሄ ዳዒያዌካ አከታናዎ። 13 ታኒ ኡንቲንቲ ያሊዴ ያሌናዋዳን፡ ሲሲዴ ሲሴናዋዳን ሃኒያ ዲራው፡ ዎይ ቃሲ አከከና ዲራው ኡንቲንቲ ለሚሱዋን ኦዳይ።

14 «ኢሲያሲ ኡንቲንቲባ ሃዋዲን ኦዶዌ ፖሌታናዎ፤ ሂንቲንቲ ሲሳ ሲሳና፤

ሺን ሂንቲንቲ ጌሌና፤

ሂንቲንቲ ያላ ያላና፤

ሺን ቤዒኪታ።

15 አዪሲ ጎፔ፡ ሃ አሳ ዎዛናይ ጉዙሜዳ፤

ባሬንቲ ሃይላ ቱሊሴዲና፤

ባሬንቲ አዪፊያካ ጨሉሜዲና።

ሃዌ ባዌንቶ፡ ኡንቲንቲ ባሬንቲ አይፊያን ቤዓና፤

ባሬንቲ ሃይላን ሲሳና፤

ባሬንቲ ዎዛናካ አከካና፤

ኡንቲንቲ ታኮ፡ ያሳኮ ሲማና፤

ታኒካ ኡንቲንታ ፓላና

ያጌ።

16 «ሺን ሂንቲንቲ አይፊ ያሊያ ዲራውኔ ሂንቲንቲ ሃይላይካ ሲሲያ ዲራው፡ ሂንቲንቲ አንጃቲዳዎንታ። 17 ታኒ ሂንቲንቲ ቱሙዋ ኦዳይ፤ ዳሮ ናባቱኔ ያላቱ ሂንቲንቲ ቤዒያዎ ቤዓናው አዎቱዲና፤ ሺን ቤዒቤይኪና። ሂንቲንቲ ሲሲያዎ ሲሳናው አዎቱዲና፤ ሺን ሲሲቤይኪና።

ዩሱሲ ዜሪያዎ ለሚሱዋ ቢሌላ ኦዳዳ

(ማር 4:13-20፤ ሉቅ 8:11-15)

18 «ሲሚ ካላ ዜሪያዎ ለሚሱዋ ቢሌላይ ጊያዎ ሲሲቲ።

19 ካወቲፋ ቃላ ሲሲዴ፡ አከከና ኦኒኔ ኦጊያ ዶናን ዎጄዳ ዜሬላ ማላ፤ ያላሂያ ካፑ ዪዴ፡ ኡንቲንቲ ዎዛናን ዜሬቲዳዎ ማዲ ዲጌ።

20 አንጮ ቢታን ዎጄዳ ዜሬላይ ቃላ ሲሲዴ፡ ኤሌካ ናሹቻን አኪያዎንታ ማላቲ። 21 ሺን ሄ አሳቱ ሃዒሳፔ አቲን፡ ኡንቲንቲን ያጵ ባዋ፤ ቃላ ጋሱዋን ሜቱ ዎይ ዩዳሳይ ዪያ ዎዴ፡ ኤሌካ ጹቤቲ አጊና። 22 ቃሲ አጉንላ ጊዶን ዎጄዳዌ ቃላ ሲሲያዎ ቤሴ፤ ሺን ሃ ሳዓ ዳዑዋሲ ሂርጉሳይኔ ዲሬቲላ ሲቁሳይ ቃላ ጩሌ፤ ሃ ጋሱዋን ሄ ዜሬላይካ አይፊናን አቲ አጌ። 23 ቱዔ

ቢታን ዜሬቴዳዌ፣ ቃላ ሲሲዳ፣ አኬኪያ አሳ ቤሴ፤ ኢካ አይፌ፤ ኢቱ ያቱዋ፣ ኢቱ ኡሱቱን ታሙዋ፣ ኢቱ ሃታሙዋ አይፌ» ያጌዳ።

ዛሪንጊያ ሌሚሱዋ

24 ዩሱሲ ኡንቱንቶ ሃራ ሌሚሱዋ ሃዋዳን ያጊዳ ኦዳዳ፤ «ሳሉዋ ካዉቴላይ ባሬ ጎሻን ሎዎ ዜሬላ ዜሬዳ ቢታኒያ ማላቴ።

25 ሺን ቃማ አሳይ ጌሚዲሺዲጊና፣ አ ሞርኪ ዪዳ፣ ዛርጋ ዜሬዳዋ ቦላ ዛሪንጊያ ዜሬዳ ቤዳ። 26 ሺን ዛርጋይ ዶሊ አይፌዳ ዎዳ፣ ዛሪንጊ ሄ ዎዳ ቤቴዳ።

27 «አ ቆማቱ አኮ ዪዳ፣ ሳዳው፣ ኔኒ ኔ ጎሻን ሎዎ ዜሬላ ዜሬቤይኪ? ያተና፣ ዛሪንጊ ሃቃፔ ዩዳ?» ያጌዳና።

28 «ሄዋፔ ጉዪያን ጎዳይ፣ ሳዋ ሞርኪ ኦሌዳ» ያጌዳ። «ቆማቱ፣ ሳኒ ቢዳ ሾዳናዳን ደሳይ?» ያጌዳና።

29 «ሺን ኢ፣ ሳኒቴ፣ ዛሪንጊያ ሂንቴንቴ ሾዳዳ፣ ዛርጋና ሾዳኒታ። 30 ቦቾፒቴ፤ ቆይጨያ ዎዲ ጋካናው፣ ኢቲፔ ዲጨኖ። ቆይጨያ ዎዲ ጋኮዳ፣ ታኒ ቆይጨያዋንታ፣ ካሱቴዳ ዛሪንጊያ ማዲቴ፤ ታማን ጉዳናው ፖቼያን ፖቼያን ቃቺቴ፤ ሺን ዛርጋ ሺሺዳ ዲዪያን ቆለቴ» ጋና» ያጌዳ።

**ሳናፊጨያ ጌቴታያ ሚላቲ ዜሬላ ሌሚሱዋ
(ማር 4:30-32፤ ሉቅ 13:18-19)**

31 ዩሱሲ ኡንቱንቶ ሃራ ሌሚሱዋ ያጊዳ ኦዳዳ፤ «ሳሉዋ ካዉቴላይ ሳናፊጨያ ጌቴታያ ጉላ ሚላቲ አይፊያ ማላቴ፤ ሄ ሚላቲ አይፊያ አሳይ አኪዳ፣ ባሬ ጎሻን ዜሬዳ። 32 ሄ ዜሬላታ ሃራ ዜሬላ ኡባፔ ጉፃው፤ ሺን ዲጨዳ ዎዳ፣ ሃራ አታኪልቲያ ኡባፔ ዳራው፤ ካፋ ዪዳ፣ ኢዚ ቃንካን ኬዲያዋ ከና ዎጋ ሚላ ጊዳዲ» ያጌዳ።

**ኢርሹዋ ሌሚሱዋ
(ሉቅ 13:20-21)**

33 ቃሲካ ዩሱሲ ሃራ ሌሚሱዋ ኡንቱንቶ ያጊዳ ኦዳዳ፤ «ሳሉዋ ካዉቴላይ ኢቲ ሚሺራታ ሄዙ ከሪያ ዲሊያ አካዳ፣ ሙናቄዳ ሙናቃይ ኡባይ ዳንዳና ጋካናው፣ ኣኒ ቲጌዳ ኢርሹዋ ማላቴ» ያጌዳ።

**ዩሱሲ ሌሚሱዋን ታማሪሴዳ ጋሱዋ
(ማር 4:33-34)**

34-35 ዩሱሲ አሳው ሄ ኡባ ሌሚሱዋን ኦዳዳ፤ ሌሚሱ ባይናን ኢ ኢቲባካ ኦዳና፤ ናቢ።

«ታኒ ኡንቱንቶ ሃሳዬያ ዎዴ፥
 ሌሚሱዎን ሃሳያይ።
 ኣላሚ ማዴቶዴፎፎ ደሚዳ
 ጌሚዳ ዩዎቱዎ ኦዳይ»
 ያጌዳዌ ፖሌታና ማላ፥ ሄዎ ኢ ኦዳዳ።

ዩሱሲ ዛሪንጊያ ሌሚሱዎ ቢሌላ ኦዳዳ

36 ሄዎፎ ጉዩያን፥ ዩሱሲ ኣሳ ኣጊዳ፥ ሶይ ጌሌዳ፤ ኣ ካሊያዎንቱ ኣኮ ቢዳ፥ «ጎሻን ዴዒያ ዛሪንጊያ ሌሚሱዎ ቢሌላ ኩሲ ኦዳ» ያጌዲኖ።

37 ዩሱሲ ዛሪዳ፥ ሃዎዳን ያጌዳ፤ «ሎዎ ዜሬላ ዜሪያዌ ኣሳ ናዳ፤ 38 ጎሻይ ሃ ኣላሚያ፤ ሎዎ ዜሬላይ ያሳ ካዉቲላ ኣሳ፤ ዛሪንጊ ያላሂያ ካፑዎ ናና። 39 ዛሪንጊያ ዜሬዳዌ ዋርኪያ ያላሂያ፤ ቆይቻ ዎዴ፥ ዎዴያ ወርሴላ፤ ቃሲ ቆይጨያዎንቱ ኪታንቻቱዎ።

40 «ሄዎ ዲራው፥ ዛሪንጊያ ማዲዳ፥ ታማን ጉዲያዎዳን፥ ዎዴያ ወርሴላን ሄዎ ማላ ጊዳናዎ። 41 ኣሳ ናዳይ፥ ኪታንቻቱዎ ኪታናዎ፤ ኡንቱንቱ ኣ ካዉቲላ ጊዳን ናጋራው ጋሶ ጊዲያ ኡባቱዋኔ ኢታባ ኦሊያዎንታ ማዲዳ ኬሳናዎንታ። 42 ያቲዳ ቶዔና ታማን ኦላናዎንታ፤ ሄዎን ኡንቱንቱ ዩካናዎንታኔ ኣቻ ቋቃናዎንታ። 43 ሄ ዎዴ ዲላቱ ባሬንቱ ኣቡ ካዉቲላን ኣዎዳን ፖናና። ሲሲያ ሃይላይ ዴዒያ ኡራይ ሲሶ!

ዋጌቲዳ ሚሻ ሌሚሱዎ

44 «ሳሉዎ ካዉቲላይ ጎሻን ዋጌቲዳ ሚሻ ቤሴ፤ ኢቲ ቢታኒ ሄ ሚሻ ዴሚዳ፥ ዛሪዳ ዋጊ ኣጌዳ፤ ዳር ናሹቲዳ ቢዳ፥ ባሬው ዴዒያዎ ኡባ ዛሊዒዳ፥ ሄ ጎሻ ሻሚዳ።

ኢንቁዎ ጌቲቲያ ዳር ኣልዎ ሹቻ ሌሚሱዎ

45 «ቃሲ ሳሉዎ ካዉቲላይ ኢንቁዎ ጌቲቲያ ዳር ኣልዎ ሹቻ ሻማናው ኮዩያ ዛሊዳንቻ ማላቲ። 46 ሄ ዛሊዳንቻይ ዳር ኣልዎ ኢንቁዎ ዴሚዳ፥ ቢዳ ባሬው ዴዒያዎ ኡባ ዛሊዒዳ፥ ኣ ሻሚዳ።

ዳባ ሌሚሱዎ

47 «ቃሲ ሳሉዎ ካዉቲላይ ኡባ ቆዎ ዋሊያ ኦይቂያ፥ ኣባን ዩጌቲዳ ዳባ ማላቲ። 48 ዋሊ ዳባ ኩሚዳ ዎዴ፥ ዋሊያ ኦይቂያ ኣሳቱ ኣባፎ ጋዩ ኬሲዳ ኡቲዲኖ፤ ያቲዳ ሎዎ ዋሊያ ቆሪዳ፥ ዩጊያ ሚሻን ዩጌዲኖ፤ ሺን ኢታ ዋሊያ ዎራ ኦሌዲኖ። 49 ዎዴያ ወርሴላን ሄዎዳን ሃናና፤ ኪታንቻቱ ዩዳ፥ ናጋሪንቻቱዎ ዲላቱዎ

ጊደፔ ቆሪዳ፣ 50 ቶዔና ታማን ኦላናዋንታ፤ ሄዋን ኡንቱንቱ ዩካናዋንታኔ ኣቻ ጳቃናዋንታ።

51 «ሃዌ ኡባይ ሂንቱንቶ ጌሌዳ?» ያጊዳ ኡንቱንታ ኦቼዳ። ኡንቱንቱ፣ «ኤ።» ያጌዲኖ።

52 ኢ፣ «ሄዋ ዲራው፣ ሳሉዋ ካወቲላ ፀራ ሎይሊ ኤሪያ፣ ሂጊያ ታማሪሲያ ኡባይ፣ ባሬ ሚሻ ሺሺ ዋሌዳ ጎሊያፔ ኦራላ ሚሻኔ ኤጫ ሚሻ ሻኪ ኬሲያ ኢዛዋ ማላቲ» ያጊ ዛሬዳ።

ናዚሬቲን ዩሱሳ ጋኬዳ ኢፀዋ

(ማር 6:1-6፤ ሉቅ 4:16-30)

53 ዩሱሲ ሃ ለሚሳቱዋ ኦዲ ወርሶዋፔ ጉዩያን፣ ሄዋፔ ዴንዲዳ፣ 54 ባሬ ካታማ ናዚሬቲ ቤዳ። ኣዩሁዳ ዋሳ ጎሌን ታማሪሲያዋ ሲሴዳ ኣሳይ ማላሌቲዳ፣ ሃዋዳን ያጌዳ፤ «ሃዌ ሃ ኣቶ ኤራቲላኔ ያሳይ ኦሊያ ማላታ ኦላናው ዋልቃ ሃቃፔ ኣኬዳ?»

55 ሃዌ ኣናዒያ ናዒ ጊዳኔ? ኣ ዳያ ማይራዋ ጊዳኬ? ኣ ኢሻቲ ያዩቆባ፣ ዮሴፋ፣ ሲሞናኔ ዩሁዳ ጊዲኪኖ? 56 ኣ ሚቻቲ ኡባይ ኦናና ዴዒኪኖ? ያቲና፣ ኢ ሃ ኤራ ኡባ ሃቃፔ ዴማዳ?» ያጌዲኖ። 57 ኡንቱንቱ ኢ ጊያባ ኣኬናን ኢጼዲኖ።

ሺን ዩሱሲ ሄ ኣሳሲ፣ «ናቢ ባሬ ጋዲያኒኔ ባሬ ሶይ ኣሳን ቦንቼቲና፤ ሺን ሃራሳ ኡባን ቦንቼቲ» ያጌዳ። 58 ኡንቱንቱ ኣማኒቤና ዲራው፣ ዩሱሲ ዳሮ ማላታ ሄ ሳን ኦሊቤና።

14

ፃማቂያ ዮሃንሳ ሃይቁዋ

(ማር 6:14-29፤ ሉቅ 9:7-9)

1 ሄ ዋዴ ጋለላ ጋዲያ ኣዩሲያ ሄሮዲሴ ዩሱሳባ ሲሴዳ፤ 2 ያቲዳ ባሬ ቆማቱዋሲ፣ «ሃዌ ሃይቁዋፔ ዴንዴዳ ፃማቂያ ዮሃንሳ፤ ያሳይ ኦሊያ ዋልቃማ ማላታ ኢ ኦሊያዌ ሄዋሳ» ያጌዳ።

3 ኣዩሲ ጎፔ፣ ሄሮዲሲ ባሬ ኢሻ ፒሊጶሳ ማቻቲ ሄሮዲያዲ ጋሶታን ዮሃንሳ ኦይሊ ቃሺሲዳ፣ ቃሾ ጎሌን ዩጊ ዋሌዳ። 4 ኣዩሲ ጎፔ፣ ዮሃንሲ ሄሮዲሳ፣ «ኔኒ ሄሮዲያዶ፣ ኔ ኢሻ ማቻቶ ኣካናው ሂጊ ዲጌ» ያጌዳ። 5 ሄሮዲሲ ዮሃንሳ ዋቆናው ኮዬዳ፤ ሺን ዩሁዳ ኣሳይ ናቢያዳን ዮሃንሳ ጻሌዳ ዲራው፣ ኣሳው ያዩዳ።

6 ሺን ሄሮዲሲ ዩሌቲዳ ጋላሳ ባላይ ጋኪና፣ ሄሮዲያዲ ናታ ኣሳ ሲንሳን ዲራዴ ሄሮዲሳ ናሹቻው። 7 ሄሮዲሲ ናቶ፣ «ኔና ሎዔዳዋ

14:4 ዋግ 18:16፤ 20:21

አያኔ ገደፔ፣ ታና ኦቻ፤ ታኒ ኔው አማና» ያገዴ ኢዚው ጫቄዳ።
 8 ናታ ባሬ ዳይ ዘሪያ አካዴ ሄሮዲሳ፣ «ጻማቄያ የሃኒሳ ሁጲያ ሃ
 ዋጪቲያን ዋላዴ ታው አማ» ያጋዲ። 9 ካቲ አው ቃሬቲዳ፤ ሺን
 ባሬ ጫቄዋ ዲራውኔ ባሬናና ማዳን ኡቴዳ አማላ ዲራው፣ ኢዚው
 የሃኒሳ ሁጲ አማታና ማላ አዛዜዳ። 10 ካቲ ከቲዳ፣ የሃኒሳ
 ቆጲያ ቃሾ ጎሌን ሙጪሴዳ። 11 ሁጲያ ዋጪቲያን ዋላ አሂዳ፣
 ናቲው አማዲኖ፤ ናታ ሄ ሁጲያ ባሬ አቲኮ አፋዲ። 12 የሃኒሳ
 ካሊያዋንቱ ዪዴ፣ እ አጋ አፊዴ ሞጌዲኖ፤ ሄዋፔ ሲሚዴ ሃ
 ዬወዋ ዬሱሳው ቢዴ አዴዲኖ።

ዬሱሲ ኢቼሹ ሻዓ አሳ ሚዜዳ
 (ማር 6:30-44፤ ሉቅ 9:10-17፤ ዮሀ 6:1-14)

13 ዬሱሲ ሄዋ ሲሲዳ፣ ዋንገሪያን ጌሊዳ፣ ሄዋፔ ባሬካ አሳይ
 ባይናሳ ቤዳ፤ አሳይ ሄዋ ሲሲዳ፣ ካታማፔ ዳንዲዳ፣ ጌዲያን አ
 ካሌዲኖ። 14 ዬሱሲ ዋንገሪያፔ ኬሴዳ ዋዳ፣ ዳሮ አሳ ቤዲዳ፣
 ሄ አሳው ቃሬቲዳ፤ ያቲዳ ኡንቱንቱና ዳዲያ ሃርጋንቻቱዋ ፓሌዳ።

15 ሳዓይ አማርሲያ ዋዳ፣ ዬሱሳ ካሊያዋንቱ አኮ ዪዴ፣ «ሃዌ
 ሳዓይ አሳይ ባይናሳ፤ ሃዲ ሳዓይ ቃሚዲጌዳ፤ አሳይ ኡባይ
 ቄሬ ካታማቱዋ ቢዳ፣ ባሬንቶ ቁማ ሻማና ማላ፣ አሳ ሞዪዛ»
 ያጌዲኖ።

16 ሺን ዬሱሲ ኡንቱንታ፣ «አሳይ ባናው ኮሸና፤ አሳው
 ማቲቲያባ ሂንቱንቱ አሚቱ» ያጌዳ።

17 ኡንቱንቱ ዛሪዳ አ፣ «ኑሲ ሃዋን ኢቼሹ ኡኪላፔኔ ላዑ
 ሞሊያፔ አቲን፣ ሃራይ ባዋ» ያጌዲኖ።

18 ዬሱሲ ኡንቱንታ፣ «ሄዋንታ፣ ሃ ታኮ አሂቱ» ያጌዳ። 19 አሳይ
 ማታኒ ኡታና ማላ፣ ዬሱሲ አዛዜዳ፤ ኢቼሹ ኡኪላኔ ላዑ ሞሊያ
 ኦይቄዳ፣ ሳሉዋ ፑዳ ፃሊዳ፣ ያሳ ጋሳቲዳ፤ ሄ ኡኪላ ማንሳዳ፣
 ባሬና ካሊያዋንቱሲ አሚና፣ ኡንቱንቱ ጮራ አሳው ገሸዲኖ።
 20 አሳይ ኡባይ ሚዴ ካሌዳ፤ አቲዳ ሱፓ ዶካ ታማኔ ላዑ
 ዛሞቤሊያ ኩሚዳዋ ዳንሌዲኖ። 21 ሚዳ አሳይ ማጫ አሳኔ ናና
 ፓይዴናን፣ ኢቼሹ ሻዓ ገዲያዋ ኬና።

ዬሱሲ አባ ቦላና ሃማቲዳ ቤዳ
 (ማር 6:45-52፤ ዮሀ 6:15-21)

22 ዬሱሲ ጮራ አሳ ሞዪዲዳ፣ ባሬና ካሊያዋንታ ዋንገሪያን
 ጌሊዳ፣ ባሬፔ ሲንላቲዳ፣ አባፔ ሄፊንላ ፒናና ማላ አዛዜዳ።
 23 አሳ ሞዪዲዳ፣ ያሳ ዋሳናው ዳሪያ ሁጲያ ባሬካ ኬሴዳ፤
 ሳዓይ ቃሚ ዲጊናካ ሄዋን ባሬካ ዳዔ። 24 ሺን ዋንገሪ ሄ ዋዳ፣

አባ ቦላን ዳዲሺን፣ ሲንላ ባጋና ጫርኩ ጫርኪያ ዲራው፣ ቤታይ ዋንጊሪያ ያኔ ሃኔ ሱጌ።

25 ባይራ ኩቱ ዋሲ ሲሚና፣ ዩሱሲ አባ ቦላ ሃሚቲዳ፣ ኡንቱንቱኮ ዩዳ። 26 እ ካሊያዋንቱ አባ ቦላ ኢ ሃሚቲሺን ቤዒ ዳጋሚዳ፣ «ሃዌ ዋይቲሊያ ጊዳኔ!» ጊ ያዩዳ ዋሴዲኖ።

27 ሺን ዩሱሲ ኤሌካ ኡንቱንታ፣ «አይኔ ባዋ፤ ታናቴኔ፤ ያዮፒቱ!» ያጌዳ።

28 ጳዳርሲ ዛሪዳ እ፣ «ታ ጎዳው፣ ሃዌ ኔና ጊደፔ፣ ታኒ ሃላ ቦላና ኔኮ ባና ማላ፣ ታና አዛዛሪኪ» ያጌዳ።

29 ዩሱሲ ጳዳርሳ፣ «ሃያ!» ያጌዳ።

ጳዳርሲ ዋንጊሪያፔ ዋዲዳ፣ ሃላ ቦላና ሃሚቲዳ፣ ዩሱሳኮ ቡሳ ደሜዳ። 30 ሺን ጫርኩዋ ዋልቃ ቤዒዳ፣ ያዩዳ፤ ሃላይ ባሪና ሚቱዋ ደሜዳ ዋዳ፣ ባሪ ኮሻ ቶቁ ኦሲዳ፣ «ታ ጎዳው ታና አሻሪኪ!» ያጊ ዋሴዳ።

31 ሄ ማንዒያንካ ዩሱሲ ባሪ ኩሺያ ዩዲ ጳዳርሳ ኦይቂዳ፣ «ላ ሃ አማኑ ላፌዳዎ! አዩሲ ሲቶዲ?» ያጌዳ።

32 ኡንቱንቱ ላዑ ዋንጊሪያን ጌሌዳ ዋዳ፣ ጫርኩ ዋፑ ጌዳ።

33 ዋንጊሪያ ጊደን ዳዒያ አ ካሊያዋንቱ ዩሱሳ፣ «ኔኒ ያሳ ናባ ጊዳዳዌ ቱማ» ያጊዳ አው ጎዩኔዲኖ።

ዩሱሲ ጌንሳሬዳን ሃርጋንቻ ፓሌዳ
(ማር 6:53-56)

34 ኡንቱንቱ አባ ፒኒዳ፣ ጌንሳሬዳ ጌቲቲያ ጋዲያ ጋኬዲኖ።

35 ሄ ጋዲያ አሳይ ዩሱሳ ጊዲያዋ ኤሬዲኖ፤ ሄዋ ሄራ ጋዲያ ኡባ ኪቲዳ፣ ሃርጊያ አሳ ኡባ አኮ አሄዲኖ። 36 ሃርጊያ አሳይ አ ማዩዋ ማጫራ ዓላላ ቦቻና ማላ፣ አ ዋሴዲኖ፤ አ ማዩዋ ማጫራ ቦቹዳ ኡባይካ ፓዳዳ።

15

አዋቱዋ ዋጋባ
(ማር 7:1-13)

1 ሄዋፔ ጉዩያን፣ ሂጊያ ታማሪሲያ ኢቲ ኢቲ አሳይኔ ፓሪሳዋቱ ዩሩሳላሚፔ ዩሱሳኮ ዩዳ፣ 2 «ኔና ካሊያዋንቱ አዩሲ ኑ አዋቱዋ ዋጋ ባይዚኖ? አዩሲ ጎፔ፣ ኡንቱንቱ ቁማ ማናፔ ካሴቲዳ፣ ባሪንቱ ኩሺያ ሜጩቲኪኖ» ያጌዲኖ።

3 ዩሱሲ ዛሪዳ፣ ኡንቱንታ ሃዋዳን ያጌዳ፤ «ሂንቲንቱ ሂንቱ ዋጋ ዲራው፣ ያሳ አዛዙዋ ፖሊያዋ አዩሲ ኢዲቲ? 4 አዩሲ ጎፔ ያሳይ፣ ነኔ አባኔ ኔ ዳዮ ቦንቻ) ቃሲ፣ ባሪ አባ ዋይ ባሪ

ዳዮ ቦሪያዌ ሃይቆ ያጌዳ። 5-6 ሺን ሂንቴንቱ፣ ሳቲ ኣሳይ ባሪ ኣባ ዎይ ባሪ ዳዮ ማዲያባይ ባሪው ዳዲና፣ «ሃዌ ያሳዎ» ጎፔ፣ ባሪ ኣባ ዎይ ባሪ ዳዮ ቦንቻናው ቤሴና) ያጌታ፤ ያቲዳ ሂንቴንቱ ሂንቴንቱ ዎጋ ፖላናው ያሳ ቃላው ኣዛዘቲኪታ። 7 ሃ ሎዒ ማላቲያ ኢታ ኣሳቶ፣ ኢሲያሲ ባሌናን ሂንቴንቱባው ቲምቢቲያ ኦዲዳ።

8 ሳሳይ ሃዎዳን ያጌዳ፤

«ሃዌ ኣሳይ ታና

ባሪ ቦላ ደናን ቦንቹ፤

ሺን ኡንቱንቱ ዎዛናይ

ታፔ ሃኩዎን ዳዔ።

9 ኣሳይ ታው ማላ ጎዩኔ፤

ኣዩሲ ጎፔ፣ ኣሳይ ኦፊዳ ኣዛዙዎ

ያሳ ሂጊያ ማላቲሲዳ

ታማሪሴዲና» ጌዳ) »

ያጌዳ።

ኣሳ ቱኒሲያዎንታ

(ማር 7:14-23)

10 ዩሱሲ ዳር ኣሳ ባሪኮ ያሲዳ፣ «ሲሲቲኔ ኣኩኪቲ፤ 11 ኣሳ ቱኒሲያዌ ደና ጊዶ ጌሊያዎ ጌዳና፤ ሺን ኣሳ ቱኒሲያዌ ደናፔ ኬሲያዎ» ያጌዳ።

12 ሄዎፔ ጉዩያን፣ ኣ ካሊያዎንቱ ኣኮ ዩዳ፣ «ፓሪሳዎቱ ኔኒ ሃሳዬዳዎ ሲሲዳ፣ ሃንቁቲዳዎ ኣኩካይ?» ያጌዲኖ።

13 ሺን ዩሱሲ ዛሪዳ፣ «ሳሉዎን ዳዒያ ታ ኣቡ ቶኪቤና ሚላ ኡባይ ሾዴታናዎ። 14 ኡንቱንቶ ሂርጎፕቲ፤ ኡንቱንቱ ቆቃ ካሌሊያ ቆቃቱዎ፤ ቆቃይ ቆቃ ካሌሉፔ፣ ላዑካ ኦላን ኩንዳ» ያጌዳ።

15 ጳዒርሲ ዛሪዳ፣ «ሃ ሎሚሱዎ ቢሌላ ኦሲ ኦዳሪኪ» ያጌዳ።

16 ዩሱሲ ኡንቱንታ ሃዎዳን ያጌዳ፤ «ሂንቴንቶ ቃሲ ሃዒ ጋካናዉካ ጌሊቤኔ? 17 ደናና ጌሊያ ኡባይ ኡሉዎ ጊዶ ቢዳ፣ ቃሲ ኡሉዎፔ ካሪ ኬሲያዎ ኤሪከቲ?» 18 ሺን ደናፔ ኬሲያዌ ዎዛናፔ ኬሴ፤ ኣሳ ቱኒሲያዌ ሄዎ ማላ። 19 ኣዩሲ ጎፔ፣ ዎዛና ጊዶፔ ኢታ ቆፋይ፣ ዎዲያዌ፣ ዎሹሚያዌ፣ ቃሲ ዎሹማናው ካጃሊያዌ ኡባይ፣ ዉዒያዌ፣ ዎርዲዎን ማርካቲያዌ፣ ቦሪ ኬሴ።

20 ሄዎ ማላቲያዌ ኣሳ ቱኒሲያዎፔ ኣቲን፣ ሜጨቤና ኩሺያን ሚያዌ ኣሳ ቱኒሴና) ያጌዳ።

ካናኔ አሳ ጊዳዳ ኢቲ ማጫወኒ አማኑዋ
(ማር 7:24-30)

21 ሄዋፔ ጉዩያን፣ ዩሱሲ ሄዋፔ አገዳ፣ ዒሮሳኔ ሲደና ጌቲቲያ ካታማቱ ዳዒያ ጋዲያ ቤዳ። 22 ካናኔ ጌቲቲያ ጋዲያ ማጫወና ኢቲና ሄዋፔ ዩሱሳኩ ያዳ፣ ባሬ ኮሻ ጾቁ አሳዳ፣ «ታ ጎዳው፣ ዳዋታ ናዓው፣ ታው ቃሬታሪኪ፤ ታ ናቶ ኢታ አያናይ ሎዔና ኦይላ ኦይቄዳ» ያጋዱ።

23 ሺን ዩሱሲ ኢዚው አይ ቃላኔ ቃቲቤና፤ አ ካሊያዋንቱ አኮ ዩዳ፣ «ሃ ሚሺራታ ኑ ጌዱዋ ካላ ካላዳ፣ ባሬ ኮሻ ጾቁ አሳዳ ኦዳው፤ ሄዋ ዲራው፣ ኔኒ ኢዞ ዩዳርከ» ያገደ ዋሴዲኖ።

24 ዩሱሲ ዛሪዳ፣ «ታኒ ባዬዳ ደርሳው፣ ኢሰራዔሊያ አሳ ያላላው ከቲታዲ» ያጌዳ።

25 ሺን ኢዛ ያዳ፣ «ታ ጎዳው፣ ታና ማዳሪኪ!» ያጋዳ አው ጎዩናዲ።

26 ቃሲ ኢ ዛሪዳ፣ «ናና ቁማ አኪዳ፣ ካና ማራው ኦሊያዋ ሎዓ ጊዳና» ያጌዳ።

27 ሚሺራታ፣ «ኤ ታ ጎዳው፣ ሄዋ ቱማ፤ ሺን ሃራይ አቶ ካና ማራቱ ባሬንቱ ጎዳቱ ሚና፣ ሳምፓፔ ላሌቲዳ ሱፓ ሚናቴኔ» ያጋዱ።

28 ዩሱሲ ዛሪዳ ኢዞ፣ «ሃ ሚሺራቱ፣ ኔ አማኑ ዋልቃማ፤ ኔኒ ኮዬዳዋዳን ኔው ሃና» ያጌዳ። ኢዚ ናታ ኤሌካ ገፃ አጋዱ።

ዩሱሲ ጮራ ሃርጋንቻቱዋ ፓሌዳ

29 ዩሱሲ ሄዋፔ ዳንዲዳ፣ ጋለላ አባ ማታ ቤዳ፤ ቃሲ ኢቲ ዳሪያ ቦላ ከሲዳ፣ ሄዋን ኡቲዳ። 30 ዳር አሳይ ዋባቱዋ፣ ቆቃቱዋ፣ ቁናቱዋኔ ዲዳቱዋ፣ ቃሲ ሃራ ጮራቱዋ አኮ አሂዳ፣ አ ማታን ዋሌዳ። ዩሱሲ አንቱንታ ፓሌዳ። 31 ሄዋ ዲራው፣ አሳይ ዲዳቱ ሃሳዩሺን፣ ቁናቱ ሱሪሺን ዋባቱ ሃማቲሺን፣ ቆቃቱ ጸሊሺን ቤዒ ማላሌቲዳ፣ ኢሰራዔሊያ ያሳ ጋላቲዲኖ።

ዩሱሲ ኦይዱ ሻዓ አሳ ሚዜዳ
(ማር 8:1-10)

32 ዩሱሲ ባሬና ካሊያዋንታ ባሬኮ ጸሲዳ፣ «ሃ ጮራ አሳይ ታናና ሄዙ ጋላሳይ ጋካናው ጋሚዔዳ ዲራው፣ ታኒ ሃ አሳው ቃሬታይ፤ አንቱንቶ ሃዒ ሚያዌ ባዋ። ቃሲ አንቱንቱ ኦጊያን ደቡሪዳ ኩንዳና ማላ፣ ቁማ ሚዜናን አንቱንታ ማላ ዩዳናዉካ ኮዩኬ» ያጌዳ።

33 አ ካሊያዋንቱ ዛሪዳ ዩሱሳ፣ «ኑኒ ሃ ባዙዋን ሃዋ ከና አሳ ካሊሲያ ቁማ ሃቃፔ ዳማኔ?» ያጌዲኖ።

34 ቃሲ ዩሱሲ ኡንቱንታ፡ «ሂንቱንቶ አፑን ኡከላይ ዴዒ?» ያጊዴ ኦቹዳ።

ኡንቱንቱ፡ «ላፑ ኡከላይኔ ሞሌቱዋፕ ኣማራዳዋንቱ ዴዒኖ» ያጊዲኖ።

35 ዩሱሲ አሳ፡ «ሳዓን ኡቲቱ» ያጊዴ። 36 ሂ ላፑ ኡከላኔ ሞሊያ ኦይቂዴ፡ ያሳ ጋላቲዳ፤ ሜንጮሬሊዴ ባሬና ካሊያዋንቱሲ ኢሜዳ፤ ቃሲ ኡንቱንቱ ጮራ አሳሲ ኢሜዲኖ።

37 አሳይ ኡባይ ሚዴ ካሌዳ፤ ሚና ኦቲዳ ላፑ ዛምቤሊያ ኩሚዳ ሱፓ አ ካሊያዋንቱ ዴንጮዲኖ። 38 ሜዳ አሳይ ማጫ አሳኔ ናና ፓይዴናን፡ ኦይዲ ሻዓ አቱማ አሳ። 39 ዩሱሲ አሳ ዩዶዋፕ ጉዲያን፡ ዋንጊሪያን ጌሊዴ፡ ሜጌዶኔ ጌቲቲያ ጋዲያ ቤዳ።

16

ማላታ ቤዓናው ኦቹዳ ኦሻ

(ማር 8:11-13፤ ሉቅ 12:54-56)

1 ኢቲ ኢቲ ፓሪሳዋቱኔ ሳዲቃዋናቱ ዩሱሳኮ ዪዴ፡ አ ፓጫናው ኮዬዲኖ፤ ያቲዴ ባሬንታ ሳሉዋፕ ማላታ ቤሳና ማላ ዋሴዲኖ።

2 ሺን ዩሱሲ ዛሪዴ፡ ኡንቱንታ ሃዋዳን ያጊዳ፤ «ሳዓይ ቃሚያ ዋይ ሂንቱንቱ፡ ሳሉ ዘዔዳ ዲራው፡ ሳዓይ ሻማናዋ» ያጊታ፤

3 ዋንቱማላን ቃሲ፡ ሳሉ ዘዔዳ ጉባኔዳ ዲራው፡ ሃቹ ኢራይ ቡካናዋ» ያጊታ፤ ሳሉዋ ያሊዴ፡ ሳዓይ ሃናናዋ ኤራናው ዳንዳዪታ፤ ሺን ታ ዩሳ ዋዲያ ማላታ ሻኪ ኤራናው ዳንዳይኪቱ?

* 4 ሃ ዋዲያ አሳይ ኢታይኔ ዋሹሚያዌ፡ ያሳው አማኔቲናዌ፡ ማላታ ኮዬ፤ ናቢያ ዮናሳ ማላታፕ አቲን፡ ሃራ ማላታይ አው ኢሜቲና» ያጊዳ። ሂዋፕ ሲሚዴ፡ ኡንቱንታ አጊዴ ቤዳ።

ፓሪሳዋቱዋኔ ሳዲቃዋናቱዋ ኢርሹዋ

(ማር 8:14-21)

5 አ ካሊያዋንቱ አባ ፒኔዳ ዋዴ፡ ቁማ አፋናዋ ዶጌዲኖ።

6 ዩሱሲ ኡንቱንታ፡ «ፓሪሳዋቱዋ ኢርሹዋፕኔኔ ሳዲቃዋናቱዋ ኢርሹዋፕኔ ሂንቱንታ ኤሪዴ ናጌቲቱ» ያጊዳ።

7 ኡንቱንቱ ባሬንቱ ጊደን፡ «ኢ ሃዋ ያጊያዌ ኦኒ ቁማ አሂቤና ዲራሳ» ያጊዴ ሃሳያ ዶሜዲኖ።

* 16:3 ኢቲ ኢቲ ጌሻ ማፃፋ ቤኒ ቢሌላቱዋን ዩሱሳ ቃላቱ ሃ ፓይዳቱዋን ባዋ።

8 ሺን ኡንቱንቱ ጊያዎ ዩሱሲ ኤሪዳ፡ «ሃ አማኑ ፓጩዳዎንቶ፡ ቁማይ ባይና ዲራው፡ አዩሲ ሂንቱንቱ ጊደን ሃሳዩቱ? 9 ሃሳካ ሂንቱንቶ ጌሊቤኔ? ታኒ ኢቼሹ ኡኪላ ኢቼሹ ሻዓ አሳ ሚዛዴ ካሊሴዳዎ፡ ቃሲ ሂንቱንቱ አፑን ዛምቤሊያ ኩንሊዳ አቴዳ ሱፓ ዴንሴዲቲንቶ ዎዛና አሊኪቱ? 10 ዎይ ታኒ ላፑ ኡኪላ ኦይዱ ሻዓ አሳ ሚዛ ካሊሴዳዎ፡ ቃሲ ሂንቱንቱ አፑን ዛምቤሊያ ኩንሊዳ አቴዳ ሱፓ ዴንሴዲቲንቶ ዎዛና አሊኪቱ? 11 ታኒ ሂንቱንታ ፓሪሳዎቱዎ ኢርሹዎፕኔ ሳዲቃዎናቱዎ ኢርሹዎፕ ናጌቲቱ ጊያዎፕ አቲን፡ ኡኪላባ ሂንቱንቶ ሃሳያቤናዎ ሂንቱንቱ ዋኒዳ አኬኪኪቱ?» ያጌዳ።

12 አ ካሊያዎንቱ ዩሱሲ ባሬንቶ ኦዴዳዎ፡ ፓሪሳዎቱዎ ቲሚርቲያፕኔ ሳዲቃዎናቱዎ ቲሚርቲያፕ ኡንቱንቱ ናጌታና ማላ ኦዴቶዎፕ አቲን፡ ሙናቃን ቲጊያ ኢርሹዎፕ ናጌታና ማላ ጊዳናዎ ሄ ዎዴ አኬኬዲኖ።

ጳዲሮሳ አማኑዎኔ ማርካቴላ
(ማር 8:27-30፤ ሉቅ 9:18-21)

13 ዩሱሲ ቀሳሪያ ፒሊጶሳ ጌቲቲያ ጋዲያ ጋኬዳ ዎዴ፡ ባሬና ካሊያዎንታ፡ «አሳይ ታና፡ አሳ ናዓ ኦና ጊ?» ያጌዴ ኦቼዳ።

14 አ ካሊያዎንቱ ዛሪዳ፡ «ኔና ኢቲ ኢቲ አሳይ፡ ፃማቂያ ዮሃኒሳ ያጌ፤ ሃራንቱ ቃሲ ኤላሳ ያጊኖ፤ ቃሲ ሃራንቱ ኤርሚያሳ ዎይ ናባቱዎፕ ኢቱዎ ያጊኖ» ያጌዲኖ።

15 ዩሱሲ ኡንቱንታ፡ «ያቲና ሂንቱንቱ ታና ኦና ጊቲ?» ያጌዳ።

16 ሲሞኒ ጳዲሮሲ ዛሪዳ፡ «ኔኒ ዴዑዎ ያሳ ናዓ ኪሪሰቶሳ» ያጌዳ።

17 ዩሱሲ ዛሪዳ፡ ሃዎዳን ያጌዳ፤ «ዮና ናዓ ሲሞና፡ ሃዎ ኔው ሳሉዎን ዴዒያ ታ ኣቡ ኤሪሴዳዎፕ አቲን፡ አሳይ ኦኒኔ ኔና ኤሪሲቤና ዲራው፡ ኔኒ ኣንጄቴዳዎ። 18 ጳዲሮሳ፡ ታኒ ኔው ኦዳይ፤ ኔኒ ሹቻ፤ ታኒ ሃ ዛላ ቦላ ታ ዎሳ ጎሊያ ኬፃና፤ ታ ዎሳ ጎሊያ ሃራይ አቶ፡ ሲዖሊያ ዎልቃይካ ያናናው ዳንዳዬና። 19 ታኒ ኔው ሳሉዎ ካውቴላ ቁልፒያ አማና፤ ኔኒ ሳዓን ሃኖ ጎዌ ኡባይ ሳሉዎን ያሳ ሲንላን ሃናና፤ ሺን ኔኒ ሳዓን ሃኖፕ ጌዳዌ ሳሉዎንካ ሃኔና» ያጌዳ።

20 ሄዎፕ ጉዪያን፡ ኢ ኪሪሰቶሳ ጊዳዳዎ አ ካሊያዎንቱ ኦሲኔ ኦዴና ማላ፡ ኡንቱንታ አዛዜዳ።

ዩሱሲ ባሬና ጋካና ሜቱዎባኔ ሃይቁዎባ ኮይሮ ኦዲዎ ኦዴዳ
(ማር 8:31-33፤ ሉቅ 9:22-27)

21 ሄ ዎዲያፕፕ ደሚዳ ዬሱሲ፡ «ታኒ ዬሩሳሌሜ ቢና፡ ታና ጪማቱ፡ ቄሳቱዎ ካፓቱኔ ሂጊያ ታማሪሲያዎንቱ ዳሪ ዋዪሳናው ቤሴ፤ ኡንቱንቱ ታና ዎቆናውኔ ታኒ ሄዜንሶ ጋላሲ ሃይቁዋፕ ዴንዳናው ቤሴ» ያጊዳ፡ ባሪና ካሊያዎንቱሲ ጌሺዳ ኦዲዎ ደሚዳ።

22 ጳዲሮሲ ኣ ኢቲ ባጋ ዛሪዳ፡ «ታ ጎዳው፡ ያሳይ ኔና ሄዎፕ ኣሾ፤ ሃዌ ኔ ቦላ ኡባካ ዬና» ያጊዳ ኣ ዘራናው ደሚዳ።

23 ሺን ዬሱሲ ጉዬ ሲሚዳ ጳዲሮሳ፡ «ሃ ሴፃናው፡ ኔኒ ታ ማታፕ ኪቻ፤ ኔኒ ኣሳይ ደሲያዎ ቆፕያዎፕ ኣቲን፡ ያሳይ ደሲያዎ ቆፕና ዲራው፡ ታው ቆቦ ጊዳዳ» ያጊዳ።

ዬሱሳ ካላናው ቤሲያ ኦጊያ
(ማር 8:34-9:1፤ ሉቅ 9:23-27)

24 ሄዎፕ ጉዬያን፡ ዬሱሲ ባሪና ካሊያዎንታ ሃዎዳን ያጊዳ፤ «ታና ካላናው ኮዬያ ኡሪይ ዳዎፕ፡ ባሪና ካደ፤ ያቲዳ ባሪ ማሰቃሊያ ቶኪዳ፡ ታና ካሎ። 25 ኣዪሲ ጎፕ፡ ባሪ ሺምፕዎ ኣሻናው ኮዬያ ኡሪይ ባዪዛናዎ፤ ሺን ባሪ ሺምፕዎ ታ ዲራው ባዪዚያ ኡሪይ ኣሻናዎ። 26 ኢቲ ኡሪይ ሳዓን ዳዒያ ኡባባ ባሪው ሺሺዳ፡ ባሪ ሺምፕዎ ባዪዘፕ፡ ኣ ኣያ ማዳኔ? ዎይ ኢቲ ኡሪይ ባሪ ሺምፕዎ ዎዛናው ኣያ ኢማና ዳንዳዪ? 27 ኣዪሲ ጎፕ፡ ታኒ፡ ኣሳ ናዓይ፡ ታ ኣቡ ቦንቹዎን ታ ኪታንቻቱዎና ያና ሃናይ፤ ኣሳ ኡባው ሄ ዎዳ ኣ ኦሱዎ ጋቲያ ኢማና። 28 ታኒ ሂንቱንቶ ቱሙዎ ጋይ፤ ኣማሪዳ ኣሳቱ፡ ታኒ፡ ኣሳ ናዓይ፡ ካቲያ ጊዳዳ ዪያዎ ቤዓና ጋካናው፡ ሃይቁናዎንቱ ሃዎን ዳዒና» ያጊዳ።

17

ዬሱሳ ማላይ ላሜቲዳ
(ማር 9:2-13፤ ሉቅ 9:28-36)

1 ዬሱሲ ኡሱፕን ጋላሳፕ ጉዬያን፡ ባሪናና ጳዲሮሳ፡ ያዪቆባኔ፡ ያዪቆባ ኣሻ ዮሃኒሳ ኣኪዳ፡ ኡንቱንቱ ያላላ ዎጋ ዳሪያ ሁጲያ ኬሴዳ። 2 ቃሲ ኡንቱንቱ ያሊሺን፡ ኡንቱንቱ ሲንሳን ላሜቲዳ፤ ኣ ዳሙ ኣዎይፊያዳን ፖዔዳ፤ ኣ ማዩካ ፖዑዎዳን ጳሌዳ። 3 ሙሴኔ ኤላሰ ዬሱሳና ሃሳዪሺን፡ ሃ ሄዙ ኣ ካሊያዎንቱ ቤዔዲና። 4 ጳዲሮሲ ዬሱሳ፡ «ታ ጎዳው፡ ኦኒ ሃዎን ዳዒናዎ ኦሲ ሎዓ፤

ኔኒ ደሶ፣ ኑኒ ሃዋን ሄዙ ደሲያ ኢቱዋ ኔው፣ ኢቱዋ ሙሴው፣ ኢቱዋ ኤላሳው ከፃና» ያጌዳ።

5 ኢ ሃሳዪሺን፣ ፖሊያ ሻሪ ዪኔ ኡንቱንታ ካሚ ኣጌዳ፤ ሻሪያ ጊደ፣ «ሃዌ ታኒ ሰቂያ ታና ናሼቲያ ታ ናዓ፤ ኢ ጊያዋ ሲሲቱ» ጊያ ቃላይ ዩዳ።

6 ኣ ካሊያዋንቱ ሄ ቃላ ሲሴዳ ዎዳ፣ ዳሮ ያዪዳ፣ ጉፋኒ ኣጌዲና። 7 ዩሱሲ ኡንቱንቱኮ ዪዳ፣ ኡንቱንታ ቦቲዳ፣ «ዳንዲቲ፤ ያዮፕቲ» ያጌዳ። 8 ኡንቱንቱ ቶቁ ጊዳ ያሊያ ዎዳ፣ ዩሱሳ ፃላላ፣ ኣቲን፣ ሃራ ኣሳ ኦናኔ ቤሲቤይኪና።

9 ኡንቱንቱ ዳሪያ፣ ዎዲሺን፣ ዩሱሲ ኡንቱንታ፣ «ታኒ ኣሳ ናዓይ፣ ሃይቁዋ፣ ዳንዳና ጋካናው፣ ሃ ሂንቱንቱ ቤዔዳዋ ኦሲኔ ኦደፕቲ» ያጊዳ ኣዛዘዳ።

10 ኣ ካሊያዋንቱ ዩሱሳ፣ «ያቲና፣ ሂጊያ ታማሪሲያዋንቱ ኣዪሲ፣ ሎላሰ ካሴቲዳ ያናው ቤሴ» ጊና? » ያጊዳ ኦቲዲና።

11 ኢ ዛሪዳ ያጌዳ፤ «ኤላሰ ካሴት ዪዳ፣ ኡባባ ጊሲሳናዎ። 12 ሸን ታኒ ሂንቱንቶ ኦዳይ፤ ኤላሰ ሃዋ፣ ካሴ ዪዲጌዳ። ሄዎዳ ኣሳይ ኣ፣ ባሪንቶ ኮዬዳዋን ኡባ ኦፊዳዎ፣ ኣቲን ኣ ኤሪቤይኪና፤ ሄዎዳንካ፣ ቃሲ ታና፣ ኣሳ ናዓ፣ ኣሳይ ዋዪሳናዎ» ያጌዳ።

13 ኣ ካሊያዋንቱ ሄ ዎዳ ባሪንቶ ዩሱሲ ፃማቂያ ዮሃንሳባ ኦዲያዎ ኣኬኬዲና።

ዩሱሲ ኢታ ኣያናይ ኦይቄዳ ናዓ ፓሌዳ (ማር 9:14-29፤ ሉቅ 9:37-43)

14 ኡንቱንቱ ዳሮ ኣሳኮ ዩዳ ዎዳ፣ ኢቲ ቢታኒ ዩሱሳኮ ዪዳ፣ ኣ ሲንሳን ጉላባቲዳ። 15 «ታ ጎዳው፣ ታ ናዓ ዎዛና ባዪዲያ ሃርጊ ኦይቄና፣ ኢ ዳሮ ዎዳ ታማን፣ ቃሲ ዳሮ ዎዳ ሃሳን ኩንዲያ ዲራው፣ ኢ ዳሪ ሳኬቲ፤ ኣ ፓላሪኪ። 16 ኔና ካሊያዋንቱኮካ ኣ ኣሃዲ፤ ሸን ፓላናው ዳንዳዪቤይኪና» ያጌዳ።

17 ዩሱሲ ዛሪዳ ኡንቱንታ፣ «ኣማኔና ሃ ዎዲያ ጌላ ኣሳው! ታኒ ሂንቱናና ኣዉዳ ጋካናው ዳዓኔ? ቃሲ ሂንቱንቱባ ኣዉዳ ጋካናው ዳንዳያኔ? ናዓ ታኮ ሃ ኣኪዳ ዪቲ» ያጌዳ። 18 ዩሱሲ ኢታ ኣያና፣ «ኣፎ ኮሳ» ጊዳ ኣዛዘና፣ ኢታ ኣያናይ ናዓ፣ ኮሲ ኣጌዳ፤ ኤሌካ ናዓይ ፓዒ ኣጌዳ።

19 ሄዋ፣ ጉዪያን፣ ኣ ካሊያዋንቱ ባሪንቱ ፃላላ ዩሱሳኮ ዪዳ፣ «ኑኒ ኢታ ኣያና ከሳናው ኣዪሲ ዳንዳዪቤይኮ?» ያጌዲና።

17:5 ዶዎ 22:2፤ ዛር 18:15፤ ማዝ 2:7፤ ኢሳ 42:1፤ ማት 3:17፤ 12:18፤ ማር 1:11፤ ሉቅ 3:22 17:10 ሚል 4:5

20 ዩሱሲ ኡንቱንታ ያጌዳ፤ «ሄዌ ሂንቱንቱ አማኑ ጉዳዳ ዲራሳ፤ ታኒ ሂንቱንቶ ቱሙዋ ኦዳይ፤ ሂንቱንቶ ሳናፊጪያ ጌቱቲያ ጉላ ሚላቲ አይፊያ ኬና አማኑ ዳዒንቶ፡ ሂንቱንቱ ሃ ዳሪያ፡ ላዋፔ ያ ሺቃ) ያጌንቶ ኢ ሺቃና፤ ሂንቱንቱ አያኔ ኦላናዉካ ዳንዳያኒታ። 21 ሺን ሃዋ ማላ ዋሳፔኔ ያማፔ ሃራባይ ኬሳናው ዳንዳዬና» ያጌዳ።

ዩሱሲ ባሬ ሃይቁዋባ ላዒንሉዋ ኦዳዳ
(ማር 9:30-32፤ ሉቅ 9:43-45)

22 አ ካሊያዋንቱ ጋሊላን፡ ኢቲፔ ሺቁ ኡቲ ዳዒሺን፤ ዩሱሲ ኡንቱንታ፡ «ታና፡ አሳ ናዓ፡ አሳይ አሳው አሊዳ ኢማና። 23 አሳይ ታና ዋቆናዋ፤ ሄዋፔ ጉዱያን ታኒ ሄዜንሊያ ጋላሲ ሃይቁዋፔ ዳንዳና» ያጌዳ። አ ካሊያዋንቱ ዳሮ ቃሬቱዲኖ።

ጌሻ ጎሊያ ገራ ገሪያዋ

24 ዩሱሲኔ አ ካሊያዋንቱ ቂፊሪናሆማ ካታማ ዩዳ ዋዳ፡ ጌሻ ጎሊያሲ ቃራፃ አኪያዋንቱ ጳዒሮሳኮ ዪዳ፡ «ሂንቱንታ ታማሪሲያዌ ጌሻ ጎሊያ ገራ ገሪኔ?» ያጌዲኖ።

25 ኢ ዛሪዳ፡ «ገሬ» ያጌዳ።

ጳዒሮሲ ሶይ ጌሌዳ ዋዳ፡ ዩሱሲ ካሲቲዳ አ፡ «ሲዋና፡ ኔ ቆፋይ አዬ? ሃ ሳዓ ካታቱ ቃራፃ ዋይ ገራ ኦፔ አኪኖ? ባሬንቱ ጋዲያ አሳፔ አኪኖ ዋይ ሃራ ጋዲያ አሳፔ አኪኖ?» ያጌዳ።

26 ጳዒሮሲ፡ «ሃራ ጋዲያ አሳፔ አኪኖ» ያጌዳ።

ዩሱሲ ጳዒሮሳ፡ «ያቶፔ፡ ጋዲያ አሳይ ገራናው ቤሴና። 27 ሺን ኑኒ ሃ አሳቱዋ ሃንቁላናው ኮዮኮ፤ ኔኒ አባ ባዳ አኒ ዳባ ዬጋ፤ ያታዳ ኮይሮ ኬሲያ ዋሊያ ኦይቃዳ፡ አ ዶና ፖቂያ ዋዳ፡ ገራው ገዲያ ሚሻ ኔኒ ዳማና። ሄዋ አካዳ፡ ታ ገራኔ ኔ ገራ ኡንቱንቶ ኢማ» ያጌዳ።

18

ኡባፔ አዲያዌ ኦኔ?

(ማር 9:33-37፤ ሉቅ 9:46-48)

1 አ ካሊያዋንቱ ዩሱሳኮ ሄ ዋዳ ዪዳ፡ «ሳሉዋ ካዉቲላን ኡባፔ አዲያዌ ኦኔ?» ያጌዲኖ።

2 ዩሱሲ ኢቲ ጉላ ናዓ ጳሲ ኡንቱንቱ ገደን ኤሲዳ፡ ሃዋዳን ያጌዳ፤ 3 «ታኒ ሂንቱንቶ ቱሙዋ ኦዳይ፤ ያሳኮ ሂንቱንቱ ሲሚዳ፡ ጉላ ናናዳን ሃናና ቆዮፔ፡ ሳሉዋ ካዉቲላ ኡባካ ጌላናው

ዳንዳዪኪታ። 4 ሲሚ ሃ ጉጻ ናዓዳን፣ ባሬና ካወሺያ ኦኒኔ ሳሉዋ ካወቱላን ኡባፔ ኦዲያ። 5 ቃሲ ሃዋ ማላ ናዓ ታ ሱንላን ሞኪያ ኦኒኔ ታና ሞኪ። 6 ሺን ታና ኦማኒያ ሃ ጉጻ ናናፔ ኢቱዋ ባሌሊያ ኦኒኔ፣ ጋጪያ ዋጋ ዋፃ ባሬ ቆዲያን ቃቺዳ፣ ኣባ ጪሙዋን ሚቱቲያዌ ኣው ሎዓ።

ዱቡዋሲ ጋሶ ጊዲያዋ
(ማር 9:42-48፤ ሉቅ 17:1-2)

7 «ኣላሚ ኣሳ ዱቢያ ዲራው፣ ሳዓው ኣዬሮ፤ ኣዬሲ ሳፔ፣ ዱቢያባይ ዩሳ ኣጌና፤ ሺን ዱቡ ኣ ጋሶታን ዪያ ኡራው ኣዬሮ።

8 «ኔና ኩሺ ዋይ ኔ ጌዲ ኔና ባሌላፔ፣ ኔፔ ቃንፃ ኦላ፤ ኔኒ ላዑ ኩሺያና ኔ ላዑ ጌዲያና ሜዲና ታማን ኦሌቲያዋፔ ዋባ ዋይ ዲፃ ኩሺያና ሜዲና ዴዑዋ ጌሊያዋ ኔው ሎዓ። 9 ቃሲ ኔ ኣይፊ ኔና ባሌላፔ፣ ኔፔ ዋጫ ኬሳ ኦላ፤ ኔኒ ላዑ ኣዬፊያና ጋናሚያ ታማን ኦሌቲያዋፔ ኢቲ ኣዬፊያና ሜዲና ዴዑዋ ጌሊያዋ ኔው ሎዓ።

10 «ሂንቴንቱ ሃ ጉጻቱዋፔ ኢቱዋኔ ካዴና ማላ፣ ሂንቴንታ ናጊቱ፤ ኣዬሲ ሳፔ፣ ታኒ ሂንቴንቶ ኦዳይ፤ ሳሉዋን ኡንቴንቱ ከታንቻቱ ኡባ ዋዴ፣ ሳሉዋን ዴዒያ ታ ኣቡ ሲንላን ዴዒኖ።

11 ኣዬሲ ሳፔ፣ ታኒ፣ ኣሳ ናዓይ፣ ባዬዳዋ ኣሻናው ያዲ።

ባዬዳ ዶርሳ ሌሚሱዋ
(ሉቅ 15:3-7)

12 «ኢቲ ኣሳው ፀቱ ዶርሳቱ ዴዒያዋንቱፔ ኢቱ ባዮፔ፣ ኡዲፑ ታማኔ ኡዲፑኑዋ ዴሪያን ኣጊዴ፣ ሄ ባዬዳዋ ኮያናው ቤኔ? ሂንቴንቱ ዋጊቱ? 13 ታኒ ሂንቴንቶ ቱሙዋ ጋይ፤ ኢ ዴሞፔ፣ ባዬቤና ኡዲፑ ታማኔ ኡዲፑ ዶርሳቱዋፔ ኣሊዴ፣ ሄ ኢቲ ዶርሳን ናሸፔ። 14 ሄዋዳንካ፣ ሳሉዋን ዴዒያ ሂንቴንቱ ኣቡ ሃ ጉጻቱዋፔ ኢቱ ባያናዋካ ኮዬና።

ባይዜዳ ኣሳሲ ኦጻናው ቤሲያባ

15 «ኔ ኢሻይ ኔና ናቆፔ፣ ኔሬካ ኣኮ ባዴ፣ ኣ ናቁዋ ኣው ኦዳ፤ ኢ ኔዋ ሲሶፔ፣ ኔ ኢሻ ባላፔ ዛራዳ። 16 ሺን ኢ ኔዋ ሲሶናን ኢፆፔ፣ ላዑ ዋይ ሄዙ ማርካይ ማርካቶዋን ዬዉ ኡባይ ቱማቲያ ዲራው፣ ሃራ ኢቲ ዋይ ላዑ ኣሳ ኔና ኢቲፔ ኣፋ። 17 ኢ ኡንቴንቱባ ሲሶናን ኢፆፔ፣ ኡባባ ኦማኒያ ኣሳው ኦዳ፤ ቃሲ ኣማኒያ ኣሳይ ጊያዋካ ኢ ሲሶናን ኢፆፔ፣ ኣማኔና ኣሳዳኒኔ ቃራፃ ሺሺያ ኣሳዳን ኣ ፓይዳ።

18 «ታኒ ሂንቴንቶ ቱሙዋ ጋይ፤ ኔኒ ሳዓን ሃኖ ጎዌ ኡባይ ሳሉዋን ያሳ ሲንላን ሃናና፤ ሺን ኔኒ ሳዓን ሃኖፕ ጌዳዌ ሳሉዋንካ ሃኔና።

19 «ቃሲካ ታኒ ሂንቴንቶ ኦዳይ፤ ሂንቴፔ ላዑ ኡራይ ሳዓን ያሳ ዋሲያዋን እይ ዬወዋኒኔ ኢቲ ዋዘና ጊዶፔ፤ ሳሉዋን ዳዒያ ታ ኣቡ ሄዋ ሂንቴንቶ እማና። 20 ኣዪሲ ጎፔ፤ ላዑ ኡራይ ዋይ ሄዙ ኡራይ ታ ሱንላን ሺቁያሳን፤ ታኒ ሄዋን ኡንቴንቱ ጊዱዋን ዳዒይ» ያጌዳ።

አቶ ጊያዋ

21 ጳዳርሲ ሄ ዋይ ዬሱሳኮ ዪዳ፤ «ጎዳው፤ ታ ኢሻይ ታና አፑ ካላ ናቆፔ ታኒ እው አቶ ጋናው ቤሲ? ላፑኑዋ ጋካናው ናቁኔይ?» ያጌዳ ኣ ኦቼዳ።

22 ዬሱሲ ዛሪዳ አ፤ «ጊዳና፤ ታኒ ኔና ላፑን ታሙ ካላ ላፑኑዋ ጋዪፔ አቲን፤ ላፑኑዋ ዓላላ ጊኬ።

23 «ኣዪሲ ጎፔ፤ ሳሉዋ ካወቱላይ ባሬ ቆማቱዋና ሚሻ ሄቲታናው ቆፔዳ ካቲያ ቤሴ። 24 ሄ ካቲ ሚሻ ሄቲታናው ዶሚዳ ዋይ፤ ዳር ሚሎኔ ቢራ ኣጩ ዳዒያ ኢቲ ቢታኒያ እኮ ኣሄዲኖ። 25 ሺን ሄ ቆማው ኣጩዋ ጨጊያዌ ጳዪና፤ ኣ ጎዳይ ሄ ኣጩዋ ጨጋናው፤ ኣ ማቻታኔ ኢኔ ኣ ናናይ፤ ቃሲ እው ዳዒያ ኡባባይ ዛለዒታና ማላ፤ ኣ ኣዛዜዳ። 26 ሄዋ ዲራው፤ ቆማይ ባሬ ጎዳ ሲንላን ጉልባቲዳ፤ ታ ጎዳው፤ ሃያጎዶ ጉላ ዋዲያ ናጋሪኪ፤ ታኒ ኔው ኡባባካ ጨጋና ያጊዳ ኣ ዋሴዳ። 27 ኣ ጎዳይ እው ቃሬቲዳ፤ ኣ ዬዲ ኣጌዳ፤ ኣ ኣጩዋካ እው ማሪ ኣጌዳ።

28 «ሺን ሄ ቆማይ ኬሲዳ፤ ባሬ ላጌላ ቆማቱዋፔ ኢቱ ባሬፔ ያቲ ቢራ ሳንቲሚያ ታልዒዳዋና ጋኬቲዳ፤ ሳ ሶላ ዳዒያ ታ ሚሻ ጨጋ) ያጊ ኦይቁዳ፤ ኣ ጩሌዳ።

29 «ያቲና ሄ ኣ ላጌላ ቆማይ ኣ ሲንላን ጉልባቲዳ፤ ሳላ ታዒሻይ ጉላ ዋዲያ ናጋሪኪ፤ ታኒ ኔው ኡባባካ ጨጋና) ያጊዳ ኣ ዋሴዳ።

30 «ሺን ኢዲ ኣኪ ቢዳ፤ ኣ ላጌላይ ሄ ኣጩዋ ቃንፃና ጋካናው፤ ቃሾ ጎሌ ጌሊሴዳ። 31 ሄዋ ዲራው፤ ኣ ላጌላ ቆማቱ ሄዋ ቤዒዳ፤ ዳር ዪሎቴዲኖ፤ ባሬንቱ ጎዳኮ ቢዳ፤ ኢ ኦሌዳ ኡባባ እው ኦዳዲኖ።

32 «ሄዋፔ ጉዪያን፤ ጎዳይ ሄ ቆማ ያሲዳ፤ ሳ ኢታ ቆማው፤ ኔኒ ታና ዋሴዳ ዲራው፤ ታኒ ሄ ኣጩዋ ኡባ ኔው ማራ ኣጋዲ። 33 ታኒ ኔው ሄ ኣጩዋ ማራዋዋዳን፤ ኔኒካ ኔ ላጌላ ቆማው

ማራናው ቤሴኔ?› ያጌዳ። 34 ሄዋፔ ሲሚዳ ኣው ዳር ሃንቄቲዳ፥ ባሪ ኣጩዋ ኡባ ኢ ጪጊ ወርሳና ጋካናው፥ ፓፃ ካዔታና ማላ፥ ቃሾ ጎሌ ጌሊሴዳ።

35 «ሂንቲንቱ ሁጲያን ሁጲያን ሂንቲንቱ ኢሻው ዋዛናፔ ኣቶ ጋና ጳዮፔ፥ ሄ ጎዳይ ባሪ ቆማ ኦፊዳዋዳን፥ ሳሉዋን ዳዒያ ታ ኣቡካ ሂንቲንታ ሄዋዳን ኦላና» ያጌዳ።

19

ዩሱሲ ጌሉዋባኔ ኣካባ ታማሪሴዳ

(ማር 10:1-12)

1 ዩሱሲ ሄ ሃሳያ ወርሶዋፔ ጉዩያን፥ ጋሊላፔ ዳንዲዳ፥ ዮርዳኖሳ ሻፋፔ ሄፊንሳን ዳዒያ ዩሁዳ ጋዲያ ቤዳ። 2 ዳር ኣሳይ ኣ ካሊዴ ቤዳዋ ሄዋን ፓሕዳ።

3 ኢቲ ኢቲ ፓሪሳዋቱ ፓጫናው ዩሱሳኮ ዩዳ፥ «ኢቲ ኣሳይ ኣይ ጋሱዋኒ፥ ባሪ ማቻቶ ዩዳናው ኑ ሂጊ ኣዛዚ?» ያጌዴ ኣ ኦፔዲና።

4 ዩሱሲ ዛሪዳ፥ ሃዋዳን ያጌዳ፤ «ፆሳይ ኮይሮ ኡንቲንታ ማዲዳ፥ ኣቲማዋኔ ማጫወና ኦፊዳ። 5 ሄዋ ዲራው፥ ሲቲ ኣሳይ ባሪ ኣባኔ ባሪ ዳዮ ኣጊዳ፥ ባሪ ማቻቲና ኢቲፔ ዳዒ፤ ኡንቲንቱ ላዑ ኢቲ ኣሳ ጊዲና» ያጌያ ቃላ ናባቢቤይኪቲ? 6 ሄዋ ዲራው፥ ኡንቲንቱ ኢቲ ኣሳ ጊዲያዋፔ ኣቲን፥ ላዑ ኣሳ ጊዲኪና፤ ሄዋ ዲራው፥ ፆሳይ ኢቲፔ ዳዒናዳን ጋላዋ ኣሳይ ሻኮፖ» ያጌዳ።

7 ፓሪሳዋቱ ዩሱሳ፥ «ያቲና፥ ሙሴ ኣያው ኢቲ ኡራይ ባሪ ማቻቶ ፒሪማ ፔዲዳ ዩዳና ማላ ኣዛዜዳ?» ያጌዲና።

8 ዩሱሲ ዛሪዳ፥ «ሂንቲንቱ ሂንቲንቱ ማቻቱዋ ዩዳና ማላ፥ ሙሴ ሂንቲንታ ኣዛዜዳዌ፥ ሂንቲንቱ ኦዲና ሲሴና ጉዙማ ጊዶ ዲራፔ ኣቲን፥ ኮይሮ ሄዋ ማላ ጊዳና። 9 ታኒ ሂንቲንቶ ኦዳይ፤ ባሪ ማቻቶ ዋሹሜናን ዳዒሺን ዩዲዳ፥ ሃራሮ ኣኪያ ኣኒኔ ዋሹሜ፤ ሃራይ ዩዳዳወና ኣኪያዌካ ዋሹሜ» ያጌዳ።

10 ዩሱሳ ካሊያዋንቱ ኣ፥ «ኣሲና ጊዲዋኒኔ ማቻቲ ጊዲዋን ዳዒያ ዋጋይ ሄዋ ማላ ጊዶፔ፥ ኣከናኒኔ ጌሌናን ዳዒያዌ ሎዓ» ያጌዲና።

11 ሺን ዩሱሲ ኡንቲንታ ያጌዳ፤ «ሄዋ ማላ ቲሚርቲ ፆሳይ ኢዋዋንቱሳፔ ኣቲን፥ ኣሳ ኡባሳ ጊዳና፤ 12 ኣያው ጎፔ፥ ባሪንቱ ዳዩ ኡሉዋፔ ዩሌቲያ ዋዳካ፥ ሹፋ ጊዳዳዋንቱ ዳዒና፤ ቃሲ

አሳይ ቃራቲና ሙሪሳ ጊዳዳዋንቱ ዳዒኖ፤ ቃሲ ሳሉዋ ካዉቲላ ዲራው፡ ባሪንታ ሹፋ ኡዳዳዋንቱ ዳዒኖ፤ ሃ ቲሚርቲያ አካናው ዳንዳዪያዌ ኦኒኔ አኮ» ያጌዳ።

ዬሱሲ ቄሪ ናና ቦላ ባሬ ኩሺያ ዋሌዳ
(ማር 10:13-16፤ ሉቅ 18:15-17)

13 ዬሱሲ ሄ ዋዴ ባሬ ኩሺያ ጉላ ናና ቦላ ዋሌዳ፡ ያሳ ዋሳና ማላ፡ ኢቲ ኢቲ አሳይ ናና አኮ አሄዳ፤ ሺን ዬሱሳ ካሊያዋንቱ ሄ አሳ አሄና ማላ ሃንቄቲዲኖ። 14 ሺን ዬሱሲ፡ «ቄሪ ናናይ ታኮ ዪያዋ ዲጎፒቲ፤ አያው ጎፔ፡ ሳሉዋ ካዉቲላይ ሄዋንቱ ማላሳ» ያጌዳ።

15 ሄዋፕ ሲሚዴ ባሬ ኩሺያ ኡንቲንቱ ቦላ ዋሌዳዋፕ ጉዪያን፡ ሄዋፕ ባሺ ቤዳ።

ያላጋ፡ ዲሬ ቢታኒያ ኦሻ
(ማር 10:17-31፤ ሉቅ 18:18-30)

16 ኢቲ ቢታኒ ዬሱሳኮ ዪዳ፡ «ታማሪሲያዎ፡ ታኒ ሜዲና ዳዑዋ ዳማናው ሎዖባ አያ አሉ?» ያጌዳ።

17 ዬሱሲ አ፡ «ሎዖባይ አዬንቶ ታና አያው ኦቻይ? ኢቲዋ ያላላይ ሎዓ፤ ሺን ኔኒ ሜዲናው ዳዓናው ኮዮፔ፡ አዛዛቲዋ ናጋ» ያጌዳ።

18 ቢታኒ፡ «ሃቃዋንታ?» ያጌዳ ኦቹዳ።
ዬሱሲ ዛሪዳ፡ «ዎጵፓ፤ ዎሹዋፓ፤ ዉዖፓ፤ ዋርዲዋ ማርካቶፓ፤
19 ኔ አባኔ ኔ ዳዮ ቦንቻ፤ ኔ ሸሩዋካ ኔ ሁጲያዳን ሲቃ» ያጌዳ።

20 ሄ ያላጋ ቢታኒ ዬሱሳ፡ «ታኒ ሄዋ ኡባካ ጉላቲላፕ ደማዴ ናጋዲ፤ ያቲና፡ ታው ፓጪያዌ አዬ?» ያጌዳ።

21 ዬሱሲ ቢታኒያ፡ «ኔኒ ፖሎ አሳ ጊዳናው ኮዮፔ፡ ባዴ ኔው ዳዒያዋ ዛሊዓዳ፡ ሄ ሚሻ ሂዬሳው ኢማ፤ ኔኒ ሳሉዋን ዲሬታና፤ ያታዴ ያዴ ታና ካላ» ያጌዳ።

22 ሺን ሄ ያላጋ ቢታኒ ሄዋ ሲሴዳ ዋዴ፡ ኢ ዳሮ ዲሬ ጊዲያ ዲራው፡ ቃሪቲዳ ባሺ ቤዳ።

23 ዬሱሲ ባሬና ካሊያዋንቱሲ፡ «ታኒ ሂንቲንቶ ቱሙዋ ጋይ፤ ዲሬ አሳይ ሳሉዋ ካዉቲላ ጌላናዌ ዳሮ ሜቶ ጊዳናዋ። 24 ታኒ ጉጃዴካ ሂንቲንቶ ኦዳይ፤ ዲሬ አሳይ ያሳ ካዉቲላ ጌላናፔ፡ ጋሉ ማርፒያ ሉኩዋና አቋናዌ ማታቲ» ያጌዳ።

19:18 ኬስ 20:13-16፤ ዛር 5:17-20 19:19 ኬስ 20:12፤ ዛር 5:16፤ ዋግ 19:18

25 አ ካሊያዎንቱ ሄዋ ሲሲ ማላሌቲዳ፡ «ያቲና፡ ኮኒ አታናው ዳንዳዪ?» ያጌዲኖ።

26 ዬሱሲ ኡንቱንታ ጫዲ ያሊዳ፡ «ሃዌ አሳው ዳንዳዬቲና፤ ሺን ያሳው ኡባባይ ዳንዳዬቲ» ያጌዳ።

27 ጳጳርሲ ሄ ዎዳ ዛሪዳ ዬሱሳ፡ «ቤዓ፡ ኮኒ ኮሲ ዳዒያ ኡባባ ባሺዳ፡ ኮና ካሌዶ፤ ያቲዳ ኮኒ አያ ዳማኔሻ?» ያጌዳ።

28 ዬሱሲ ኡንቱንታ ሃዋዳን ያጌዳ፤ «ታኒ ሂንቱንቶ ቱሙዋ ጋይ፤ ታኒ፡ አሳ ናዒይ፡ ኦራላ ጋዲያን ታ ካዉቱላ ኦይዲያን ኡቲያ ዎዳ፡ ታና ካሌዳ ሂንቱንቱካ ታማኔ ላዑ ኢሰራዔሊያ ዛራቱዋ ቦላ ፐርዳናው፡ ታማኔ ላዑ ካዉቱላ ኦይዲያን ኡታኒታ። 29 ታ ሱንላ ዲራው፡ ጎሊያ ዎይ አሻቱዋ ዎይ ሚቻቱዋ፡ ዎይ አዉዋ ዎይ አቶ ዎይ ማቻቶ፡ ዎይ ናና ዎይ ጋዲያ አጌዳ ኮኒኔ፡ ያቲ ዳኩዋፔ ዳሩዋ አካና፤ ቃሲ ሜጲና ዳዑዋካ ላታና። 30 ሺን ጮራቱ ሃዒ ሲንላቲዳዋንቱ ጉዬታናዋንታ፤ ቃሲ ጮራቱ ሃዒ ጉዬን ዳዒያዎንቱ ሲንላታናዋንታ።

20

ዎዪኒያ ቱራ ጊዶን ኦሊያ አሳንቻቱዋ ለሚሱዋ

1 «ሳሉዋ ካዉቱላይ ዎዪኒያ ጌቲቲያ ቱራ ጊዶዋ ኦሊያዋንታ ኡኒያ ኦሲሳናው፡ ዎንታ ጉራን ኬሴዳ ዎዪኒያ ቱራ ጎዳ ቤሴ።

2 ኢ ሄ አሳንቻቶ ሃቺ ሃቺ ኦሌዳዋ ዎልቃ ጋቲያ ጨጋናው ኡንቱንቱና ገጊዳ፡ ባሪ ዎዪኒያ ቱራ ጊዶዋ ኦሲሳናው ኡንቱንታ ዬዳዳ።

3 «ቃሲ ሄዙ ሳቲያ ጊዶዳ ኬሲዳ፡ ኦሱ ባይናን ቆጫን ኤቁዳ ሃራ አሳቱዋ ቤዒዳ፡ 4 ኡንቱንታ፡ ሂንቱንቱካ ቃሲ ታ ዎዪኒያ ቱራ ጊዶዋ ኦላናው ቢቲ፤ ታኒ ሂንቱንቶ ቤሲያ ጋቲያ ጨጋና ያጌዳ፤ ሄዋፔ ጉዪያን ኡንቱንቱ ቤዲኖ። 5 ሳዒሉዋካ ኡሱቸን ሳቲያኒኔ ኡዱቸ ሳቲያን ኬሲዳ፡ ሄዋዳን ኦሌዳ። 6 ታማኔ አቲ ሳቲያ ሄራን ኢ ኬሲያ ዎዳ፡ ሃራንቱ ሄዋን ኤቁዳዋንታ ዳሚዳ፡ ሉሱዋ ኦሌናን ኩሚንላ ጋላሳ ሃዋን አያው ኤቁ ፔሾዲቲ?» ያጌዳ።

7 «ኡንቱንቱ፡ ሉና ኦሲሲያ አሳይ ቆዬዳ ዲራው ኤቁ ፔሾዶ ያጌዲኖ።

«ኢ፡ ሂንቱንቱካ ቃሲ ታ ዎዪኒያ ቱራ ጊዶዋ ኦላናው ቢቲ» ያጌዳ።

8 «ሳዒይ ኦማርሲያ ዎዳ፡ ዎዪኒያ ቱራ ጎዳይ ኦሊያዋንቱ ካቸዋ፡ ሉሳንቻቱዋ ያሳዳ፡ ዉርሴላን ኦሱዋን ጌሌዳዋንቱፔ

ደማዴ ኮይሮ ጌሌዳዋንታ ጋካናው፡ ኡንቱንቱ ኦሱዋ ዲርጉዋ ጪጋ) ያጌዳ።

9 «ታማኔ ኢቲ ሳቲያ ሄራን ኦሱዋ ደማዳዋንቱ ዪዳ፡ ሁጲያን ሁጲያን ኦሴዳ ፔሼዳ ዋልቃ ጋቲያ ኣኬዲኖ። 10 ኮይሮ ኦሱዋ ደማዳ ኣሳይ ዬዳ ዋዳ፡ ዳሩዋ ኣካናው ቆፔዲኖ፤ ሺን ኡንቱንቱካ ሁጲያን ሁጲያን ባሪንቱ ኦሱዋ ዋልቃ ጋቲያ ኣኬዲኖ። 11-12 ሄዋፔ ጉዩያን፡ «ሃ ጉዩፔ ዬዳዋንቱ ኢቲ ሳቲያ ፃላላ ኦሴዲኖ፤ ኩሜንሳ ጋላሳ ዳቡሪዳ ጫዋቲዳ ኑዋና ኡንቱንቱ ኦሱዋ ዲርጉዋ ቃራ ኦሳዳ) ያጌዳ ባሪንታ ኦሱዋን ጌሊሴዳዋ ቦላ ዙዙሜዲኖ።

13 «ሺን ኢ ኡንቱንቱፔ ኢቱዋ ሃዋዳን ያጌዳ፤ «ታ ላጌው፡ ታኒ ኔና ናቃቤይኪ፤ ኦሳዳ ፔሼዳ ዋልቃ ጋቲያ ታናና ጊጋቤይኪዬ? 14 ኔዋ ኣካዳ ባ፤ ታኒ ሃዲ ዉርሴላን ኦሱዋን ጌሌዳዋካ ኔዋ ኬና ኢማናው ኮያይ። 15 ታኒ ታ ሚሻን ታ ኮዩዳዋዳን ኦሳናው ታው ማታይ ባዌ? ዋይ ታኒ ሎዓ ጊዴዳ ዲራው፡ ኔኒ ቃናታይ?» ያጌዳ።

16 «ሄዋዳንካ፡ ቃሲ ጉዩቴዳዋንቱ ሲንሳታናዋንታ፤ ሲንሳቲዳዋንቱ ቃይ ጉዩታናዋንታ፤ ኣያው ጎፔ፡ ፃሴቴዳዋንቱ ጮራ፤ ሺን ደራቴዳዋንቱ ጉላ» ያጌዳ።

ዩሱሲ ባሪ ሃይቁዋባ ሄዜንሉዋ ኦዳዳ

(ማር 10:32-34፤ ሉቅ 18:31-34)

17 ዩሱሲ ዩሩሳላሜ ቢዳ፡ ኦጊያን ባሪናና ቢያ ታማኔ ላዑ ባሪና ካሊያዋንታ ጋፃ ኬሲዳ፡ ዲማ ኡንቱንቱሲ ያጌዳ።

18 «ቤዒቲ፡ ኦኒ ዩሩሳላሜ ሃዲ ኬሴቶ። ያኒ ታና፡ ኣሳ ናዓ ቄሳቱዋ ካፓቱዋሲኔ ሂጊያ ታማሪሲያዋንቱሲ ኣሴዳ ኢማናዋንታ፤ ኡንቱንቱ ታ ቦላ ሃይቁዋ ፒርዳ ፒርዳናዋንታ። 19 ቃሲ ኣዪሁዳ ጊዴና ኣሳሲካ ታና ኣሴዳ ኢማናዋንታ፤ ሄ ኣዪሁዳ ጊዴና ኣሳይ ታ ቦላ ቂሊጫናዋንታኔ ታና ሊሱዋን ሾጫናዋንታ፤ ያቲዳ ማሰቃሊያ ቦላ ሚሲማሪያን ጲሺዳ፡ ታና ካቃናዋንታ፤ ታኒ ሄዜንሉያ ጋላሲ ሃይቁዋፔ ዳንዳና» ያጌዳ።

ዛቢዲዮሳ ናና ዳዪ ዋሳ

(ማር 10:35-45)

20 ሄ ዋዳ ዛቢዲዮሳ ናና ዳያ ባሪ ናናና ዩሱሳኮ ያዲ፤ ኣ ሲንሳን ጉልባታዳ ኢቲባ ኣ ዋሳዲ።

21 ዩሱሲ ኢዙ፡ «ኣያ ኮያይ?» ያጌዳ ኦቼዳ።

ኢዛ ዛራዴ፡ «ሃ ታ ላዑ ናናይ ኔ ካወቱላን ኢቱ ኔፔ ኡሼቻ ባጋና፡ ቃሲ ኢቱ ኔፔ ሃዲርሳ ባጋና ኡቲኖ ያጋሪኪ» ያጋዴ ዋሳዲ።

22 ሺን ዩሱሲ ዛራዴ ናና፡ «ሂንቴንቱ ኢያ ዋሳናው ቤሲንቶ ኤሪኪታ። ታና ጋኪያ ዋሊቃማ ሜቱዋ ሜቶታኒቱ? ታኒ ፃማቄታና ሂንቃታ ፃማቄታናው ዳንዳዪቱ?» ያጌዳ።

ኡንቱንቱ፡ «ኤ ዳንዳያና» ያጌዲኖ።

23 ዩሱሲ፡ «ታና ጋኪያ ዋሊቃማ ሜቱዋ ቱማካ ሂንቴንቱ ሜቶታኒታ፤ ሺን ታፔ ኡሼቻ ባጋና ኔ ሃዲርሳ ባጋና ኡታናዋንታ ደራናው ታው ማታይ ባዋ፤ ሺን ሄ ሳዓይ ታ ኣኮ ኢማናው ገሊሲ ዋሌዳዋንቱሳ» ያጌዳ።

24 ዮኮ ታው ዩሱሳ ካሊያዋንቱ ሄዋ ሲሴዳ ዋዴ፡ ሄ ላዑ ኢሻቱዋሲ ሃንቄቲዲኖ። 25 ሺን ዩሱሲ ኡንቱንቱ ኡባቱዋካ ባሬኮ ጃሲዴ፡ ሃዋዳን ያጌዳ፤ «ኣሂዛቤ ኣሳቱዋ ካፓቱ ኔ ሃዋንታ ካሌሊያ ኣሳቱ ባሬንቱ ኣሳ ኣዪሲያዋ ኤሪታ። 26 ሂንቴንቱ ገዲዋን ሄዋ ማላ ገዲና፤ ሺን ሂንቴንቱ ገዲዋን ጶቃቱላ ኮዪያ ኦኒኔ ሂንቴንቶ ቆማ ገዲናው ቤሲ። 27 ቃሲ ሂንቴንቱ ገዲዋን ኡባፔ ቦላ ገዲናው ኮዪያዋ ኦኒኔ ሂንቴንቶ ኣይሌ ገዲናው ቤሲ። 28 ሄዋዳን ታኒ፡ ኣሳ ናዓይ፡ ኣሳው ኦላናውኔ ዳር ኣሳ ዋዛናው ታ ሼምቱዋ ኢማናው ዩዳዋፔ ኣቲን፡ ኣሳይ ታው ኦላና ማላ ያቤይኬ» ያጌዳ።

ዩሱሲ ላዑ ቆቃቱዋ ፓሌዳ
(ማር 10:46-52፤ ሉቃ 18:35-43)

29 ዩሱሲ ኣ ካሊያዋንቱ ኢያርኮፔ ኬሲሺን፡ ዳር ኣሳይ ኡንቱንታ ካሌዳ። 30 ላዑ ቆቃ ኣሳቱ ኦጊያ ደናን ኡቲዳዋንቱ ዩሱሲ ሄዋና ኣዲያዋ ሲሲዴ፡ ባሬንቱ ኮሻ ጶቄ ኦሊዴ፡ «ጎዳው፡ ዳዊታ ናዓው፡ ኑሲ ቃሬታሪኪ» ያጌዲኖ።

31 ዳር ኣሳይ ኡንቱንታ፡ «ሃይዚቱ» ገዴ ሃንቄቲዳ፤ ሺን ኡንቱንቱ ባሬንቱ ኮሻ ዳሪ ጶቄ ኦሊዴ፡ «ጎዳው፡ ዳዊታ ናዓው፡ ኑና ማራሪኪ!» ያጌዲኖ።

32 ዩሱሲ ኦጊያን ኤቂዴ፡ ኡንቱንታ ጃሲዴ፡ «ታኒ ሂንቴንቶ ኢያ ኦላና ማላ ኮዪቱ?» ያጌዳ።

33 ቆቃቱ፡ «ጎዳው፡ ኑ ኣይፊያ ፓላሪኪ» ያጌዲኖ።

34 ዩሱሲ ኡንቱንቶ ቃሬቲዴ፡ ኡንቱንቱ ኣይፊያ ቦቹዳ፤ ኤሌካ ኡንቱንቱ ኣይፊ ጃሊ ኣገና፡ ኣ ካሊ ኣጌዲኖ።

21

ዩሱሲ ዋልቃማ ቦንቹዋን ዩሩሳሌሜ ጌሌዳ

(ማር 11:1-11፤ ሉቅ 19:28-40፤ ዮሀ 12:12-19)

1 ኡንቱንቱ ዩሩሳሌሜ ማቲዳ፣ ዳብሬ ዛይቲ ጌቲቲያ ዳሪያ ለንቂያን ዳዒያ ቤቴፋጌ ጌቲቲያ ቁሪ ካታማ ጋኬዲኖ፤ ዩሱሲ ባሬና ካሊያዋንቱ ላዑዋ ሲንፋው ኪቲዳ፣ 2 ኡንቱንታ ሃዋዲን ያጌዳ፤ «ሂንቱንቱ ሲንፋን ዳዒያ ቁሪ ካታማ ቤቲ፤ ሄዋን ኢቲ ሃራታ ቃሹዋን ዳዒያ ኢዚ ማራና ሂንቱንቱ ቢ ሲሞ ሳንካ ዳማኒታ፤ ኡንቱንታ ቢሊዳ፣ ታው አኪ ዪቲ። 3 ኦኒኔ ሂንቱንታ ኦቸ፣ ሳዳይ ሃዋንታ ኮዬ) ያጌቲ፤ ኤሌካ ኢ ኡንቱንታ ዩዲ አጋናዎ።» * 4-5 ቲምቤቲያ ኦዲያ ናቢ፣ «ጂዮኔ ካታማ አሳው፣

ጠባ፣ ኔ ካቲ አሺኬ ጌዲዳ፣

ሃሪያ ቦላ፣ ሃሪ ማራ ቦላ ኡቲዳ፣

ኔኮ ዬ) ያጌቲ»

ያጌዳ ሃሳዬዳዌ ፖሌታና ማላ፣ ሃዌ ሃኔዳ።

6 አ ካሊያዋንቱ ቢዳ፣ ዩሱሲ ባሬንታ አዛዘዋዲን ኦሌዲኖ። 7 ሃራቶኔ ሃሪ ማራ አሂዳ፣ ባሬንቱ ማዩዋ ኡንቱንቱ ዘኪያን ዋሌዲኖ፤ ሃዋፔ ሲሚና ዩሱሲ ቶጌዳ። 8 ሄ ጮራ አሳፔ ዳሪያ ባጋይ ባሬ ማዩዋ ኦጊያን ሂጃዳ፤ ቃሲ ሃራንቱ ሚፋ ሃይፋ ካር ካሪዳ፣ ኦጊያን ዩጌዲኖ። 9 ዩሱሳፔ ሲንፋና ሃሜቲያ ጮራ አሳይኔ ቃሲ አ ጌዱዋ ካሊያ ጮራ አሳይ፣ ባሬንቱ ኮሻ ጶቁ ኦሌዳ፣ «ዳዊታ ናዓይ ጋላቲቶ!

ጎዳ ሱንፋን ዪያዌ አንጃቲዳዋ!

ፆሳይ ጋላቲቶ!»

ያጌዳ።

10 ዩሱሲ ዩሩሳሌሜ ካታማ ጌሌዳ ዋዳ፣ ካታማን ዳዒያ አሳይ ኡባይ፣ «ሃዌ አኔ?» ያጌዳ ሻቢሬቲዲኖ።

11 አሳይ፣ «ሃዌ ጋሊላን ዳዒያ ናዚሬቲ ጌቲቲያ ካታማፔ ዩዳ ናቢያ ዩሱሳ» ያጌዳ።

ዩሱሲ ጌሻ ጎሊያ ጌሌዳ

(ማር 11:15-19፤ ሉቅ 19:45-48፤ ዮሀ 2:13-22)

12 ዩሱሲ ጌሻ ጎሊያ ጌሌዳ፣ ሄዋን ዛሊዒያዋንታኔ ሻሚያዋንታ ኡባ ካሬ ዩዳርሴዳ፤ ቃሲ ሚሻ ለሚያዋንቱ ፃራጳዛኔ

* 21:3 ጎዳይ፣ ሃራቲዋ ጎዳ ጉሳ። 21:4-5 ዛክ 9:9 21:9 ማዘ 118:25፣

ደገሙዋ ዛሊዲያዎንቱ ኦይዲያ ጉጺ ዩጊዴ፡ 13 ኡንቱንታ፡ «ጾሳ ማፃፋን፡ ታ ጎሊ ጾሳ ዎሲያ ጎሊያ ጌቱታና) ያጌቲዴ ፃፊቲ ኡቴዲ፤ ሺን ሂንቱንቱ ኦ ለንቂያዎንቱ ቆሴቲያ ጎንጎሉዋ ኬሴዲታ» ያጌዴ።

14 ቆቃቱኔ ጌዲ ሲሌዳዎንቱ ዩሱሳኮ ጌሻ ጎሊያ ዩና፡ ኢ ኡንቱንታ ፓሌዳ። 15 ሺን ቄሳቱዋ ካፓቱኔ ሂጊያ ታማሪሲያዎንቱ ዩሱሲ ኦሊያ ኦሪሳባ ቤዔዳ ዎዴኔ፡ ጉላ ናናይ ጌሻ ጎሊያን ባሪንቱ ኮሻ ቶቄ ኦሊዴ፡ «ዳዊታ ናዓይ ጋላቴቶ» ያጊያዎ ቤዔዳ ዎዴ ሃንቄቴዲኖ።

16 ያቲዴ ዩሱሳ፡ «ሃዎንቱ ጊያዋ ሲሳይ?» ያጌዲኖ። ዩሱሲ፡ «ኤ ሲሳይ፤ ጾሳ ማፃፋይ፡ ርጉላ ናናይኔ ቆሚያ ናናይ ኔና ጋላታና ማላ፡ ኡንቱንታ ኤሪሳዳ) ያጊያዎ ኡባካ ናባቢቤይኩቱ?» ያጌዴ። 17 ዩሱሲ ኡንቱንታ ኦጊዴ፡ ሄ ካታማፔ ቢታኒያ ጌቱቲያ ካታማ ቢዴ፡ ያኒ ኦቄዳ።

ኦይፊ ቆዩዳ ባላሲያ ሚላቶ
(ማር 11:12-14፣ 20-24)

18 ዩሱሲ ዎንታ ጉራና ካታማ ቤዳ ዲራው ኮሻቲዳ። 19 ኦጊያ ደናን ኢቲ ባላሲያ ጌቱቲያ ሚላቶ ቤዒዴ፡ ኢኮ ቤዳ፤ ቢ ጋኪያ ዎዴ ሄ ሚላቲን ሃይላ ፃላላፔ ኦቲን፡ ኦይፊያ ኦይኔ ዴሚቤና፤ ኢዞ፡ «ላዔሉዋ ሜዲናዉካ ኦይፎፓ» ያጊና፡ ሄ ባላሳታ ማንዒያን ሚላ ኦጋዲ።

20 ኦ ካሊያዎንቱ ሄዋ ቤዒዴ ማላሌቲዴ፡ «ሃ ባላሳታ ዋናዴ ኢቲ ኩላን ሚላ ኦጋዴ?» ያጌዲኖ።

21 ዩሱሲ ዛሪዴ፡ «ታኒ ሂንቱንቶ ቱሙዋ ጋይ፤ ሂንቱንቱ ኦማኑ ዴዒያዎንታኔ ሲዴናዎንታ ጊደፔ፡ ሃ ባላሳቶ ታኒ ኦሌዳዎ ማላ ፃላላ ኦሊኪታ፤ ሺን ሃራይ ኦቶ ሂንቱንቱ ሃ ዴሪያ፡ ሎንዳዴ ኦባን ኩንዳ) ጊንቶካ ሃናና፤ 22 ሂንቱንቱ ኦማኒዴ ጾሳ ዎሲያዎ ኦያ ጊዲንቶካ ኦካና» ያጌዴ።

ዩሱሳ ማታይ ዩዳሳ
(ማር 11:27-33፤ ሉቅ 20:1-8)

23 ዩሱሲ ጌሻ ጎሊያ ዩዴ ታማሪሲሺን፡ ቄሳቱዋ ካፓቱኔ ኦዩሁዳ ጨማቱ ኦኮ ዩዴ፡ «ኔኒ ሃዋ ኦላናው ኔው ኦይ ማታይ ዴዒ? ኔው ሃ ማታ ኦኔ ኢሜዳዌ?» ያጌዲኖ።

24 ዩሱሲ ዛሪዴ ኡንቱንታ፡ «ታኒካ ሂንቱንታ ኢቲባ ኦቻና፤ ሂንቱንቱ ታው ሄዋ ኦደፔ፡ ታኒ ሃዋ ኦይ ማታኒ ኦላይታንቶ፡

ሂንቴንቶ ኦዳና፤ 25 ዮሃንሲ ፃማቂያ ማታይ ሃቃፔ ዬዴ? ያሳፔ ዬዴዬ አሳፔ ዬዴ?» ያጌዲ።

ኢንቴንቴ ባሬንቴ ገዲዋን ፓሉማ ደሚዴ፡ «ኑኒ፡ (ያሳፔ ዬዴ) ያሳፔ ኢ ኑና፡ (ያቶፔ፡ ዮሃንሲ ኦዴዳዋ ኣያው ኣማኒቤይኪቴ?) ያጋናዋ። 26 ሺን ኑኒ፡ (አሳፔ ዬዴ) ያሳፔ፡ አሳይ ኡባይ ዮሃንሲ ናቢያ ገዴዳዋ ኤሪያ ዲራው፡ አሳው ያዬቶ» ያጌዲኖ።

27 ኢንቴንቴ ዬሱሳው፡ «ኑኒ ኤርኮ» ያገዴ ዛሬዲኖ።
ዬሱሲ፡ «ታኒካ ሃዋ ኣይ ማታኒ ኦላይታንቶ፡ ሂንቴንቶ ኦዲኬ» ያጌዲ።

ላዑ ናና ለሚሱዋ

28 «ሺን ሂንቴንቴ ኣያ ቆፒቴ? ላዑ ናናይ ዳዒያ ኢቲ ቢታኒ ዴዴ፤ ሄ ቢታኒ ባይራ ናባኮ ቢዴ፡ ሓ ናባው፡ ሃቼ ባዴ ታ ዋዪኒያ ቱራ ኦላ) ያጌዲ። 29 ናባይ ዛሬዴ፡ (ቢኬ) ጌዲ፤ ሺን ጉዬፔ ባሬ ዋዛናን ቆፒ ኣኪዴ፡ ዋዪኒያ ቱራ ኦላናው ቤዲ። 30 ኣዉ ዮኮ ናባኮ ቢዴ፡ ባይራው ጌዳዋዳንካ ኣው ጌዲ፤ ቴፋ ናባይ ዛሬዴ፡ (ሎባ ታ ጎዳው) ያጌዲ፤ ሺን ቢቤና። 31 ሃ ላዑ ናናፔ ባሬ ኣዉ ኮዬዳዋ ኦሌዳዌ ሃቃዌ?» ያጌዲ።

ኢንቴንቴ፡ «ባይራ» ያጌዲኖ።

ዬሱሲ ኢንቴንታ ሃዋዳን ያጌዲ፤ «ታኒ ሂንቴንቶ ቱሙዋ ጋይ፤ ቃራፃ ኣኪያዋንቴኔ ዋሹሚያዋንቴ ሂንቴፔ ሲንሳቲዴ፡ ያሳ ካውቴላ ጌላና። 32 ኣዪሲ ጎፔ፡ ፃማቂያ ዮሃንሲ ፃሎቴላ ኦጊያ ታማሪሲዴ፡ ሂንቴኮ ዪና፡ ኢ ጊያዋ ኣማኒቤይኪታ። ሺን ቃራፃ ኣኪያዋንቴኔ ዋሹሚያዋንቴ ኢ ጊያዋ ኣማኔዲኖ፤ ሂንቴንቴ ሃራይ ኣቶ ሃዋ ቤዒዲካ፡ ሂንቴንቴ ናጋራፔ ሲሚዴ፡ ኢ ጊዪያዋ ኣማኒቤይኪታ» ያጌዲ።

ዋዪኒያ ቱራ ገደን ኦሊያ ጎሻንቻቱዋ ለሚሱዋ

(ማር 12:1-12፤ ሉቅ 20:9-19)

33 ቃሲካ ዬሱሲ ሃዋዳን ያጌዲ፤ «ሃራ ለሚሱዋካ ሲሲቴ፤ ዋዪኒያ ጌቴቴያ ቱራ ቶኬዳ ኢቲ ቢታኒ ዴዴ፤ ዋዪኒያ ቱራ ዩሺ ኣሊዴ ዲሬዳ፤ ቃሲ ሄ ዋዪኒያ ጉሚዒያ ኦላካ ቦኬዳ፤ ሄዋ ናጊያ ኣሳው ኣዲሳ ሹቻ ገምቤዳ። ሃዋፔ ጉዪያን፡ ኮላ ኦሊያ ኣሳው ኢሚዴ፡ ሃራ ጋዴ ቤዲ። 34 ዋዪኒያ ኣይፊያ ማዲያ ዋዲ ጋኪና፡ ባሬና ጋኪያዋ ኣኪዴ ያና ማላ፡ ባሬ ቆማቱዋ ባሬ ኮላዋቱዋኮ ኪቴዲ። 35 ኮላዋቱ ኣ ቆማቱዋ ኦይቂዴ፡ ኢቱዋ ዋዲዲኖ፤ ቃሲ ዮኩዋ ሹቻን ጳልቂዲኖ። 36 ቃሲካ ሄ ቢታኒ

ካሴዎንቱ፤ ዳሪያ ሃራ ቆማቱዎ ከቴዳ፤ ኮላዎቱ ሄ ቆማቱዎካ ካሴዎንቱዎዳን ኦሌዲኖ።

37 «ሺን ወርሱላን ኢ፡ ሳ ናዓ ኡንቱንቱ ቦንቻናዎንታ» ያጊዴ ባሬ ናዓ ኡንቱንቱኮ ከቴዳ።

38 «ሺን ኮላዎቱ ናዓ ቤዒዴ፡ ባሬንቱ ጊዲዎን፡ ርገዲያ ላታናዌ ሃዎ፤ ቢዴ ኣ ዎዲዴ፡ ጋዲያ ኮኒ ላታና» ያጊዲኖ። 39 ናዓ ኦይቂዴ፡ ዎዲያ ቱራ ጊደፔ ጋፃ ኬሲዴ ዎዲዲኖ።

40 «ሲሚ ዎዲያ ቱራ ጎዳይ ዪያ ዎዴ፡ ሄ ኮላዎቱዎ ዎታኔ?» ያጊዴ ኦቸዳ።

41 ኡንቱንቱ፡ «ኢ ሄ ኢታ ኣሳቱዎ ዎዲ ወርሱዴ፡ ዎዲያ ቱራይ ኣይፊያ ዎዴ ባሬና ጋኪያዎ ዎዲያን ሸዲያ ሃራ ኮላዎቱዎሲ ኢማና» ያጊዲኖ።

42 ዬሱሲ ኡንቱንታ ሃዎዳን ያጊዴ፤ « ርገምቢያዎንቱ ካዲዴ ኢዴዳ ሹቻይ ጎዳ ፃጵዎ ሚኒሲያ፡ ኡባፔ ኣዲያ ሹቻ ጊዴዳ።

ሃዌ ጎዳይ ኦሌዳዎ፤ ቃሲ ኦ ያላወካ ማላሊሲያዎ»

ያጊያዎ ያሳ ማፃፋፔ ኡባካ ናባቢቤይኪቲ?

43 «ሃዎ ዲራው፡ ታኒ ሂንቱንቶ ኦዳይ፤ ያሳ ካወቱላይ ሂንቲፔ ኣከቲዴ፡ ሎዎ ኣይፊያ ኢሚያ ኣሳው ኢሚታናዎ። 44 ሄ ሹቻ ቦላ ኩንዲያ ኡባይ ሜዔሬታና፤ ቃሲ ሄ ሹቻይ ኣሳ ቦላ ኩንደፔ፡ ሄ ኩንዴዳ ኡራ ሊቂሳና» ያጊዴ።

45 ቄሳቱዎ ካፓቲኔ ፓሪሳዎቱ ዬሱሲ ኦዳዳ ለሚሱዎ ሲሴዳ ዎዴ፡ ባሬንቱዎ ሃሳዪያዎ ኤሬዲኖ። 46 ኡንቱንቱ ዬሱሳ ኦይቃናው ኮዬዲኖ፤ ሺን ዬሱሳ ዳር ኣሳይ ናቢያ ጊዴ ቆፒ ኡቴዳ ዲራው፡ ሄ ኣሳው ያዬዲኖ።

22

ኣካኔ ጌሉዎ ኦዲዎ ለሚሱዎ (ሉቅ 14:15-24)

1 ዬሱሲ ኣሳው ላዕሉዎ ለሚሱዎን ሃዎዳን ያጊዴ ሃሳዬዳ፤

2 «ሳሉዎ ካወቱላይ ባሬ ናዓው ማቸያ ኢማናው ኡባባ ማኬዳ ካቲያ ማላ። 3 ሄ ካቲ ቡላቻው ኦዲ ዎሌዳ ኣሳቱዎ ያሳናው ባሬ ቆማቱዎ ከቴዳ፤ ሺን ኣሳቱ ያናው ኮዬቤይኪኖ።

4 «ቃሲ ሃራ ቆማቱዎ፡ ሳይሴቲዳዎንታ፡ «ታኒ ቁማ ጊጊሳዲ፤ ታ ሳንጋቲኔ ታ ሞዶ ሚያቲ ሹኩቴዲኖ፤ ኡባባይካ ማኬቴዳ።

21:42 ማዘ 118:22-23

ቡላቻ ሃ ዪቴ» ያገቱ) ያገዱ ከቴዳ። 5 ሺን ያሰቴዳዋንቴ ኮዬናን ኢዲዳ፣ ባሬንቴ ኦሶ ቤዲኖ፤ ኢቱ ባሬ ጎሻው ቢና፣ ዮኩ ባሬ ዛለዔው ቤዳ። 6 ኣቴዳዋንቴ ቃሲ ካቲያ ቆማቱዋ ኦይቂ ዋዲዳ ዋዲዳ።

7 «ካቲ ዳሮ ሃንቁቴዳ፤ ቃሲ ባሬ ዋታዳራቱዋ ዬዲዳ፣ ሄ ሹዎፑዋ ዋዲዳዋንታ ዋዲሲዳ፣ ኡንቱንቴ ካታማ ጉዲሴዳ።

8 ሄዋፔ ጉዪያን፣ ባሬ ቆማቱዋ፣ «ቡላቻይ ማኬቴዳ፤ ሺን ያሰቴዳዋንቴ ቡላቻው ቤሲያ ኣሳ ገዲኪኖ። 9 ሄዋ ዲራው፣ ዋጋ ቃዳ ቢዳ፣ ሂንቱንቴ ዳሜዳ ኣሳ ኡባ ቡላቻው ያሰቴ) ያገዱ። 10 ሄ ቆማቱ ቃዳ ቢዳ፣ ባሬንቴ ዳሜዳ ኣሳ ኡባ ሎዑዋ ኢታ ሺሺዳ፣ ቡላቻ ዳሲያ ኩንፎዲኖ።

11 «ሺን ካቲ ቁማ ማናው ኡቴዳ ኣሳ ቤዳናው ጌሌዳ ዋዳ፣ ቡላቻ ማዩዋ ማዩቤና ኢቲ ቢታኒያ ሄዋን ቤዲዳ፣ 12 ታ ላጌው፣ ቡላቻ ማዩዋ ማዩናን ዋናዳ ሃዋ ጌላዲ?» ያገና ቢታኒ ጮው ጌዳ።

13 «ሄዋፔ ጉዪያን፣ ካቲ ባሬ ቆማቱዋ፣ «ሃ ቢታኒያ ኩሺያኔ ጌዲያ ቃቸዳ፣ ካሬ ቆማ ኬሲ ኦሊቴ፤ ኢ ሄዋን ዬካናኔ ኣቻ ቃቸና) ያገዱ።

14 «ኣዪሲ ጎፔ፣ ያሰቴዳዋንቴ ዳራ፤ ሺን ዶሬቴዳዋንቴ ጉላ» ያገዱ።

ገራ ዋቲ ገራኔንቶ ኦቺዳ ኣሻ
(ማር 12:13-17፤ ሉቅ 20:20-26)

15 ሄዋፔ ጉዪያን፣ ፓሪሳዋቱ ቢዳ፣ ኣ ሃሳያፔ ባላ ዳሚዳ፣ ኣ ኣይቃና ማላ ማቁቴዲኖ። 16 ቃሲ ባሬንታ ካለያዋንቴፔኔ ሄሮዲሳ ባጋቱዋፔ ኣማሬዳዋንታ ኣኮ ከቴዲኖ። ኡንቱንቴ፣ «ታማሪሲያዎ፣ ኔኒ ቱሙዋ ሃሳዪያዋኔ ፆሳ ኦጊያ ቱማቱላን ታማሪሲያዋ ኮኒ ኤሬቶ፤ ኣያው ጎፔ፣ ኔኒ ኣሳፔ ኣሳ ሻካካኔ ዲማያካ። 17 ኔ ቆፋይ ኣዬንቶ ኮሲ ኦዳ፤ ኮኒ ሮሜ ጋዲያ ካቲያ ቁሳሬው ገራ ገሪያዌ ዋጌዬ ዋጋ ገዳኔ?» ያገዲኖ።

18 ሺን ዬሱሲ ኡንቱንቴ ኢታ ቆፋ ኤሬዳ፣ «ሃ ሎዳ ማላቲያ ኢታ ኣሳቶ፣ ኣያው ታና ፓጩቱ? 19 ገራ ገሪያ ሚሻ ታና ቤሲቱ» ያገዱ። ሄዋፔ ጉዪ ኡንቱንቴ ቢራ ሳንቲሚያ ኣው ኣሄዲኖ። 20 ኢ፣ «ሃ ማላይኔ ሱንሳይ ኦዌ?» ያገዱ።

21 ሄዋፔ ሲሚዳ ኡንቱንታ ኦቺና፣ ኡንቱንቴ፣ «ሮሜ ጋዲያ ካቲያ ቁሳሬዋ» ያገዲኖ።

ሄዎ፤ ጉዩያን፤ ዩሱሲ ኡንቱንታ፤ «ያቶ፤ ቁሳሬዎ ቁሳሬሲ፤ ያሳዎ ያሳሲ ኢሚቲ» ያጌዳ። 22 ኡንቱንቲ ሄዎ ሲሴዳ ዎዳ፤ ማላሌቲዳ ኣ ኣጊዳ ቤዲኖ።

ሃይቄዳዎንቲ ዴንዲዎባ
(ማር 12:18-27፤ ሉቅ 20:27-40)

23 ሃይቄዳ ኣሳይ ዴንዴና ጊያ ሳዲቃዎናቱዎ፤ ኢቲ ኢቲ ኣሳቲ ሄ ጋላሲ ዩሱሳሱ ዩዳ፤ ሃዎዳን ያጊዳ፤ ኣ ኦቹዲኖ፤ 24 «ታማሪሲያዎ፤ ሙሴ፤ ሳኢቲ ኣሳይ ናዓ ዩሌናን ሃይቆ፤ ሄ ሃይቄዳዎ ኢሻይ ኣ ማቻቶ ላቲዳ፤ ባሬ ኢሻው ናዓ ዩላናው ቤሴ) ያጌዳ። 25 ኦናና ላቲ ኢሻቲ ዴዲኖ፤ ባይራይ ማቻቶ ኣኪዳ፤ ናዓ ዩሌናን ሃይቄዳ፤ ሄዎ፤ ጉዩያን ኣ ማቻቶ ኣ ኢሻይ ኣኪዳ። 26 ቃሲ ላዔሊያዊካ ሃይቄዳ፤ ሄዘሊያዊካ፤ ላቲንሳ ጋካናወካ ሃዎዳን ሃኔዲኖ። 27 ኡባ፤ ጉዩያን፤ ሄ ሚሺራታ ሃይቃዲ። 28 ያቲና፤ ሃይቄዳ ኣሳይ ሃይቄዎ፤ ዴንዲያ ጋላሲ ሄ ሚሺራታ ላቲናቱዎ፤ ሃቃዎ ማቹ ጊዳኔ? ኣዩሲ ጎ፤ ላቲናቲ ኡባይካ ኢዘ ኣኪዲኖ» ያጌዲኖ።

29 ዩሱሲ ዛሬዳ፤ ሃዎዳን ያጌዳ፤ «ያሳ ማፃፋቱዎ ዎይ ኣ ዎልቃ ሂንቲንቲ ኤሬና ዲራው ባሊታ። 30 ኣዩሲ ጎ፤ ሃይቄዳ ኣሳይ ሃይቄዎ፤ ዴንዲያ ጋላሲ፤ ሳሉዎን ዴዲያ ኪታንቻቱዎ ማላ ጊዳና፤ ኣቲን፤ ኣቲማ ኣሳይኔ ኣኪና፤ ማጫ ኣሳይኔ ጌሌና። 31-32 ሺን ሃይቄዳዎንቲ ዴንዲዎባ ጊዳ፤ ያሳይ፤ (ታኒ ኣብራሃሚ ያሳ፤ ዩሳቃ ያሳ፤ ያዩቆባ ያሳ) ያጊዳ ሂንቲው ኦዴዳዎ ኡባካ ናባቢቤይከቲ? ያሳይ ፓፃ ዴዲያዎንቲ ያሳ ጊዲያዎ፤ ኣቲን፤ ሃይቄዳዎንቲ ያሳ ጊዳና» ያጌዳ።

33 ዳር ኣሳይ ሃዎ ሲሴዳ፤ ኣ ቲሚርቲያን ማላሌቲዲኖ።

ኡባ፤ ኣዲያ ኣዛዙዎ
(ማር 12:28-34፤ ሉቅ 10:25-28)

34 ሺን ዩሱሲ ሳዲቃዎናቱዎ ጮው ኣሉዳዎ ፓሪሳዎቲ ሲሴዳ ዎዳ፤ ኢቲሳ ሸቄዲኖ። 35 ኡንቲንቲ ጊዳ፤ ሂጊያ ታማሪሲያ ኢቲ፤ ዩሱሳ ፓጫናው ኢቲባ ኦቹዳ። 36 «ታማሪሲያዎ፤ ሂጊያ ጊዲዎን ኡባ፤ ኣዲያ ኣዛዙ ሃቃዎ?» ያጊዳ ኣ ኦቹዳ።

37 ዩሱሲ ዛሬዳ፤ ሃዎዳን ያጌዳ፤ « ሳኒ ጎዳ ኔ ያሳ ኔ ኩሚንሳ ዎዛና፤ ኔ ኩሚንሳ ሸምቶዎ፤ ኔ ኩሚንሳ ቆፋ፤ ሲቃ) ያጌዳ። 38 ሃዎ ኡባ፤ ዳሪያ ኣዛዙዎኔ ቃሲ ኡባ፤ ኣዲያ

አዛዙዎ። 39 ቃሲ ላዔሊያ አዛዙካ እ ማላ፤ ሃዌ፣ ሩኒ ኔ ሾሩዎ ኔ ሁጲያዳን ሲቃ ጊያዎ። 40 ሙሴ ሂጊያ ኡባይኔ ናባቱዎ ቲሚርቲ ሃ ላዑ አዛዛቱዎን ቃሾቴ» ያጌዳ።

ኪሪሰቶሳባ ኦቼዳ ኦሻ
(ማር 12:35-37፤ ሉቅ 20:41-44)

41-42 ፓሪሳዎቹ ኢቲሳ ሸቄዳሳን ዩሱሲ ኡንቱንታ። «ኪሪሰቶሳባ ዋጊዴ ቆፒቱ? ኢ ኦ ናዔ?» ያጌዴ ኦቼዳ።

ኡንቱንቱ። «ኪሪሰቶሲ ዳዊታ ናዓ» ያጌዲኖ።

43 ዩሱሲ ኡንቱንታ። «ያቲና፣ ዳዊቱ ባሬና ጌሻ አያናይ ሃሳዩሲና ኪሪሰቶሳባ ዋጊዴ፣ ሳዳ) ጊዴ ያሲ? ቃሲካ ዳዊቱ።

44 ሳዳይ ታ ጎዳ።

«ታኒ ኔ ዋርኬቱዎ ኔኒ ዩቆ ኤቂያዎ ኦላና ጋካናው።

ሃዎን ታፔ ኡሼቻ ባጋና ኡታዴ ታናና ኢቲፔ ዳናታ» ጌዳ) ያጌዳ። 45 ዳዊቱ ኪሪሰቶሳ፣ ሳዳ) ጊዴ ያሶፔ፣ ያቲና፣ ኪሪሰቶሲ ዋጊዴ ዳዊታ ናዓ ጊዲ?» ያጌዳ።

46 ዩሱሳው ኢቲ ቃላ ዛራናው ዳንዳዩዳ ኢቲ አሳይኔ ባዎ፤ ቃሲ ሄ ጋላሳፔ ደሚና፣ ሃራ ኦሻ ኦ ኦቻናው ፃሌዳዌ ኦኒኔ ባዎ።

23

ሙሴ ሂጊያ ታማሪሲያዎንቱኔ ፓሪሳዎቹዎ ኢታቱላ

(ማር 12:38-39፤ ሉቅ 11:43-46፤ 20:45-46)

1 ሃዎፔ ጉዩያን፣ ዩሱሲ ሸቄዳ አሳውኔ ባሬና ካሊያዎንቶ ሃዎዳን ያጌዴ ሃሳዩዳ፤ 2 «ሂጊያ ታማሪሲያዎንቱኔ ፓሪሳዎቹ ሙሴ ሂጊያ ታማሪሲያ ማታና ዴዒኖ። 3 ሃዎ ዲራው፣ ሂንቱንቱ ኦላና ማላ፣ ኡንቱንቱ ሂንቱንታ አዛዚያ ኡባባ ኦሊቱኔ ቃሲ ናጊቱ፤ ሺን ኡንቱንቱ ኦሊያዎዳን ኦላፒቱ፤ አያው ጎፔ፣ ኡንቱንቱ ባሬንቱ ኦዲያዎ ኦሊኪኖ። 4 ቶካናው ዴዒያ ቶኩዎ ኡንቱንቱ ቃቺዴ፣ አሳ ቶሲኖ፤ ሺን ባሬንቱ ሁጲያን ሃራይ አቶ፣ ሄ ቶኩዎ ቢራዲያን ቦቻናውካ ኮዩኪኖ።

5 «ሺን ኡንቱንቱ ባሬንቱ ኦሉዎ ኡባ አሳይ ቤዓናዳን ኦሊኖ፤ አያው ጎፔ፣ ባሬንቱ ሶምዒያኒኔ ባሬንቱ ኩሺያ ቄሲያን ቃቺያ ዒቂሲያና ዴዒያ ኪታፋ አሲኖኔ ባሬንቱ ማዩዎ ማጫራካ አዲሲኖ።

6 አሳይ ባሬንታ ሾቢዴ አፎሳን ቦንቾ ኡቱዎ ደሲኖ፤ ቃሲ አዩሁዳ ዎሳ ጎሌቱዋኒካ ዳር ሎዒያ ኦይዲያ ደሲኖ። 7 አሳይ

22:39 ዎግ 19:18 22:44 ማዘ 110:1 23:5 ማጐ 6:1፤ ፓይ 15:37-41፤ ዘር 6:8

ጌዋን ባሬንታ ቦንቺዳ ሳርታና ማላኔ (ታማሪሲያዎ) ጌዳ ባሬንታ ፃሳናዳን ኮዪና።

8 «ሺን ሂንቴንታ ታማሪሲያዎ ኢቱዋ ዓላላ ጌዳዳ ዲራወኔ ሂንቴንቱ ኡባይ ኢሻቱዋ ጌዳዳ ዲራው፣ ኢቱ ኢቱዋ፣ (ታማሪሲያዎ) ጌዳ ፃሶፒቱ። 9 ሃ ሳዓን ኦናኔ (አዉዋ) ጌዳ ፃሶፒቱ፤ አያው ጎፔ፣ ሂንቴንቶ ሳሉዋን ዴዒያ ኢቱ አዉ ዴዒ። 10 ኢቱ ኢቱዋ፣ (ታማሪሲያዎ) ጌዳካ ፃሶፒቱ፤ አያው ጎፔ፣ ሂንቴንቶ ኢቱ ጎዳይ፣ ኪሪሰቶሳ ዓላላይ ዴዒ። 11 ሂንቴንቱ ጌደን ኡባፔ ዳሪያዎ ሂንቴንቶ ቆማ ጌዳናው ቤሴ። 12 ባሬና ዳሪሲያዎ ኦኒኔ ቶሼታና፣ ቃሲ ባሬና ቶቺያዎ ኦኒኔ ቶቁ ጋና።

ሂጊያ ታማሪሲያዋንቱኔ ፓሪሳዋቱ ቦሬቴዲና
(ማር 12:40፤ ሉቅ 11:39-42፤ 44፤ 52፤ 20:47)

13 «ሎዓ ማላቲያ ኢታቶ፣ ሂጊያ ታማሪሲያዋንቱኔ ፓሪሳዋቶ፣ አሳው ሳሉዋ ካዉቴላ ሂንቴንቱ ጎርዲያ ዲራው፣ ሂንቴንቶ አዬሮ፤ አያው ጎፔ፣ ሂንቴንቱ ሁጳወኔ ጌሊኪታ፤ ቃሲ ጌላናው ኮዪያዋንታካ ጌሊሲኪታ።

14 «ሎዓ ማላቲያ ኢታቶ፣ ሂጊያ ታማሪሲያዋንቱኔ ፓሪሳዋቶ አምዔቱዋ ጎሊያ ሂንቴንቱ ቦንቁዳ፣ ሂንቴንቶ ሎዓ ማላታናው ያሳ ዋሳ አዲሲታ፤ ሄዋ ዲራው፣ ሂንቴንቶ አዬሮ፤ ኡባፔ አቋያ ፒርዳ ሂንቴንቱ አካና።

15 «ሎዓ ማላቲያ ኢታቶ፣ ሂጊያ ታማሪሲያዋንቱኔ ፓሪሳዋቶ ሂንቴንቱ ኢቱ ኡራ አማንላናው አባኒኔ ሳዓን ዩዩያ ዲራወኔ ቃሲ ሂንቴንቱ አ አማንሊያ ዋዳ፣ ሄ ኡራ ሂንቴንቱዋፔ ላዑ ኩሺያ ኢቱዳ ጋናማው ናዓ ኦሊያ ዲራው፣ ሂንቴንቶ አዬሮ።

16 « ሐኒኔ ጌሻ ጎሊያን ጫቆፔ፣ አይኔ ባዋ፤ ሺን ጌሻ ጎሊያን ዴዒያ ዋርቃን ጫቆፔ፣ ሄ ጫቁ አ ጋኬ) ጌያ ሂንቴንቶ ቆቂ ኡቲዳ አሳ ካሌሊያዋንቶ፣ ሂንቴንቶ አዬሮ። 17 ሃ ኤያቱ፣ ሃ ቆቃቱ፣ ዋርቃይ አቋዬ? ዋርቃ ጌሻ ኦሊያ ጌሻ ጎሊ አቋ? 18 ቃሲ ሂንቴንቱ፣ ሐኒኔ ያርሹዋ ያርሹያባን ጫቆፔ፣ አይኔካ ባዋ፤ ሺን ኦኒኔ አ ቦላ ዴዒያ ያርሹዋን ጫቆፔ፣ ሄ ጫቁ አ ጋኬ) ያጌዳ ታማሪሲታ። 19 ሃ ኤያቱ፣ ሃ ቆቃቱ፣ ያርሹ አቋዬ? ዋይ ያርሹዋ ጌሻ ኦሊያ አ ያርሹያባይ አቋ? 20 ሄዋ ዲራው፣ ያርሹዋ ያርሹያባን ጫቁያ ኡራይ ሄ ያርሹያዋኒካ ጫቁ፤ ቃሲ አ ቦላ ዴዒያ ኡባባንካ ጫቁ። 21 ጌሻ ጎሊያን ጫቁያ ኡራይ፣ ሄ ጌሻ ጎሊያኒኔ አ ጌደን ዴዒያ ያሳን ጫቁ። 22 ሳሉዋን ጫቁያ ኡራይ፣ ያሳ ካዉቴላ ኦይዲያኒኔ ሄ ኦይዲያን ኡቲያዋን ጫቁ።

23 «ሎዓ ማላቲያ ኢታቶ፡ ሂጊያ ታማሪሲያዋንቶኔ ፓሪሳዋቶ፡ ሂንቴንቶ አዬር። አዩሲ ጎፔ፡ ካሪሳ አኑጋፔ፡ ሺላሪያፔኔ ኦካሺያፔ አሲራታ ሂንቴንቶ አሚታ፤ ሺን ሂጊያን ዳዒያ ዳሪ ኮሺያዋንታ ኣጊታ፤ ሄዋንቱ ፒርዳ፡ ማሮቴላኔ ዒሎቴላ። ሃራንታካ ኣጌናን፡ ሂንቴንቱ ኦላናው ቤሲያ ዬዋቱ ሃዋንታ። 24 ሂንቴንቶ ቆቂ ኡቲዳ፡ ኣሳ ካሌሲያዋንቶ፡ ሂንቴንቱ ኡሻፔ ኡዲንዒያ ጋጨዳ፡ ጋሉዋ ማቲታ።

25 «ሎዓ ማላቲያ ኢታቶ፡ ሂጊያ ታማሪሲያዋንቶኔ ፓሪሳዋቶ፡ ሂንቴንቶ አዬር። አዩሲ ጎፔ፡ ሂንቴንቱ ሻታኔ ከሪያ ቦላ ባጋ ጌሺታ፤ ሺን ኣ ጊዲዋን ቦንቂያኒኔ ኡዜቴላን ኩንሌዲታ። 26 ሃ ቆቆ ፓሪሳዋው፡ ሻታኔ ከሪያ ጋርሳ ካሴታዳ ጌሻ ዲጋ፤ ሄዋፔ ጉዪያን፡ ቦላ ባጋይካ ጌሻ ጊዳናዋ።

27 «ሎዓ ማላቲያ ኢታቶ፡ ሂጊያ ታማሪሲያዋንቶኔ ፓሪሳዋቶ፡ ሂንቴንቶ አዬር። አዩሲ ጎፔ፡ ካሪ ባጋና ቦሺንቻን ኦኩቲዳ፡ ሎዒ ኡቲዳ፡ ቃሲ ጋርሳ ባጋና ሃይቄዳ ኣሳ ሜቄላይኔ ዋቄዳባይ ኡባባይ ኩሚዳ ዲፎቱዋ ማላቲታ። 28 ሄዋዳንካ፡ ቃሲ ቦላ ባጋና ኣሳ ኡባው ዒሉዋ ማላቲታ፤ ሺን ሂንቴንቶ ጋርሳ ባጋና ሎዓ ማላቲያ ኢታቲላይኔ ማካላይ ኩሚ ኡቲዳ።

29 «ሎዓ ማላቲያ ኢታቶ፡ ሂጊያ ታማሪሲያዋንቶኔ ፓሪሳዋቶ፡ ሂንቴንቶ አዬር። አዩሲ ጎፔ፡ ናባቱዋ ዲፋዋ ቦላ ጎሊያ ከዒታ፤ ቃሲ ዒላቱዋ ዲፋዋካ ሎይሊታ። 30 ቃሲ ሂንቴንቱ፡ ሱኒ ቤኒ ኑ ኣዋቱዋ ዋዴ ዳዒዳዋንታ ጊዲንቶ፡ ኡንቴንቱና ኢቲፔ ናባቱዋ ዋጵኮ ሺን) ያጊታ። 31 ሄዋ ጊዳፔ፡ ናባቱዋ ዋጵዳዋንቱ ናና ሂንቴንቱ ጊዴዳዋ ሂንቴንቱ ሁጲያን ማርካቲታ። 32 ሲሚ ሂንቴንቱ ኣዋቱ ደሚዳዋ ፖሊኪቲ!

33 «ሃ ሾሻቶ፡ ሾሻ ናናው፡ ጋናሚያ ፒርዳፔ ዋኒዴ ኣታኒቲ? 34 ሄዋ ዲራው፡ ቤይቲ፡ ታኒ ናባቱዋ ኣጵ ኤራንቻቱዋኔ ሂጊያ ታማሪሲያዋንታ ሂንቴኮ ኪታና። ኡንቴንቱፔ ኢቱዋ ኢቱዋ ሂንቴንቱ ዋጳናኔ ማሰቃሊያ ቦላ ሚሰማሪያን ጳሺዴ ካቃኒታ፤ ቃሲ ኢቱዋ ኢቱዋ ሂንቴንቱ ዋሳ ጎሌቱን ሊሱዋን ሾጫኒታኔ ካታማፔ ካታማ ዬዴርሳኒታ። 35 ሄዋ ዲራው፡ ዒሉዋ ኣቤላ ዋጵዴፔ ደሚዳ፡ ጌሻ ጎሊያፔኔ ያርሺያሳፔ ጊዲዋን ሂንቴንቱ ዋጵዳ ባራኪያ ናባ ዛካራሳ ዋዲያ ጋካናው፡ ሃይቄዳ ዒላቱዋ ኡባቱዋ ሱላ ዲራው፡ ሂንቴንቱ ሙሬታኒታ። 36 ታኒ ሂንቴንቶ ቱሙዋ ኦዳይ፤ ሃ ኡባባይ ሃ ዋዲያ ኣሳ ቦላ ጋካናዋ።

ዬሩሳሌም ስዴቲዳ ሚኖ ኦዲዎ
(ሉቅ 13:34-35)

37 «ዬሩሳሌም ካታማ አሳው፡ ዬሩሳሌም ካታማ አሳው፡
ናባቱዎ ሂንቴንቱ ዎዲታ፤ ያሳይ ሂንቴንቱኮ ኪቴዳዎንታካ ሹቻን
ጫዲታ፤ ኩታታ ባሬ ማራቱዎ ባሬ ቁፊያን ሃጺያዎዳን፡ ታኒ
ሂንቴንቱ አሳ ኢቲሳ ሺሻናው አፑ ካላ ኮያዲታ! ሺን ታና
ዲጌዲታ። 38 ቤዒቴ፡ ሂንቴንቱ ጎሊ ኡባካ ኦና ገዳናዎ።
39 አዪሲ ጎፔ፡ ታኒ ሂንቴንቶ ኦዲይ፤ ሂንቴንቱ፡ ሳዳ ሱንላን
ዪያዎ እንጃቴዳዎ ጋና ጋካናው፡ ላዒንሉዎ ታና ቤዒኪታ) ጋይ»
ያጌዲ።

24

ዬሱሲ ጌሻ ጎሊ ኮሌታናዎ ካሴቲዴ ኦዳዳ
(ማር 13:1-2፤ ሉቅ 21:5-6)

1 ዬሱሲ ጌሻ ጎሊያፕ ኬሲዴ ቢያ ዎዴ፡ ጌሻ ጎሊያ ዲርሳ
ጊደን ዴዒያ ጎሊያ ቤሳናው አ ካሊያዎንቱ አኮ ዬዲና። 2 ዬሱሲ
ዛሪዴ አንቱንታ፡ «ሄዎ ኡባ ቤዒቴ? ታኒ ሂንቴንቶ ቱሙዎ
ኦዲይ፤ ሃ ጎሌቱዎን ዴዒያ ኢቲ ሹቻይኔ አቴናን ኡባይ ኮሌታና»
ያጌዲ።

ዎዲያ ወርሴላባ
(ማር 13:3-13፤ ሉቅ 21:7-19)

3 ዬሱሲ ዴብሬ ዛይቴ ጌቲቲያ ዴሪያ ቦላን ኡቲዴዒሺን፡ አ
ካሊያዎንቱ ባሬንቱ ያላላ አኮ ዪዴ አ፡ «ሄዎ አዉዴ ሃናኔንቶ፡
ኑሲ ኦዳሪኪ፤ ቃሲ ኔ ዩሳዉኔ ዎዲያ ወርሴላው ማላይ አያ
ጊዳኔ?» ያጌዲና።

4 ዬሱሲ ዛሪዴ፡ አንቱንታ ሃዎዳን ያጌዳ፤ «ሂንቴንታ ኦኒኔ
ባሌሌና ማላ ናጌቲቴ። 5 አዪሲ ጎፔ፡ ዳር አሳይ ታ ሱንላን፡
(ታኒ ኪሪሰቶሳ) ያጊዴ ያና፤ ያቲዴ ዳር አሳ ባሌላና። 6 ማታን
ዴዒያ ኦላ ዋሱዎን ሃኩዎን ዴዒያ ኦላ ኦዲዎ ሰሳናው ሂንቴንቱ
ዴዒታ፤ ሄዎ ማላባይ ሃናናው ቤሲያ ዲራው፡ ናጌቲቴ፤ ሂርሳፕፕቴ፤
ሺን ወርሴላይ ቢራ። 7 አዪሲ ጎፔ፡ ኢቲ ጋዲያ አሳይ ሃራ
ጋዲያ አሳና ኦሌታና፤ ቃሲ ኢቲ ካዉቴላይ ሃራ ካዉቴላና ኦሌታና፤
ኮሻይኔ ቢታ ቃላይ ኡባሳን ዴዳናዎ። 8 ሄዎ ኡባይካ ኮይር ኦይላ
ማላ።

9 «አሳይ ሄ ዎዴ ሂንቴንታ ዋዪሳና ነ ዎዳናዎ፤ ታ ሱንሳ ዲራው፡፡ ጋዴ ኡባይ ሂንቴንታ ኢፃናዎ፡፡ 10 ሄ ዎዴ ጮራ አሳይ አማኑዋ አጋናዎንታ፤ ባሬንቱ ጊደን ኢቱ ኢቱዋ አሊዴ ኢማናኔ ኢቱ ኢቱዋ ኢፃናዎ፡፡ 11 ቃሲ ዎርዶ ናባቱ ጮራቱ ዴንዲዴ፡፡ ዳር አሳ ጩማናዎንታ፡፡ 12 ማካላይ ዳሪያ ዲራው፡፡ ጮራ አሳ ሲቁ ኢርፃናዎ፡፡ 13 ሺን ዉርሴላይ ጋካናው ጌንጩያ ኡራይ አታናዎ፡፡ 14 አሳው ኡባው ማርካ ጊደና ማላ፡፡ ካዉቲላ ዎንጋላ ሚሺራቼ ሳሳ ኡባን ኡዴታናዎ፤ ሄዎፕ ጉዪያን፡፡ ዉርሴላይ ጋካናዎ፡፡

ባሻ ቱናቴላ
(ማር 13:14-23፤ ሉቅ 21:20-24)

15 «ሄዎ ዲራው፡፡ ናቢያ ዳኔል ኦዴዳ ባሻ ቱናቴላይ ጌሻ ሳን ኤቄዳዎ ሂንቴንቱ ቤዓና፤ ሄዎ ዋጊያዎንቶ፡፡ ናባቢያዎ አኬኮ፡፡

16 «ዪሁዳ ጋዲያን ሄ ዎዴ ዴዲያዎንቱ ዴሪያኮ ኬሲኖ፡፡ 17 ጎሊያ ሁጲያን ዴዲያ ኡራይካ ባሬ ሶዪን ዴዲያዎ አካናው ዎጹ፡፡ 18 ጋዴን ዴዲያዎ ባሬ ማዩዎ አካናው ጉዬ ሲዎ፡፡

19 ሄ ዎዴ ሻሃራ ማጫዎንቱሲኔ ቆንሊያ ማጫዎንቱሲ አዬር፡፡ 20 ባልጉዋን ዎይ ሳምባታን ሂንቴንቱ ቤቴና ማላ፡፡ ያሳ ዎሲቴ፤ 21 አያው ጎፕ፡፡ አላሚ ሚዴቶዴፕ ሃቼ ጋካናው ዴዲያናባይኔ ቃሲ ሃዎፕ ሲንሳዉካ ኡባ ዴዲና ኢታ ዎዪ ሄ ዎዴ ዴዲናዎ፡፡

22 ያሳይ ሄ ጋላሳቱዋ ፓይዲዎ ጉሊያዎ ባዌንቶ፡፡ አሳ ጊዴዳ ኦኒኔ አቴና፤ ሺን ኢ ባሬ ዶሬዳ አሳቱዋ ዲራው፡፡ ሄ ጋላሳቱዋ ፓይዲዎ ጉላናዎ፡፡

23 «ሄ ዎዴ ኦኒኔ ሂንቴንታ፡፡ (ቤዲቴ፡፡ ኪሪሰቶሲ ሃዎን ዴዴ) ዎይ፡፡ (ሄዎን ዴዴ) ያሳፕ አዎ አማኖፕቴ፡፡ 24 አዪሲ ጎፕ፡፡ ዎርዶ ኪሪሰቶሳቱኔ ዎርዶ ናባቱ ዴንዳና፤ ያቲዴ ባሬንቶ ዳንዳዬቶፕ፡፡ ሃራይ አቶ ያሳይ ደሬዳዎንታካ ባሌላናው ዎልቃማ ማላታኔ ማላሊሲያባ ቤሳናዎ፡፡ 25 ቤዲቴ፡፡ ታኒ ሂንቴው ሄዎ ካሴታዴ ኦዳዲ፡፡

26 «ሄዎ ዲራው፡፡ አሳይ ሂንቴንታ፡፡ (ቤዲቴ፡፡ ኪሪሰቶሲ ባዙዎን ዴዴ) ጎፕ፡፡ ያ ቦፕቴ፤ ዎይ ሂንቴንታ፡፡ (ቤዲቴ፡፡ ቆልያን ዴዴ) ጊንቶካ፡፡ ኡንቱንቱባ አማኖፕቴ፡፡ 27 አዪሲ ጎፕ፡፡ ዎልቃንላይ አዎይሬ ዶሊያ ባጋፕ ዎልቃሚዴ፡፡ አዎይሬ ዉሊያ ባጋ ጋካናው ጳልቁጊያዎዳን፡፡ ታ ዩሳይ፡፡ አሳ ናዓ ዩሳይ፡፡ ሄዎዳን ሃናናዎ፡፡

28 «ባኩታይ ዴዲያሳ ሾርቲ ሺቃና፡፡

24:9 ማት 10:22 24:15 ዳን 9:27፤ 11:31፤ 12:11 24:21 ዳን 12:11፤ ሳፅ 7:14

አሳ ናዓይ፥ ኪሪሰቶሲ ላዔጡዋ ያና
(ማር 13:24-27፤ ሉቅ 21:25-28)

29 «ሄ ዎዴ ዋዪያፔ ጉዪያን፥
ማንዲያን አዋይ ቶማና፤
አጌናይ ፖዲያዋ አጋናዋ፤
ያለንታቱ ሳሉዋፔ ኩንዳናዋንታ፤

ቃሲ ሳሉዋን ዴዲያ ዎልቃቱካ ቃፆታናዋንታ።
30 ሄ ዎዴ ታ ማላይ፥ አሳ ናዓ ማላይ፥ ሳሉዋን ቤታናዋ፤ ሳዓን
ሄ ዎዴ ዴዲያ አሳ ዛሪ ኡባይ ዩካናዋንታ። ቃሲ ታኒ፥ አሳ
ናዓይ፥ ዎልቃናኔ ዎልቃማ ቦንቹዋና ሳሉዋፔ ሻሪያ ጊዶና ዪሺን፥
ኡንቱንቱ ቤዓና። 31 ኢ ባሬ ኪታንቻቱዋ ዎልቃማ ማላካታና
ኪታና፤ ኪታንቻቱ ኣላሚው ሃ ጋፃፔ ያ ጋፃ ጋካናው፥ ቃሲ ሳዓን
ኦይዱ ባጋፔ ኣው ዶሬቴዳ አሳ ሺሻናዋ።

ኅዳይ ያና ጋላሳ ማላታ
(ማር 13:28-31፤ ሉቅ 21:29-33)

32 «ሌሚሱዋ ባላሳቶ ጌቲቲያ ሚላቲፔ ኣኬኪቲ፤ ባላሳታ
ኣጪያ ዎዴኔ ኢዚ ሃይላይ ቆሌቲያ ዎዴ፥ ቦኒ ማቴዳዋ ሂንቲንቱ
ኤራኒታ። 33 ሄዎዳንካ፥ ሂንቲንቱ ሄ ኡባባ ቤዲያ ዎዴ፥ ኢ
ማቲዴ ፔንጊያ ሸቆዳዋ ኤሪቴ። 34 ታኒ ሂንቲንቶ ቱሙዋ ኦዳይ፤
ሃ ኡባባይ ሃናና ጋካናው፥ ሃ ዎዲያ አሳይ ሃይቁዲጌና። 35 ሳሉኔ
ሳዓይ ኣቆና፤ ሺን ታ ቃላይ ኡባካ ኣዴና።

ኅዳይ ያና ጋላሳ ኦኒኔ ኤሬና
(ማር 13:32-37፤ ሉቅ 17:26-30፤ 34-36)

36 «ሺን ሄ ጋላሳኔ ሄ ሳቲያ ኣጩዋ ፃላላፔ ኣቲን፥ ሃራይ ኣቶ
ሳሉዋን ዴዲያ ኪታንቻቱዋ ጊዲና፥ ዎይ ታና ናዓ ጊዲናካ ኦኒኔ
ኤሪያዌ ባዋ። 37 ታ ዩሳይ፥ አሳ ናዓ ዩሳይ፥ ኖሄ ዎዴ ሃናዋ
ማላ ጊዳናዋ። 38 ኣዪሲ ጎፔ፥ ባሻ ሃላ ዩሳፔ ካሴ ዎዴ፥ ኖሄ
ማርካቢያን ጌሌዳ ጋላሳይ ጋካናው፥ አሳይ ሚኔ ኡሺኔ፤ ቃሲ
ኣቱማ አሳይ ኣኬኔ ማጫ አሳይ ኣሲና ጌሌ። 39 ባሻ ሃላይ ዩዴ፥
ኡንቱንታ ኡባ ኣፋና ጋካናው፥ ኡንቱንቱ ኣኬኪ ቤይኪኖ፤ ታኒ፥
አሳ ናዓይ፥ ዪያ ዎዲ፥ ሄዋ ማላ ጊዳናዋ።

24:29 ኢሳ 13:10፤ 34:4፤ ሂዝ 32:7፤ ኢዩ 2:10፤ 31፤ 3:15፤ ሳፅ 6:12-13
24:30 ዳን 7:13፤ ዛክ 12:10-14፤ ሳፅ 1:7 24:37 ዶሞ 6:5-8 24:39
ዶሞ 7:6-24

40 «ሄ ዎዴ ላዑ አሳቱ ጋዴን ኦሊያዎንቱ፤ ኢቲዎ አፋና፤ ኢቱ አታናዎ። 41 ላዑ ማጫዎንቱ ዎፃን ጋጪያዎንቱ፤ ኢቲኖ አፋና፤ ኢቲና አታና።

42 «ሲሚ ሂንቱ ጎዳይ አይ ጋላሲ ያናዌንቶ ሂንቱንቱ ኤሬና ዲራው፣ ናጊ ኡቲቱ። 43 ሺን ካዪሱ ቃማፕ ዎይሳ ዎዲያን ያኔንቶ ጎሊያ ጎዳይ ኤሬዳንቶ፣ ባሬ ጎሊ ቦኬቲና ማላ፣ ቤጎቲዴ ናጊ ኡታናዎ ኤሪቲ። 44 ሄዎ ዲራው፣ ሂንቱንቱካ ጊጊ ኡቲቲ፤ አያው ጎፔ፣ ታኒ፣ አሳ ናዓይ፣ ሂንቱንቱ ቆፔና ሳቲያን ያና።

ኢታኔ ሎዎ ቆማ ለሚሱዎ (ሉቅ 12:41-48)

45 «ያቲና፣ ባሬ ሶይ አሳው ቁማ ኮሺያ ዎዲያን ኢማና ማላ፣ አ ጎዳይ ሱጉሴዳ አማኔቲዳ ዎዛናማ ቆማይ ኦኔ? 46 ኢ ሄዎዳን ኦሊሺን፣ አ ጎዳይ ዪዴ ዴሚያ ቆማይ አንጄቲዳዎ። 47 ታኒ ሂንቱንቶ ቱሙዎ ኦዳይ፤ ጎዳይ ሄ ቆማ ባሬዎ ኡባ ቦላ ሱጎላና። 48 ሺን ቆማይ ኢታ ጊዶፕ፣ ታ ጎዳይ ጋሚዒዴ ያናዎ) ያጊዴ ባሬ ዎዛናን ቆፒዴ፣ 49 ባሬ ላጌላ ቆማቱዎ ዎቆ ደሞፕ፣ ማላቲያዎንቱና ሞፔኔ ኡሾፕ፣ 50 ሄ ቆማ ጎዳይ ኢ ቆፒቤና ጋላሳኒኔ ኢ ኤሪቤና ሳቲያን ያና። 51 ሄዎፕ ጉዪያን አ ቃንጄሬሊዴ፣ * ሎዒ ማላቲያ ኢታ አሳቱ ዴዒያሳን ዎላና፤ ሄዎን ኢ ዬካናኔ አቻ ቆቃና።

25

ታሙ ዎደራቱዎ ለሚሱዎ

1 «ሄ ዎዴ ሳሉዎ ካዉቱላይ ባሬንቱ ኩራዚያ ኦይቁዴ፣ ማቻቶ አኪያዎ ሞካናው ካሬ ኬሴዳ ታሙ ዎደራቱዎ ማላታና።

2 አንቱንቱ፤ ኢቼሻቱ ቦዛቱዎ፤ ቃሲ ኢቼሻቱ ጨንጫ። 3 ቦዛቱ ባሬንቱ ኩራዚያ ኦይቁዲና፤ ሺን ላምባ ኦይቁቤይኪና። 4 ሺን ጨንጫቱ ባሬንቱ ኩራዚያኔ ፃሩሙሲያን ላምባ ኦይቁዲና። 5 ማቻቶ አኪያዎ ዬናን ጋሚዒና፣ ሄ ዎደራቱ ባሬንታ ጌሚዒሺሲና ጊሲ አጌዲና።

6 «ቢላሄ ጊዴዳ ዎዴ፣ (ቤዒቲ፣ ማቻቶ አኪያዎ ጋኬዳ፤ አ ሞካናው ካሬ ኬሲቲ) ያጊያ ዎልቃማ ጫቡ ዴንዴዳ።

7 «ሄ ዎዴ ሄ ዎደራቱ ኡባቱ ቤጎቲዴ፣ ባሬንቱ ኩራዚያ ጊጊሴዲና። 8 ቦዛቱ ጨንጫቱዎ፣ ሉ ኩራዚ ቶዓና ሂኒያ ዲራው፣ ሂንቱንቱ ላምባፕ ኦሲ ኢሜሪኪቲ) ያጌዲና።

* 24:51 አ ቃንጄሬሊዴ፣ ጉሳይ ኬሲ ካሬ ኦላናዎ ጊያዎ።

9 «ሺን ጨንጫቱ ዛሬዎ ኡንቱንታ፡ ለአገቱ፡ ኮሲኔ ሂንቴንቱሲ ጊዳና፤ ሄዋ ዲራ ሂንቴው ዛሊዲያዋንቱኮ ቢዳ ሻሚ አከቱ) ያጌዲና። 10 ሄዋፔ ጉዬ ቦዛ ዋዶራቱ ለምባ ሻማናው ቢዲጊና፡ ማቻቶ አኪያዌ ፑቱ ጊና፡ ገጊ ኡቴዳ ኢቼሹ ዋዶራቱ አናና ኢቲፔ ቡላቻ ጎሊያ ጌሌዲና፤ ኢፒላይካ ጎርዳቲ አጌዳ።

11 «ጉዬፔ ቃሲ ዮኮ ዋዶራቱ ዪዳ፡ ጎዳው፡ ጎዳው፡ ኮሲ ደያሪኪ) ያጌዲና።

12 «ሺን ማቻቶ አኪያዌ ዛሬዳ፡ ሓኒ ሂንቴንቶ ቱሙዋ ኦዳይ፤ ታኒ ሂንቴንታ ኤሪኬ) ያጌዳ።

13 «ሲሚ ታኒ፡ አሳ ናዓይ፡ ያና ጋላሳ ዋይ ሳቲያ ሂንቴንቱ ኤሪና ዲራው፡ ናጊ ኡቲቱ።

ሄዙ ቆማቱዋ ለሚሱዋ (ሉቅ 19:11-27)

14 «አዪሲ ጎፔ፡ ሳሉዋ ካዉቲላይ ባሬ ቆማቱዋ ዪሲዳ፡ ባሬው ደዒያዋ ኡንቱንቶ ሹዲዳ፡ አጊያ ባና ሂኒያ ቢታኒያ ቤሴ።

15 ኡንቱንቱ ሁጲያን ሁጲያን ኡንቱንቱ ዋልቃ ኬና ኢቶ ኢቼሹ ሻዓ ቢራ፡ ኢቶ ላዑ ሻዓ ቢራ፡ ቃሲ ኢቶ ኢቲ ሻዓ ቢራ ኢሚዳ፡ ባሬ አጊያ ቤዳ። 16 ኢቼሹ ሻዓ ቢራ አኬዳ ቆማይ ኤለካ ቢዳ ዛሊዲዳ፡ ሃራ ኢቼሹ ሻዓ ቢራ ዋዲሳዳ። 17 ሄዋዳንካ፡ ቃሲ ላዑ ሻዓ ቢራ አኬዳ ቆማይ ሃራ ላዑ ሻዓ ቢራ ዋዲሳዳ።

18 ሺን ኢቲ ሻዓ ቢራ አኬዳዌ ቢዳ፡ ኦላ ቦኪዳ፡ ባሬ ጎዳ ሚሻ ዋጊ አጌዳ።

19 «ዳሮ ዋዲያፔ ጉዪያን፡ ሄ ቆማቱዋ ጎዳይ ዪዳ፡ ባሬ ሚሻ ኡንቱንቱና ሄቴቲዳ። 20 ኢቼሹ ሻዓ ቢራ አኬዳ ቆማይ ዪዳ፡ ሃራ ኢቼሹ ሻዓ ቢራ ሹዲዳ፡ ሓ ጎዳው፡ ኔኒ ታው ኢቼሹ ሻዓ ቢራ ኢማዳ፤ ቤዳ፡ ሃራ ኢቼሹ ሻዓ ቢራ ዋዲሳዳ) ያጌዳ። 21 አ ጎዳይ አ፡ ሐያናሹ! ኔኒ ሎዓኔ አማኔቲያ ቆማ፤ ኔኒ ጉላባን አማኔታዳ። ታኒ ኔና ዳሮባው ካፖ ኦላና፤ ሃ ጌላዳ ኔ ጎዳና ናሹታ) ያጌዳ።

22 «ቃሲ ላዑ ሻዓ ቢራ አኬዳዌካ ዪዳ፡ ሓ ጎዳው፡ ኔኒ ታው ላዑ ሻዓ ቢራ ኢማዳ፤ ቤዳ፡ ታኒ ሃራ ላዑ ሻዓ ቢራ ዋዲሳዳ) ያጌዳ። 23 አ ጎዳይ አ፡ ሐያናሹ! ኔኒ ሎዓኔ አማኔቲያ ቆማ፤ ኔኒ ጉላባን አማኔታዳ። ታኒ ኔና ዳሮባው ካፖ ኦላና፤ ሃ ጌላዳ ኔ ጎዳና ናሹታ) ያጌዳ።

24 «ኢቲ ሻዓ ቢራ አኬዳዌ ቃሲ ዪዳ፡ ሓ ጎዳው፡ ኔኒ ዜራቤናሳፔ ቆይጨያ አሳ ጊዲያዋኔ ካላ ላላቤናሳፔ ማዲያ

ሜቄሊ ባይና እሳ ጊዲያዎ ታኒ ኤራይ። 25 ታኒ ያያዲ፤ ያታዳ ባዳ ኔ ቢራ ቢታን ሞጋዲ፤ ቤዓ፣ ኔ ቢራይ ሃዋኩን ያጌዳ።

26 «እ ጎዳይ ዛሪዳ፣ እ ሃዋዳን ያጌዳ፤ ሳሃ ኢታ እዛላ እሺካሬው። ታኒ ዜራቤናሳ፤ ቆይጨያ እሳ ጊዲያዎኔ ካላ ላላቤናሳ፤ ማዲያ እሳ ጊዲያዎ ኤራዲ? 27 ያቲና፣ ኔኒ ታ ሚሻ ዎዲሲያዎንቱ ማታን ዎሌዳዎ ጊዲንቶ፣ ታኒ ሲሚያ ዎዳ ታ ሚሻ ዎዲያና እካናዎሺን አቲዳ። 28 ሄዎ ዲራው፣ ሄ ሚሻ እፔ ዎሊ እኪዳ፣ ታው ሻዓ ቢራይ ዳዲያዎ አሚቲ። 29 እዩሲ ጎፔ፣ ዳዲያ ኡባው ሃራይ ጉጃታና፤ ኢ ባሬው ጊዲያዎ፤ ዳሪሲዳ እካና፤ ሺን ባይናዎ ሃራይ አቶ፣ ሄ እው ዳዲያ ጉላይካ እፔ እኬታናዎ። 30 ጎዔና ቆማ ካሬ ዲማ ኬሲ ኦሊቲ፤ ሄዎን ኢ ዩካናኔ ባሬ እቻ ዳቃና) ያጌዳ።

ዎዲያ ወርሴላን ሃናና ፒርዳ

31 «ታኒ፣ እሳ ናዓይ፣ ኪታንቻቱዎ ኡባቱዎና ቦንቹዎን ዩያ ዎዳ፣ ታ ቦንቹ ካወቱላ ኦይዲያን ኡታና። 32 ሳዓን ዳዲያ እሳይ ኡባይ ታ ሲንላ ሺቃናዎንታ፤ ሄሚያዎ ዶርሳቱዎ ዳሻቱዎ፤ ሻኪያዎዳን፣ ታኒ ሄ እሳ ላዑ ኬሳዳ ሻካና። 33 ቃሲ ዶርሳቱዎ ታፔ ኡሸቻ ባጋና ኤሳዳ፣ ዳሻቱዎ ታፔ ሃዲርሳ ባጋና ኤሳና።

34 «ሄዎ፤ ጉዩያን፣ ታኒ ካቲ ታፔ ኡሸቻ ባጋና ዳዲያዎንታ ሃዋዳን ያጋና፤ ሳሃ እኩ እንጃዳዎንቶ፣ ሃ ዩዳ ሳዓይ ሜዴቶዳ፤ ሃቼ ጋካናው፣ ሂንቴንቶ ጊጌዳ ካወቱላ ላቲቲ። 35 እዩሲ ጎፔ፣ ታኒ ኮሻቲና ሚዜዲታ፤ ሳሜቲና ኡሸዲታ፤ አማላ ጊዳዳ ቢናካ ሞኬዲታ። 36 ታኒ ካሎቲና ማዩዜዲታ፤ ሃርጊና ቤዔዲታ፤ ቃሺቲና ታኮ ጋኪዳ ኦቼዲታ) ያጋና።

37 «ሄዎ፤ ጉዩያን፣ ዓላቲ ዛሪዳ፣ እ ሃዋዳን ያጋና፤ ሳሃዳው፣ ኔኒ ኮሻቲና፣ አዉዳ ቤዔዳ ሚዜዳ? ዎይ ኔኒ ሳሜቲና፣ አዉዳ ቤዔዳ ኡሸዳ? 38 ኔኒ አማላ ጊዳዳ ዩና አዉዳ ቤዔዳ ሞኬዳ? ዎይ ኔኒ ካሎቲና አዉዳ ማዩዜዳ? 39 ቃሲ ኔኒ ሃርጊና፣ ዎይ ቃሺቲና ኮኮ ቢዳ አዉዳ ኔና ቤዔዳ?) ያጋናዎንታ። 40 ታኒ ካቲ ዛሪዳ፣ ሳሃ ሂንቴንቶ ቱሙዎ ኦዳይ፤ ሂንቴንቲ ሃ ታ አሻቱዎ ኡባ፤ ሃራይ አቶ፣ ላፊያ ኢቶ ኦሌዳዎ ጊዲንቶካ፣ ሄዎ ታው ኦሌዲታ) ያጋና።

41 «ሄ ዎዳ፣ ታፔ ሃዲርሳ ባጋና ዳዲያዎንታ ታኒ ያጋና፤ ሳሃ ሸቄቲዳዎንቶ፣ ታ ማታ፤ ኪቹቲ፤ ቢዳ ዓላህያ ካገኔ እ ኪታንቻቱዎሲ ጊጌዳ ሜዲና ታማን ጌሊቲ። 42 እዩሲ ጎፔ፣

ታኒ ኮሻቲና፡ ታና ሚዚቤይኪታ፤ ሳሜቲና ኡሺቤይኪታ። 43 ታኒ ኢማላ ጊዳዴ ቢና፡ ታና ሞኪቤይኪታ፤ ካሎቲና ማዩዚቤይኪታ፤ ቃሲ ሃርጊና፡ ቃሺቲናካ ታና ቤዒቤይኪታ፤ ያጋና።

44 «ሄ ዎዴ ኡንቱንቱ ቃሲ ሃዋዲን ያጊዴ ዛራናዋንታ፤ ሳዳው፡ ኔኒ ኮሻቲና ዎይ ሳሜቲና፡ ዎይ ኢማላ ጊዳዴ ቢና ዎይ ካሎቲና፡ ዎይ ሃርጊና ዎይ ቃሺቲና፡ ኣዉዴ ቤዒዴ፡ ኔና ማዴናን ኢጻዶ?» ያጋናዋንታ።

45 «ሄ ዎዴ ታኒ ካቲ ዛራዴ ኡንቱንታ፡ ታኒ ሂንቱንቶ ቱሙዎ ኦዳይ፤ ሂንቱንቱ ሃ ኡባፔ ላፊያ ኢቱዎ ማዴናን ኢጻዳዎ፡ ታና ማዴናን ኢጻዳዎ» ያጋና። 46 ሄዋንቱ ሜጲና ሙራው ባና፤ ሺን ጻላቱ ሜጲና ዴዎ ባና» ያጌዳ።

26

ዬሱሳ ቦላ ማቄቲዲኖ

(ማር 14:1-2፤ ሉቅ 22:1-2፤ ዮሀ 11:45-53)

1 ዬሱሲ ሃ ቲሚርቲያ ኡባ ዉሪሴዳ ዎዴ፡ ባሬና ካሊያዋንታ፡
2 «ላዑ ጋላሳፔ ጉዩያን፡ ፓሲጋ ባላ ቦንቺያ ጋላሳ ጊዲያዎ ኤሪታ። ሄ ጋላሲ ታና፡ ኣሳ ናባ፡ ኣሳይ ማስቃሊያ ቦላ ሚሲማሪያን ጲሺዴ ካቃናው ኣሊዴ ኢማና» ያጌዳ።

3 ሄ ዎዴ ቄሳቱዎ ካፓቱኔ ጋዲያ ጨማቱ ቃያፋ ጌቲቲያ ቄሳቱዎ ኡባቱዎ ካፑዎ ዎጋ ጎሊያን ሺቂዴ፡ 4 ኣሳይ ኤሬናን ዬሱሳ ኦይቂዴ፡ ዎጳናው ማቄቲዲኖ። 5 ሺን ኡንቱንቱ፡ «ኣሳይ ዋላሳ ኬሴና ማላ፡ ፓሲጋ ቦንቺያ ጋላሲ ሄዎ ኦሎኮ» ያጌዲኖ።

ኢቲ ማጫ ሚሺራታ ዬሱሳ ሺቱዎ ጫጫፋዲ

(ማር 14:3-9፤ ዮሀ 12:1-8)

6 ዬሱሲ ቢታኒያ ካታማን ኦሎዎ ሃርጊያ ሲሞና ሶዩን ዴዒሺን፡
7 ኢቲ ሚሺራታ ኣልባሰዲርሳ ጌቲቲያ ሹቻፔ ኦሴቲዳ ቢልቃሲያ ኩሚዳ ዳሪ ኣልዎ ሺቱዎ ኣካዴ ዬዳዉና ቁማ ኢ ሚና፡ ሄ ሺቱዎ ዬሱሳ ሁጲያን ጫጫፋዲ። 8 ሺን ዬሱሳ ካሊያዋንቱ ሄዎ ቤዒዴ፡ «ሃ ሺቱዎ ጮ ባዩዙሳይ ኣያሴ? 9 ኣዩሲ ጎፔ፡ ሃ ሺቱዎ ኣልዎ ጋቲያን ዛሊዒዴ፡ ሚሻ ሂዬሳው ኢማናው ዳንዳዬቱ» ያጌዲኖ።

10 ዬሱሲ ኡንቱንቱ ጊያዎ ኤሪዴ፡ ኡንቱንታ ሃዋዲን ያጌዳ፤ «ሃ ሚሺራቶ ኣያው ዋዩሲቲ? ኢዛ ታው ሎዎባ ኦላዲ። 11 ሂዬሳቱ

ኡባ ዎዴ ሂንቴናና ዴዒኖ፤ ሺን ታኒ ሂንቴናና ኡባ ዎዴ ዴዒኤ፤
 12 ኢዛ ሃ ሺቱዎ ታ ቦላ ቲጊያዌ ታና ዋጋናው ገገሳናሳ።
 13 ታኒ ሂንቴንቶ ቱሙዋ ኦዳይ፤ ሳዓ ኡባን ሃ ዎንጋላ ሚሺራቹዎ
 ኦዲያሳን ሃቃኒኔ፥ አሳይ ኢዞ ዎዛና አፋና ማላ፥ ኢዛ ኦሌዳዌ
 ኦዴታናዎ» ያጌዳ።

ዪሁዳይ ዩሱሳ አሌዴ አማናው ዩዉዋን ገጌዳ
 (ማር 14:10-11፤ ሉቅ 22:3-6)

14 ሄ ዎዴ ታማኔ ላዑ ዩሱሳ ካሊያዋንቱፔ ኢቱ ዪሁዳ
 አስቆርቱ ያጌቲያዌ ቁሳቱዎ ካፓቱዎኮ 15 ቢዴ፥ «ታኒ ሂንቴንቱሲ
 ዩሱሳ እይሶፔ፥ ታው አያ አማኒቱ?» ያገና ኡንቱንቱ አው ሃታሙ
 ቢራ ቆፒዴ አሜዲኖ። 16 ሄዎፔ ጉዩያን፥ ዪሁዳይ ዩሱሳ አሌ
 አማናው ኢንጃቲያ ዎዲያ ዎቹ።

ዩሱሲ አዪሁዳቱ ፓሲጋ ካዉዎ ባሬና ካሊያዋንቱና ሜዳ
 (ማር 14:12-21፤ ሉቅ 22:7-14፤ 21-23፤ ዮሀ 13:21-30)

17 ባላ ዳቡዎ ሚያ ጋላሳ ቦንቹያ ኮይሮ ጋላሲ፥ ዩሱሳ
 ካሊያዋንቱ አኮ ዪዴ፥ «ፓሲጋ ቦንቹያ ጋላሲ ኔኒ ማና ቁማ
 ሃቃን ገገሳኔ?» ያጌዲኖ።

18 ሄዎፔ ጉዩ ዩሱሲ ኡንቱንታ፥ «ካታማ ቢዴ፥ ኢቲ ቢታኒያ፥
 ሪታማሪሲያዌ ኔና፥ «ታው ዎዲ ጋኬዳ፤ ታኒ ታና ካሊያዋንቱና
 ፓሲጋ ቦንቹያ ጋላሳ ኔ ሶዪን አፋና» ጌዳ፤ ገቱ» ያጌዳ።

19 አ ካሊያዋንቱ ዩሱሲ ባሬንታ አዛዞዎዳን አሌዴ፥ ፓሲጋ
 ቦንቹያ ጋላሲ ማና ቁማ ገገሴዲኖ።

20 ሳዓይ ኦማርሴዳ ዎዴ፥ ዩሱሲ ታማኔ ላዑ አ ካሊያዋንቱና
 ቁማ ማናው ኡቱዳ። 21 ኡንቱንቱ ሚሺን፥ ዩሱሲ ኡንቱንታ፥ «ታኒ
 ሂንቴንቶ ቱሙዋ ኦዳይ፤ ሂንቴፔ ኢቲ ኡራይ ታና አሌዴ አማናዎ»
 ያጌዳ።

22 ኡንቱንቱ ዳሪ ዳጋሚዴ፥ ሁጲያን ሁጲያን፥ «ጎዳው፥ ቱሙ
 ታኔሻ?» ጉሳ ደሜዲኖ።

23 ዩሱሲ ዛሪዴ፥ «ባሬ ኩሺያ ታናና ኢቲፔ ዎጨቲያፔ ዩዲዴ
 ቱሺያዌ ታና አሌ አማና። 24 ታኒ፥ አሳ ናዓይ፥ ያሳ ማፃፋይ
 ሃይቃና ጌዳዎዳን ሃይቃና፤ ሺን ታና፥ አሳ ናዓ፥ አሌ አሚያ ኡራው
 አዬር፤ ሄ ኡራይ ዩሌቱናን አቴዴንቶ አው ሎዓሺን» ያጌዳ።

25 አ አሌ አሚያ ዪሁዳይ ዛሪዴ፥ «ታማሪሲያዎ፥ ኔኒ ጊያዌ
 ታኔ?» ያጌዳ።

ዩሱሲ ዛሬዳ አ፡ «ኔኒ ኔ ሁጲያን ጋዳ» ያጌዳ።

ጎዳ ካወቀ አኪያ ዎጋ

(ማር 14:22-26፤ ሉቅ 22:15-20፤ 1ቆር 11:23-25)

26 ኡንቱንቱ ሚሺን፡ ዩሱሲ ዳቡቀ አኪዳ፡ ያሳ ጋላቴዳ፤ ሄ ዳቡቀ ሚንጼሬሬዳ፡ ባሬና ካሊያዎንቱሲ አሚዳ፡ «ሄይቴ፤ ሚቴ፤ ሃዌ ታ አሹቀ» ያጌዳ።

27 ፀዓ አኪዳ፡ ያሳ ጋላቴዳ። ኡንቱንቶ አሚዳ፡ «ኡባይ ሃዋፔ ኡሺቴ፤ 28 አያው ጎፔ፡ ሃዌ ዳር አሳ ናጋራይ አቶ ጌቴታና ዲራው ጉኪያ ታ ሱላ፤ ታ ሱላይ ኦራላ ጫቁዎ። 29 ሺን ታኒ ሂንቴንቶ ኦዳይ፤ ታኒ ታ አቡ ካወቴላን ኦራላ ዎዪኒያ ኤሳ ሂንቴንቱና ኡሻና ጋላሳይ ጋካናው፡ ላዔሉቀ ሃ ዎዪኒያ ኤሳ ኡባካ ኡሺኬ» ያጌዳ።

30 ማዚሙሪያ ዬዎዋፔ ጉዪያን፡ ዳብሬ ዛይቴ ጌቴቲያ ዳሪያ ቤዲኖ።

ዩሱሲ ጳደርሲ ካዳናዎ ካሴቴዳ ኦዳዳ

(ማር 14:27-31፤ ሉቅ 22:31-34፤ ዮሀ 13:36-38)

31 ዩሱሲ ሄ ዎዳ ኡንቱንታ፡ «ሃቺ ቃማ ሂንቴንቱ ኡባይ ታና አጊዳ ኪቻና፤ አያው ጎፔ፡ ያሳ ማፃፋይ፡ ፀሳይ ደርሳ ሄሚያዎ ዎሳናዎ፤

ሄዋፔ ጉዪያን ደርሳ ዉዲ ላሌታናዎ)

ያጌ። 32 ሺን ታኒ ሃይቁዋፔ ዳንዶዋፔ ጉዪያን፡ ሂንቴፔ ካሴታዳ ጋሊላ ባና» ያጌዳ።

33 ጳደርሲ ዛሬዳ፡ «ኡንቱንቱ ኡባቴ ኔና አጊዳ ኪቻናዎንታ፤ ታኒ ኔና ኡባካ ዬጋዳ ኪቺኬ» ያጌዳ።

34 ዩሱሲ ጳደርሳ፡ «ታኒ ኔው ቱሙቀ ኦዳይ፤ ሃቺ ቃማ ኩቱ ዎሳናፔ ካሴ፡ ኔኒ ታና ሄዙ ካላ ካዳናሳ» ያጌዳ።

35 ጳደርሲ ዛሬዳ፡ «ታኒ ሃራይ አቶ፡ ኔናና ኢቲፔ ሃይቂንቶካ፡ ኔና ኡባካ ካዲኬ» ያጌዳ። ቃሲ ዩሱሳ ካሊያዎንቱ ኡባቴካ ሄዎዳን ጌዲኖ።

ዩሱሲ ጌቴሴማኒያን ዎሴዳ

(ማር 14:32-42፤ ሉቅ 22:39-46)

36 ዩሱሲ ሄ ዎዳ ባሬና ካሊያዎንቱና ጌቴሴማኒያ ጌቴቲያሳ ቢዳ ኡንቱንታ፡ «ታኒ ሂኒ ባዳ ያሳ ዎሲሺን፡ ሂንቴንቱ ሃዋን ኡቲሺቴ» ያጌዳ። 37 ሄዋፔ ጉዬ ጳደርሳኔ ዛቢዲኖሳ ናና ላዑቀ

ባሬናና ኣፊዴ፡ ዳር ካዩዋኔ ኡጋ ደሜዳ። 38 ቃሲ ኡንቱንታ፡ «ታኒ ሃይቃና ጋካናሲካ ካዮታይ፤ ሃዋን ቤጎቲዳ፡ ታናና ናጊቱ» ያጌዳ።

39 ላፋ ሲንጻኮ ሸቂዳ፡ ሳዓን ጉፋኒዳ፡ «ታ ኣቦ፡ ዳንዳዬቲያዋ ጊደፔ፡ ሃ ፀዓ ታፔ ዲጋ፤ ሺን ኔኒ ኮዪያዋዳን ሃናፔ ኣቲን፡ ታኒ ኮዪያዋዳን ሃናፖ» ያጊዳ ያሳ ዋሴዳ።

40 ዬሱሲ ባሬና ካሊያዋንቱኮ ሲሚዳ ዬዳ፤ ጌሚዒሸዋንታ ዳሚዳ ጳዳርሳ፡ «ሂንቲንቱ ኢቲ ሳቲንቶኔካ ጌሚዒሸናን ታናና ናጋናው ዳንዳዪቤይኪቲ? 41 ፓጩያን ሂንቲንቱ ጌሌና ማላ፡ ሚኒቲኔ ያሳ ዋሲቲ፤ ኣያናይ ጊጊ ኡቲዳ፤ ሺን ኣሳቲፋ ኤሻይ ደቡራንቻ» ያጌዳ።

42 ዬሱሲ ቃሲ ላዒንጻዋ ቢዳ፡ «ታ ኣቦ፡ ታኒ ሃ ዋሊቃማ ሜቱዋ ኣከናን ዳዒሺን ፀዓ ዳንፋናው ዳንዳዬቲናዋ ጊደፔ፡ ኔኒ ጊያዌ ሃና» ያጊዳ ያሳ ዋሴዳ። 43 ቃሲካ ሲሚ ዪዳ፡ ኣ ካሊያዋንቱ ኣይፊያ ጌሚዒሸ ጎዚ ዋጮዳ ዲራው፡ ጌሚዒሸዋንታ ዳሚዳ።

44 ቃሲካ ኡንቱንታ ዬጊ ቢዳ፡ ሄዜንጻዋ ካሴ ቃላ ዛሬዳ፡ ያሳ ዋሴዳ። 45 ሄዋፔ ጉዪያን፡ ባሬና ካሊያዋንቶ ዪዳ፡ «ሃዒ ጋካናዉካ ጌሚዒሸቲኔ ሸምፒቲ? ቤዒቲ፡ ታና፡ ኣሳ ናዓ፡ ናጋራንቻ ኣሳቲዋሲ ኣሌዳ ኣሚያ ዋዲ ጋኬዳ። 46 ዳንዲና ቦይቲ፤ ቤዒቲ፡ ታና ኣሌ ኣሚያዌ ሃዌኩ ጋኬዳ» ያጌዳ።

ዬሱሲ ባሬ ዋርኬቱዋን ኣይቄቲዳ
(ማር 14:43-50፤ ሉቅ 22:47-53፤ ዮሀ 18:3-12)

47 ዬሱሲ ሄዋ ቢር ሃሳዪሺን፡ ታማኔ ላዑ ኣ ካሊያዋንቱፔ ኢቲ፡ ዪሁዳይ፡ ጋኪ ዋዴዳ፤ ቃሲ ቄሳቲዋ ካፓቲኔ ጋዲያ ጨማቱ ከቲና፡ ማሻኔ ፃምዓ ኣይቄዳ ጮራ ኣሳይ ኣናና ኢቲፔ ዬዳ።

48 ዬሱሳ ኣሌ ኣሚያዌ ሄ ጮራ ኣሳ፡ «ታኒ ዬሪያዌ ኣ፤ ኣ ኣይቄቲ» ያጊዳ ማላ ኦዲ ዋጮዳ።

49 ኤሌካ ዬሱሳኮ ሸቂዳ፡ «ታማሪሲያዎ፡ ሳር ዳዓይ» ያጊዳ ኣ ዬሪ ኣኬዳ።

50 ዬሱሲ ዪሁዳ፡ «ታ ላጌው፡ ኔኒ ኣላናባ ኦላ ኣጋ» ያጌዳ።

ሄዋፔ ጉዪያን፡ ሄ ጮራ ኣሳይ ሸቂዳ፡ ዬሱሳ ሎይሌ ኣይቄዳ። 51 ዬሱሳና ዳዒያዋንቱፔ ኢቲ ባሬ ማሻ ኬሲዳ ቄሳቲዋ ኡባቲዋ ካፒዋ ቆማ ሃይላ ቃንፃ ኦሌዳ። 52 ዬሱሲ ሄ ዋዳ ኣ ሃዋዳን ያጌዳ፤ «ኔ ማሻ ኣኬዳሳኒ ዛራዳ ዋላ፤ ኣያው ጎፔ፡ ማሻ ዳንሌያ ኡባይ ማሻን ሃይቃና። 53 ታ ኣቡ ዳር ሻዓ ኪታንቻቲዋ ኢቲ ኩላን ዬዲዳ፡ ታና ማዳና ማላ፡ ታኒ ኣ ዋሳናው ዳንዳዪያዋ

ኤሪኪ? 54 ያተና። ያሳ ቃላይ ሃዋዳን ሃናናው ቤሴ ያጌዳዌ ዋኒዳ ፖሌታናው ዳንዳዩ?» ያጌዳ።

55 ሃዋፔ ጉዩያን፣ ዩሱሲ ሃዋን ሺቄዳ ጮራ አሳ ሃዋዳን ያጌዳ፤ «ታና ካዩሶ ኬሲዳ፣ ካዩሱዋ ኦይቂያዋዳን ኦይቃናው ማሻኔ ፃምዓ ኦይቄዳ ዩዲቲ? ታኒ ጌሻ ጎሊያን ታማሪሳዳ፣ ጋላሳን ጋላሳን ሂንቴንቱና ኦሊያ ዎዳ ታና ኦይቂቤይኪታ፤ 56 ሺን ሃዌ ኡባይ ሃኔዳዌ ናባቱ ያሳ ቃላን ፃፌዳዌ ፖሌታናሳ» ያጌዳ። ዩሱሳ ካሊያዋንቱ ሄ ዎዳ ኡባቱ አ ዩጊ ቤዲኖ።

ዩሱሲ ፒርዳ ሻንጎ አጴዳ

(ማር 14:53-65፤ ሉቅ 22:54-55፣ 63-71፤ ዮሀ 18:13-14፣ 19-24)

57 ዩሱሳ ኦይቄዳዋንቱ ቄሳቱዋ ኡባቱዋ ካፑዋ ቃያፋኮ፣ ሂጊያ ታማሪሲያዋንቱኔ ጨማቱ ሺቄዳሳ አኪዳ ቤዲኖ። 58 ሺን ጳዳሪሲ ቄሳቱዋ ኡባቱዋ ካፑዋ ዲርሳ ጊደ ጋካናው፣ ሃኩዋን አ ካሌዳ፤ ዩወዋ ወርሴላ ቤዓናው ዲርሳ ጊደ ጌሊዳ፣ ናጊያዋንቱና ኡቲ አጌዳ።

59 ቄሳቱዋ ካፓቱኔ ሺቄዳ አሳይ ኡባይ ዩሱሳ ዎጳናው አ ቦላ ዎርዲዋ ማርካ ዳማናው ኮዩዲኖ። 60 ሺን ሃራይ አቶ ጮራ አሳይ ዩዳ፣ አ ቦላ ዎርዲዋን ማርካቲናካ አፔ አይኔ ዳሚቤይኪኖ። ጉዩፔ ላዓቱ ዩዳ፣ 61 «ሃ ቢታኒ፣ «ታኒ ያሳ ጌሻ ጎሊያ ኮላዳ፣ ሄዙ ጋላሳን ዛራዳ ኬፃናው ዳንዳያይ» ጌዳ» ያጌዲኖ።

62 ቄሳቱዋ ኡባቱዋ ካፑ ዳንዲ ኤቄዳ ዩሱሳ፣ «ሃዋንቱ ኔና ሞቲያ ሞቶ ኔው ዛሪያባይ ባዌ?» ያጌዳ። 63 ሺን ዩሱሲ ጮዑ ጌዳ፤ ቃሲካ ቄሳቱዋ ኡባቱዋ ካፑ አ፣ «ታኒ ኔና ዳዑዋ ያሳ ሱንላን ጫላይ፤ ኔኒ ያሳ ናዓ ኪሪሰቶሳ ጊደፔ ኑሲ ኦዳ» ያጌዳ።

64 ዩሱሲ ዛሪዳ፣ «ኔኒ ኔ ሁጳወካ ጋዳ፤ ሺን ታኒ ሂንቴንቱሲ ኦዳይ፤ ሃዋፔ ሲንላን፣ ሂንቴንቱ ታና፣ አሳ ናዓ፣ ዎልቃማ ያሳፔ ኡሼቻ ባጋና ኡቲዳዎኔ ሳሉዋ ሻሪያና ዩሺን ቤዓና» ያጌዳ።

65 ሃዋፔ ጉዩያን፣ ቄሳቱዋ ኡባቱዋ ካፑ ባሬ ማዩዋ ጳጳ ኦሊዳ፣ «ሃዌ ቦሬዳ፤ ኩና ሃዋፔ ሲንላን አያው ሃራ ማርካ ኮሺ? ኢ ሃዒ ቦሪያዋ ሂንቴንቱ ሲሴዲታ። 66 ሂንቴንቱ ቆፋይ አዬ?» ያጌዳ።

ኡንቴንቱ፣ «አው ሃይቁ ቤሴ» ያጊዳ ዛሪዲኖ።

67 ሃዋፔ ጉዩያን፣ ኡንቴንቱ አ ዳሙዋን ጨቺዳ፣ አ ዳቺዲኖ፤ ሃራንቱ ቃሲ አ ባቂዳ፣ 68 «ኪሪሰቶሳ! ኔን ኔና ናቤ ጋሳሺን፣

ኔና ሾጩዳዊ ኦኔንቶ አኔ ኑሲ ኑዳ!» ያጌዲኖ።

ጳጳሮሲ ዬሱሳ ካዳዳ
(ማር 14:66-72፤ ሉቅ 22:56-62፤ ዮሀ 18:15-18፤ 25-27)

69 ጳጳሮሲ ጎሊያፔ ካሬና ዲርሳ ገደን ኡተዳዲሺን፤ እቲ አሺካራታ አኮ ያዳ። «ኔኒካ ጋለላ ዬሱሳና እቲፔ ዳዓ» ያጋዲ።

70 ሺን ኢ ኡንቱንቱ ኡባ ሲንላን ሄ አሺካራቶ። «ኔኒ ገያዌ አዬንቶ ታኒ ኤሪኬ» ያገዳ ካዳዳ።

71 ቃሲ ቢዳ ዲርሳ ፔንገያኮ ኬሲሺን፤ ሃራ አሺካራታ አ ቢዳዳ። ሄዋን ዳዲያ አሳቱዋሲ። «ሃ ቢታኒ ናዚሬቲያ ዬሱሳና ዳዳ» ያጋዲ።

72 ጳጳሮሲ ላዒንሉዋ ጫቂዳ። «ታኒ ሄዋ ቢታኒያ ኤሪኬ» ያገዳ።

73 ላፋ ጋሚዲሺን፤ ሄዋን ኤቄዳ አሳይ ጳጳሮሳኮ ዩዳ። «ኔኒካ ቱማ ኡንቱንቱና እቲፔ ዳዓ፤ አያው ጎፔ፤ ኔኒ ሃሳዪያ ሃሳያይካ ኔና ኤሪኬ» ያገዳ።

74 ሄዋፔ ጉዩያን ጳጳሮሲ። «ታኒ ሄዋ ቢታኒያ ኤሪኬ!» ያገዳ። ባሬና ሺቃኔ ጫቁዋ ደማዳ።

ሄ ዎዳ ኤሌካ ኩቱ ዋሲ አጌዳ። 75 ጳጳሮሲ ባሬና ዬሱሲ። «ኔኒ ኩቱ ዋሳናፔ ካሴ ሄዙ ካላ ታና ካዳናሳ» ጌዳዋ ሃሳዪዳ። ካሬ ኬሲዳ። ሴሌቲ ዬኬዳ።

27

ዬሱሲ ጲላዎሳ ሲንላ ፐርዳው ሸቄዳ
(ማር 15:1፤ ሉቅ 23:1-3፤ ዮሀ 18:28-32)

1 ዎንታ ጉራን ቄሳቱዋ ካፓቱ ኡባቱኔ ጋዲያ ጨማቱ ዬሱሳ ዎቆው ማቄቲዲኖ፤ 2 ኡንቱንቱ ዬሱሳ ቃቺ አፊዳ። ጋዲያ አዪሲያ ጲላዎሳው አላ ኢማዲኖ።

3 ዬሱሳ ሄ ዎዳ ኦይሌዳ ዩሁዳይ ጲላዎሲ ዬሱሳ ቦላ ፐርዳዳዋ ቤዲዳ። «አዬር! ኦይሌናን አጋሪኪታ!» ያገዳ። ሄ ማንዲያንካ ሃታሙ ቢራ ቄሳቱዋ ካፓቱኔ ጋዲያ ጨማቶ ጉዬ ዛሪዳ። 4 «ታኒ ጌሻ አሳ ኦይላዳ ናጋራ ኦላዲ» ያገዳ።

ሺን ኡንቱንቱ አ፤ «ሄዎ ኑሲ አያ ማቲ? ሄዎ ኔ ሸኔ» ያገዳ።

5 ዩሁዳይ ቢራ ጌሻ ጎሊያን ኦሊ አጌዳ፤ ኡንቱንቱ ማታፔ ቢዳ። ሱሌቲ ሃይቄዳ።

6 ቄሳቱዋ ካፓቱ ቢራ አኪዳ፡ «ሃ ቢራይ ሱላ ሚሻ ጊዲሺን፡ ኑኒ ጌሻ ጎሊያ ሚሻና ጋሊያዌ ዋጋ ጊዳና» ያጌዲኖ። 7 ሄዋፔ ጉዬ ኢቲፔ ዘሬቲዳ፡ ኢማላ አሳው ሞጎ ጋዲያ ኦላናው ኡርቃፔ ሚሻ ሜዲያዋንቱ ጋዲያ ሻሚዲኖ። 8 ሄዋ ዲራው፡ ሄ ጋዲ ሃቼ ጋካናዉካ፡ ሱላ ጋዲያ ጌቲቲዳ ዩሴቲ።

9 ናቢያ ኤርሚያሲ፡ «ኡንቴንቱ እው ኢማናው ቆፔዳ ሃታሙ ሹቻ ቢራ አኪዳ፡ 10 ጎዳይ ታና አዛዘዋዳን፡ ኡርቃፔ ሚሻ ሜዲያዋንቱ ጋዲያ ሻማናው ኢሜዲኖ» ጌቲቶዌ ሄ ዋዴ ፖሌቲዳ ጌዳ።

ጲላዖሲ ዩሱሳ ኡባባ ኦቼዳ
(ማር 15:2-5፤ ሉቅ 23:3-5፤ ዮሀ 18:33-38)

11 ዩሱሲ ጋዲያ አዩሲያዋ ሲንላ ሸቂና፡ ጋዲያ አዩሲያዌ አ፡ «ኔኒ አዩሁዳቱዋ ካቲ?» ያጊዳ ኦቼዳ።

ዩሱሲ አ፡ «ኔኒካ ጋዳዒ» ያጌዳ።

12 ቄሳቱዋ ካፓቱኔ ጋዲያ ጨማቱ አ ሞቲና፡ ኡንቴንቶ አይኔ ዛሩዋ ኢሚቤና። 13 ሄ ዋዴ፡ ጲላዖሲ ዩሱሳ፡ «ሃዋንቱ ኔና ሞቲያባ ኡባ ሲሲኪ?» ያጌዳ።

14 ዩሱሲ ሃራይ አቶ፡ ኢቲ ቃላካ ዛሬናን ኢጻና፡ ጋዲያ አዩሲያዋንቱ ዳሪ ማላሌቲዳ።

ዩሱሲ ሃይቆ ፒርዳቲዳ
(ማር 15:6-15፤ ሉቅ 23:13-25፤ ዮሀ 18:39-40፤ 19:1-16)

15 ጋዲያ አዩሲያዌ ፓሲጋ ቦንቺያ ጋላሳን፡ አሳይ ኮዩያ ኢቲ ኡራ ቃሹዋፔ ቢሊያ ዋጋይ ዳዔ። 16 ሄ ዋዴ ኢቲ ባርባና ጌቲቲያ ዩሱሲ ዳሮ ኤሬቲዳ ኢታ ቢታኒ ቃሾ ጎሌን ዳዔ። 17 ሄዋ ዲራው፡ ጮራ አሳይ ኢቲሳ ሸቂዳሳን ጲላዖሲ፡ «ታኒ ሂንቴንቶ ባርባና ጊያ ዩሱሳ ቢሎ፡ ዋይ ኪሪሰቶሳ ጌቲቲያ ዩሱሳ ቢሎ?» ያጊዳ አሳ ኦቼዳ። 18 አዩሲ ጎፔ፡ ኡንቴንቱ ቃናቲዳ ዩሱሳ ኦሌዳዋ ኢ ኤሬ።

19 ጲላዖሲ ፒርዳ ጎሌን ኡቲዳዒሺን፡ አ ማቻታ አው፡ «ሄ ዒሎ ቢታኒያ አይኔ ኦሎፓ፤ አያው ጎፔ፡ ታኒ ሃቼ ቃማ አኩሙዋን አባን ዳሮ ሜቶታዲ» ያጋዴ ኪታዲ።

20 ሺን ቄሳቱዋ ካፓቱኔ ጋዲያ ጨማቱ ጲላዖሲ ባርባና ቢሊዳ፡ ዩሱሳ ዋዳናዳን፡ ሸቂዳ አሳይ አ ዋሳና ማላ፡ አሳ ጨሚዲኖ።

27:10 ዛክ 11:12-13

21 ጲላዎሲ ዛሪዳ ኡንቱንታ፡ «ታኒ ኡንቱንቱ ላዓቱዋፔ ሂንቱው ኦና ቢላናዳን ኮዪቱ?» ያጊና ኡንቱንቱ፡ «ባርባና ቢላናዳን ኮዪቶ» ያጊዲኖ።

22 ጲላዎሲ፡ «ያቲና፡ ኪሪስቶሳ ጌቲቲያ ዩሱሳ ዎቶ?» ያጊዳ ኡንቱንታ ኦቲና ኡባይ፡ «ማስቃሊያ ቦላ ሚሲማሪያን ጲሺቲዳ ካቁቶ» ያጊዲኖ።

23 ጲላዎሲ አሳ፡ «አዪሲ? አይ ኢታባ ኦሴዳ?» ያጊዳ። ሺን አሳይ ካሴዋፔካ ባሪንቱ ኮሻ ጶቁ አሊዳ፡ «ማስቃሊያ ቦላ ሚሲማሪያን ጲሺቲዳ ኢ ካቁቶ» ያጊዲኖ።

24 ዋላሳይ ዴንዳናዋፔ ኦቲን፡ አይኔ ሃኔናዋ ጲላዎሲ ቤዒዳ፡ ሃላ አኪዳ፡ «ሃ ቢታኒ ሃይቁያዋን ታኒ ጌሊከ፤ ሄዋ ሂንቱንቱ ኤሪቲ» ያጊዳ ሺቁዳ አሳ ሲንላን ባሪ ኩሺያ ሚጨፎቲዳ።

25 ሺቁዳ አሳይ ኡባይ ዛሪዳ፡ «አ ሱላ ጎሚ ኦናኔ ኦ ናና ጋኮ» ያጊዳ።

26 ሄዋፔ ጉዪያን፡ ጲላዎሲ ባርባና ኡንቱንቶ ቢሌዳ፤ ሊሱዋን ዩሱሳ ሾጩዳ፡ ማስቃሊያ ቦላ ሚሲማሪያን ጲሺዳ ካቃናው ኡንቱንቶ አሊዳ ኢዲኖ።

ዎታዳራቱ ዩሱሳ ቦላ ቂሊጨዲኖ
(ማር 15:16-20፤ ዮሀ 19:2-3)

27 ሄዋፔ ጉዪያን፡ ጲላዎሳ ዎታዳራቱ ዩሱሳ ጋዲያ አዪሲያዋ ቤሩዋ አፊና፡ ዎታዳራቱ ኡባይ አ ሚዪያን ዩዪ አጲዳ ኤቁዲኖ።

28 አ ማዩዋ ቃሪ አኪዳ፡ ዘዎ ማዩዋ አ ማዩዜዲኖ። 29 ቃሲ አጉንላ አኪሊሊያ ገገሲዳ፡ አ ሁጲያን ዎሌዲኖ፤ አ ኡሺቻ ኩሺያን ማቃ ፃምዓ ኦይሊዳ፡ አ ሲንላን ጉልባቲዳ፡ «አዪሁዳቱዋ ካቲው፡ ሳሮ ዳዓይ!» ያጊዳ፡ አ ቦላ ቂሊጨዲኖ። 30 አ ቦላ ጨቹዲኖ፤ ሄ ማቃ ፃምዓ አኪዳ፡ አ ሁጲያ ሾጩዲኖ። 31 ኡንቱንቱ አ ቦላ ቂሊጨዳዋፔ ጉዪያን፡ ዘዎ ማዩዋ አፔ ቃሪ አኪዳ፡ አ ማዩዋ አ ማዩዜዲኖ፤ ቃሲ ማስቃሊያ ቦላ ሚሲማሪያን ጲሺዳ አ ካቃናው አፊዲኖ።

ዩሱሲ ካቁቲዳ
(ማር 15:21-32፤ ሉቅ 23:25-43፤ ዮሀ 19:17-27)

32 ኡንቱንቱ ካሪ ኬሲዳ፡ ኢቲ ሲሞና ጌቲቲያ ቁሪና ጋዳ አሳ ዳሚዳ፡ ዩሱሳ ማስቃሊያ ዎልቃን ቶሴዲኖ። 33 ጎልጎታ ጌቲቲያሳ ጋኬዲኖ። «ጎልጎታ» ያጌቲያዌ «ሁጲያሳ» ጊያዋ። 34 ሄዋን

ኢንቱንቱ ጫሜዳ ወደኒያ ኤሳ ዩሱሳው ኡሻናው ኢሜዲኖ፤ ኢ ሄዋ ጋንዲ ያሊዳ፡ ኡሼናን ኢዳዳ።

35 ኢንቱንቱ ማሰቃሊያ ቦላ ሚሲማሪያን ዲሺዳ ኦ ካቆዋፔ ጉዩያን፡ ኦ ማዩዋ ሻኪዳ፡ ሳማ ዩጊዳ ኦኬዲኖ። 36 ሄዋፔ ጉዩያን፡ ኦ ናጋናው ሄዋን ኡቲ ኦጌዲኖ። 37 ቃሲ፡ «ሃዌ ኦዩሁዳቱ ካቲያ ዩሱሳ» ያጊዳ ሞቱ ፃፊቶዋ ኦ ሁጹ ባጋና ዋሌዲኖ። 38 ዩሱሳና ሄ ዋዳ ላዑ ካዩሳቱዋ ኢቱዋ ኦፔ ኡሼቻ ባጋና፡ ቃሲ ኢቱዋ ኦፔ ሃዲርሳ ባጋና፡ ማሰቃሊያ ቦላ ሚሲማሪያን ዲሺዳ ካቆዲኖ።

39 ኦጊያና ኦዲያ ኦሳይ ዩሱሳ ካዲዳ፡ ባሬንቱ ሁጹያ ቃሊዳ ቦሬዲኖ። 40 «ጌሻ ጎሊያ ኮላዳ ሄዙ ጋላሳ ጊዶን ኬዲያዎ፡ ኔ ሁጹያ ኦሻ፤ ኔ፤ ያሳ ናዓ ጊዶፔ፡ ኦኔ ማሰቃሊያ ቦላፔ ዋቋ» ያጌዲኖ።

41 ሄዋዳንካ፡ ቂሳቱዋ ካፓቱ ሂጊያ ታማሪሲያዋንቱናኔ ጨማቱዋና ኢቲፔ ዩሱሳ ቦላ ቂሊጨዳ፡ ሃዋዳን ያጌዲኖ፤ 42 «ሃራንታ ኦሼዳ፤ ሺን ባሬና ኦሻናው ዳንዳዩና፡ ኢ ኢሰራዔሊያ ካቲያ፤ ኦኔ ማሰቃሊያ ቦላፔ ሃዒ ዋቋ፤ ኦኔካ ቃሲ ኦኔ ኦማናና። 43 ያሳን ኢ ኦማኔቲ፤ ያሳይ ኦ ኦሻናው ኮዮፔ ኦኔ ኦሻ፤ ኦያው ጎፔ፡ ኢ ባሬና፡ «ታኒ ያሳ ናዓ» ጌ» ያጌዲኖ።

44 ቃሲ ሃራይ ኦቶ፡ ኦናና ማሰቃሊያ ቦላ ሚሲማሪያን ዲሺቲዳ ካቆቲዳ ካዩሳቲካ ሄዋዳን ጊዳ፡ ኦ ቦላ ቂሊጨዳዲኖ።

ዩሱሲ ሃይቂዳ

(ማር 15:33-41፤ ሉቅ 23:44-49፤ ዮሀ 19:28-30)

45 ኡሱፑን ሳቲያፔ ደሚዳ፡ ኡዲፑ ሳቲያ ጋካናው፡ ቢታይ ኡባይ ዲሜዳ። 46 ኡዲፑ ሳቲ ጊዲያ ሄራን ዩሱሲ ባሬ ቃላ ቆቁ ኦሊዳ፡ «ኤሎሄ፡ ኤሎሄ፡ ላማ ሳባቂታኒ?» ያጌዳ። ሄዋ ጉሳይ፡ «ታ ያሳው፡ ታ ያሳው፡ ታና ኦዩሲ ጮዑ ጋዲ?» ጉሳ።

47 ሄዋን ኤቆዳ ኦሳፔ ኢቱ ሄዋ ሲሲዳ፡ «ሃ ቢታኒ ኤሳሳ ዪሴ» ያጌዳ። 48 ሄ ማንዒያንካ ኡንቱንቱፔ ኢቱ ዋዲዳ፡ ኢሰፖንጂያ ኦኪዳ፡ ጫላ ወደኒያ ኤሳ ጊዶ ዩጊዳ፡ ሄዋ ማቃ ፃምዓ ዪራን ዋሊዳ፡ ኡሻናው ኦ ደናኮ ሺሺዳ። 49 ሺን ዮኮንቱ፡ «ኦኔ ዳዓሻ፡ ኤላሰ ኦ ኦሻናው ያናዌንቶ ቤዓና» ያጌዲኖ። 50 ዩሱሲ ላዒንጱዋ ባሬ ቃላ ቆቁ ኦሊ ዋሲዳ፡ ሃይቂ ኦጌዳ።

27:34 ማዝ 69:21 27:35 ማዝ 22:18 27:39 ማዝ 22:7፤ 109:25
27:40 ማት 26:61፤ ዮሀ 2:19 27:43 ዛር 22:8 27:46 ማዝ 22:1
27:48 ማዝ 69:21

51 እኩኩቲ፤ ጌሻ ጎሊያን ካቁቲዳ ጋሪዲ ቆሞፔ ዲጌ ጋካናው፡ ላዑ ከሲዳ፡ ፖሼቲ ዋዴዳ፤ ሳዓይ ቃዲዳ፡ ቃሲ ዛላይካ ጳለቁቲዳ፤ 52 ጮራ ዲፋ ደዬቲዳ፡፡ ፆሳ አሳፔ ጮራቲ ሃይቁዳዋንቱ፡ ሃይቁዋፔ ዴንዴዲኖ፡፡ 53 ኡንቱንቱ ዲፋዋፔ ከሲዳ፡ ዬሱሲ ሃይቁዋፔ ዴንደዋፔ ጉዪያን፡ ጌሻ ካታማ ቤዲኖ፤ ሄዋን ኡንቱንታ ጮራ አሳይ ቤዴዳ፡፡

54 ፀቱዋ ካፑኔ አናና ዬሱሳ ናጊያ ዋታዳራቲ ሳዓይ ቃዲያዋኔ ሄዋን ሃኔዳዋ ኡባ ቤዴዳ ዋዴ ዳሮ ያዬዲኖ፤ ያሻ ጋሱዋን፡ «ቱሙ ሃዌ ያሳ ናና» ያጌዲኖ፡፡

55 ሄዋን ጮራ ማጫዋንቱ፡ ጋሊላፔ ደሚዴ፡ ዬሱሳ ማዲዴ ካሊያዋንቱ፡ ሃኩዋን ኤቁዴ ጂሊኖ፡፡ 56 ኡንቱንቱ ጊዶን ማግዳላ ጌቲቲያ ካታማፔ ዬዳ ማይራማ፡ ያዪቆባኔ ዮሴፎ ዳያ ማይራማኔ ዛቢዲዮሳ ናና ዳያ ዴዲኖ፡፡

ዬሱሲ ሞጌቲዳ

(ማር 15:42-47፤ ሉቅ 23:50-56፤ ዮሀ 19:38-42)

57 ሳዓይ ኦማርሲያ ዋዴ፡ ዮሴፋ ጌቲቲያ ኢቲ ዲራ ቢታኒ፡ አርማቲያሳ ካታማ ቢታኒ ዬዳ፤ ኢ ባሪ ሁጳዉካ ዬሱሳ ካሊያዋ፡፡

58 ዮሴፎ ጲላዎሳኮ ቢዴ፡ ዬሱሳ አጎ አካናው ዋሴዳ፤ ጲላዎሲ ዮሴፎ ኢሚታና ማላ አዛዜዳ፡፡ 59 ዬሱሳ አጎ አኪዴ፡ ጌሻ ሞጉዋ ማዩዋን 60 ፃዲዴ ባራው ሞጌታናው ሹቻ ዋጩዳ ኦራላ ጎንጎሉዋ ጊዶን አ አጎ ዋሴዳ፤ ቃሲ ሄ ጎንጎሉዋ ደናን ዋጋ ሹቻ ጎንደርሲ ዋሴዳ፡ ባሺ ቤዳ፡፡ 61 ማግዳላ ካታማፔ ዬዳ ማይራማኔ ዮኮ ማይራማ ሄዋን ጎንጎሉዋኮ ሲሚዴ ኡቲዲኖ፡፡

62 ሳሞባታሲ ጊጌቲያ ጋላሳፔ ዋንቲላ ጋላሲ፡ ቁሳቱዋ ካፓቲኔ ፓሪሳዋቲ ጲላዎሳና ጋኬቲዴ፡ ሃዋዳን ያጌዲኖ፤ 63 «ሳዳው፡ ሄ ዋርዲ ፓፃ ዴዲያ ዋዴ፡ ሪታኒ ሄዙ ጋላሳፔ ጉዪያን፡ ሃይቁዋፔ ዴንደና) ያጎዋ ከኒ ሃሳዬዴ፡፡ 64 ሄዋ ዲራው፡ አ ሞጌዳ ጎንጎሉዋ ሄዙ ጋላሳ ጋካናው፡ ሎይሊ ናጋና ማላ አዛዛሪኪ፤ ሄዌ ቆፕፔ አ ካሊያዋንቱ ቢዴ፡ አ አጎ ወዲዴ አሳው፡ «ሃይቁዋፔ ዴንዴዳ) ያጋናዋንታ፤ ላዴንሱያ ባላይ ካሴ ባላፔ ኡባ ያ ኡታና» ያጌዲኖ፡፡

65 ጲላዎሲ ኡንቱንታ፡ «ሂንቲንቶ ናጊያዋንቱ ዴዲኖ፤ ቢዴ ሂንቲንቶ ዳንዳዬቲያ ኬና ናጊሺቲ» ያጌዲኖ፡፡

66 ሄዋፔ ጉዬ ኡንቱንቱ ቢዴ፡ ሹቻ ቦላ ማታፋ አታሚዴ፡ ቃሲ ናጊያዋ ያኒ ዋሴዳ፡ ዬሱሳ ሞጌዳ ጎንጎሉዋ ናጊሴዲኖ፡፡

27:51 ኬስ 26:31-33 27:63 ማት 16:21፤ 17:23፤ 20:19፤ ማር 8:31፤ 9:31፤ 10:33-34፤ ሉቅ 9:22፤ 18:31-33

28

ዩሱሲ ሃይቁዋፔ ዴንዴዳ

(ማር 16:1-10፤ ሉቅ 24:1-12፤ ዮሀ 20:1-10)

1 ሳሞባታይ አዲና ዋጋ ጋላሲ ዋንታ ባካሊያን፣ ማግዳላ ጌቴቴያ ካታማፔ ዩዳ ማይራማኔ ዮኮ ማይራማ ዩሱሲ ሞጌቴዳ ጎንጎሉዋ ቤዓናው ቤዲኖ። 2 ጎዳ ኪታንቻይ ሳሉዋፔ ዋዴዳ ዲራው፣ ሳዓይ ዳር ቃዳዳ፤ ሄ ኪታንቻይ ዩዳ፣ ሹቻ ጎንደርሲ ኦሊዳ፣ አ ቦላ ኬሲ ኡቴዳ። 3 አ ማላይ ዋልቃንላ ማላቴ፤ አ ማዩካ ሻቻዳን ቦላ። 4 ናጊያዋንቱ ኪታንቻው ያሻ ኮኮሪዳ፣ ሃይቁዳ አሳዳን ሃኔዲኖ።

5 ኪታንቻይ ማጫዋንታ ሃዋዳን ያጌዳ፤ «ያዮፒቴ፤ አያው ጎፔ፣ ማሰቃሊያ ቦላ ሚሲማሪያን ዲሺዳ ካቁዳ ዩሱሳ ሂንቴንቱ ኮዪያዋ ታኒ ኤሪይ። 6 ኢ ሃዋን ባዋ፤ አያው ጎፔ፣ ኢ ባሪ ጌዳዋዳንካ ሃይቁዋፔ ዴንዲ ዲጌዳ፤ ሃ ዩዳ፣ ኢ ሞጌቴ ጊሶሳ ቤዓሱ። 7 ሂንቴንቱ ሃዲ ኤሌካ ቢዳ፣ ዩሱሳ ካሊያዋንቶ፣ «ዩሱሲ ሃይቁዋፔ ዴንዲ ዲጌዳ። ቃሲ ኢ ሂንቴፔ ካሰቴዳ፣ ጋለላ ቤ፤ ሂንቴንቱ አ ያኒ ቤዓና) ያጌዳ ኦዲቴ። ቤዓቴ፣ ታኒ ሂንቴንቱሲ ኦዲዳ» ያጌዳ።

8 ኡንቴንቱ ያዩዲኔ ቃሲ ዳር ናሹቴዳ፣ ዩሱሲ ሞጌቴዳ ጎንጎሉዋ ማታፔ ኤሌካ ኪቺዳ፣ ዩሱሳ ካሊያዋንቶ ኦዳናው ዋዳዲኖ።

9 ሄ ማንዲያንካ ዩሱሲ ኡንቴንቱና ጋኬቴዳ ኡንቴንታ፣ «ሳር ዴዒቴ» ያጌ አጌዳ፤ ኡንቴንቱ አኮ ሸቂ አ ጌዲያ ኦይቂዳ፣ አው ጎዩኔዲኖ። 10 ዩሱሲ ሄ ዋዳ ኡንቴንታ፣ «ያዮፒቴ፤ ታ ኢሻቴ ጋለላ ባና ማላ፣ ቢዳ ኡንቴንቶ ኦዲቴ፤ ኡንቴንቱ ታና ያኒ ቤዓናዋንታ» ያጌዳ።

11 ሄ ማጫዋንቱ ቢያ ዋዳ፣ ጎንጎሉዋ ናጊያ ዋታዳራቴዋፔ አማራዳዋንቱ ካታማ ቢዳ፣ ሃኔዳዋ ኡባ ቄሳቴዋ ካፓቶ ኦዴዲኖ። 12 ቄሳቴዋ ካፓቴ ጨማቱዋና ኢቴፔ ሸቂ ዘሬቴዳ፣ ዋታዳራቶ ዳር ሚሻ ኢሚዳ። 13 « ኩኒ ጌሚዲሹዋን ዴዲሺን አ ካሊያዋንቱ ቃማ ዩዳ፣ አ አጎ ዉዔዲኖ) ያጌቴ። 14 ሃ ዩዉዋ ጋዲያ አዩሲያዌ ሲሶፔ፣ ኩኒ አው ኦዲ አማንላና፤ ቃሲ ሂንቴንታ አይኔ ሂርጊሴናዳን ኦላና» ያጌዲኖ።

15 ዋታዳራቴ ሚሻ አኪዳ፣ ባሪንቶ ኦዴዳዋዳን ኦሌዲኖ። ሃ ዩዉ አዩሁዳቴዋ ማታን ሃቺ ጋካናው፣ ኦዴቴዳ ዴዔ።

ዩሱሲ ባሬና ካሊያዋንቶ ቤቴዳ

(ማር 16:14-18፤ ሉቅ 24:36-49፤ ዮሀ 20:19-23፤ ኪት 1:6-8፤ 1ቆር 15:3-8)

16-17 ሺን ታማኔ አቲ አ ካሊያዋንቱ ዩሱሲ ባሬንታ ቢቴ ጌዳ ጋሊላ ጋዲያ ቢዴ አ ቤዔዳ ዎዴ፣ አው ጎዩኔዲኖ፤ ሺን አንቱንቱፔ አቱ አቱ ሲዴዲኖ።

18 ዩሱሲ አንቱንቱሶ ሸቂዴ፣ አንቱንታ ሃዋዳን ያጌዳ፤ «ማታይ ኡባይ ሳሉዋኒኔ ሳዓን ታው አሜቴዳ። 19 ሄዋ ዲራው፣ ሂንቱንቱ ቢዴ፣ አሳ ኡባ ታና ካሊያዋንታ አሊቴ፤ አዉዋ ሱንላን፣ ናዓ ሱንላኒኔ ጌሻ አያና ሱንላን አንቱንታ ፃማቂቴ። 20 ታኒ ሂንቱንታ አዛዜዳባ ኡባ አንቱንቱ ናጋና ማላ፣ አንቱንታ ታማሪሲቴ፤ ታኒ ዎዲያ ዉርሴላይ ጋካናሲካ ኡባ ዎዴ ሂንቱንቱና ዴዒያዋ አኩኪቴ» ያጌዳ።

Ooratha Caaquwaa
New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

lxxx

2014-04-22

PDF generated using Haiola and XeLaTeX on 21 Feb 2024 from source
files dated 29 Jan 2022
585b63ca-b8e6-55c8-bfef-10bdc95ad69c